




ECUADOR NUNKA UMÍKTIN UMPUARMA

Nankamasuka ukunam ikiuktiai



Úunt Túatai Jikmia

**ECUADOR NUNKA UMÍKTIN
UMPUARMA**

SHUAR CHICHAMJAI
UWÍ 2011



ECUADOR NUNKA UMÍKTIN UMPUARMA

**SHUAR CHICHAMJAI
UWÍ 2011**

20 tsawant, nantu Nunkui
2008 uwi, 449 nekapak,
Jikmia Naakam Papinium



UMÍKTIN UMPUARMA

FERNANDO CORDERO CUEVA
ÚUNT TUAKMA ÚUNTRI

FRANCISCO VERGARA
ÚUNT TUAKMA PAPI AKMAAU

UWI 2010

ASAMBLEA NACIONAL DEL ECUADOR
PRESIDENTE
Fernando Cordero Cueva

COORDINACIÓN EDITORIAL
Dirección de Comunicación

INTERPRETACIÓN AL SHUAR CHICHAM
Pedro Domingo Andicha Chayuqui

REVISIÓN Y VALIDACIÓN:

Adriana Santiak	-	Pastaza
Andrés Kayap	-	Zamora Chinchipe
Ernestina Antich	-	Morona Santiago
Gustavo Tunki	-	Pastaza
Lucía Mejeant	-	Pichincha-SDI
María Clara Sharupi	-	Pastaza
Miguel Chumapi	-	Zamora Chinchipe
Pedro Carlos Piruch	-	Sucumbíos
Román Kunkumas	-	Orellana
Rosa Marianita Tsawant	-	Sucumbíos
Segundo Pablo Tukupi	-	Orellana
Tito Chumpik	-	Guayas

APOYO METODOLÓGICO Y LOGÍSTICO
Tinkunakuy Centro de Pensamiento y Culturas Andinas Por la
Construcción del Estado Plurinacional

DISEÑO Y DIAGRAMACIÓN
IMPRESIÓN
Editorial.....

Primera edición en shuar chicham

© Úunt Túatai, uwí 2011

SHUAR CHICHAM IWIAÍNIAMU

*Shuaraitjai tautikia,
artin, aújsatin nuyá chichastin neká atiniaiti.*

Warasma enéntaijai tura shuar chicham nuyá iiniuri arantukmajai, jú takátka najanamuiti tuma asantai shuarti iruntramunam nuyá Ecuador nunkanam umiktin Umpuarma juaktatui ii najantairi tuke nekámu. Ecuador nunkanam Umíktin Umpuarmaka apach chichamjai tuke najántainti tuma asantai Shuartikia ii amiktintri nekáchuitji aintsarik amíkchattaji Ecuador numianchua aintsar. Tuma asantai yamaikia ii chichamejaink aújsar, nekar enentaimmia aújsarat tusar ipianiaji. Ecuador nunkanmanka washim jimiará nawe nupanti shuar matsatji jú matsatkamunam: Sucumbíos, Orellana, Pastaza, Morona Santiago, Zamora Chinchipe, Costa Galápagos-Guayas nuyá Pichincha. Matsatkamu anairajnia juinkia shuar chicham chichaneawai.

Ecuador núm Umíktin Umpuarma Akánu 2.- tawai “Tarach Ukújturma, Tantarnuyá Ecuador Anentrutma, ii nunkéiirkari iniakmawai umiktin timianum, Ecuador nunkanmanka apach chicham máshi chicháji; apach chicham, kichwa chicham, nuyá shuar chicham másh chichaktiniaiti anturnaikiatai tusar. Chikich tarimiat aents chichamen chichainia nuka núumtak nii nunkénink, chichasartatui, umiktin tana nuna umiak, chicham menkakaink tusa ii nunké arantuk, chichaktinian émtikiattui”.

Chicham Ecuador nunkanam juni junak, paant nekámu juaktatui, jú takátka ii kankapé nekamtikramji nuyá ikiakawai yaunchu najantain aintsank irutmaji untsurí aents matsatmanum. Apach chichamjai arma shuar

chichamjai titin ishi itiurchataiti yamáram chicham
nekámu máshi shuarti aujmathsar ejerachmaiti nusha tuma
asamtai wajara juakchamniaiti áyatik yamaram chicham
apach chichamjai najánnaki weakuish aintsarik áakmakur
iniakmamkir weartatji. Jú takat najánatin pénkeraiti nusha
utsumnawai shuar jintiatin apach chichamjai taman
shuar chichamjai titin turutskesh itiurá yamaram chicham
najanamniait aintsank yainmaji shuar apach chichama
nekainiachu ni chichamejaink tiri nekamtikiamniaiti
Umíktin Umpuarma tana nunisank ukunma nuinkia aents
jú takata jukitniun unuimiararu utsumnattui unuimiat
chichamnum takakmainiak émtikiarat tusar

Lucía Mejeant

PRESENTACIÓN

*“Ser shuar,
es saber hablar, leer y escribir en shuar”.*

Con todo el cariño a la lengua y a la cultura, se ha traducido, por primera vez en la historia del Ecuador la Constitución de la República al Shuar Chicham. Las constituciones del país siempre han estado escritas en castellano, y por eso nosotros los Shuar no sabíamos a ciencia cierta cuáles eran nuestros deberes y derechos como ciudadanos. Por esta razón, hoy se dispone de este texto dirigido a los hablantes de nuestra lengua, a todos los ciudadanos y ciudadanas del Ecuador y a los especialistas interesados en el tema. En el Ecuador, existen 120 mil habitantes de la nacionalidad Shuar, distribuidos en cuatro provincias de la Amazonía ecuatoriana: Zamora Chinchipe, Morona Santiago, Pastaza y Sucumbíos. El idioma Shuar se habla desde el centro hasta el sur de la región amazónica en Ecuador, específicamente en las provincias de Pastaza, Morona Santiago y Zamora Chinchipe.

La Constitución de la República del Ecuador, en su Art. 2, párrafo Segundo dice: “El castellano es el idioma oficial del Ecuador; el castellano, el kichwa (quechua) y shuar (idioma de indígenas de la Amazonía) son idiomas oficiales de relación intercultural”. Además, señala que “los demás idiomas ancestrales son de uso oficial para las nacionalidades indígenas en las zonas donde habitan y en los términos que fija la ley. El Estado respetará y estimulará su conservación y uso”. Este es un hito histórico para todos los ecuatorianos, porque permite fortalecer la identidad nacional por medio del retorno a nuestras raíces, en un marco constitucional que garantiza el respeto para la construcción de la unidad en la

diversidad. Es importante mencionar que las traducciones de las lenguas indígenas al español necesitan recursos interpretativos más complejos que aquellos que se utilizan entre idiomas que pertenecen a la misma matriz civilizatoria. No se debe hacer un uso indiscriminado de neologismos que no han sido aceptados por nosotros, hablantes de la lengua.

Este primer acercamiento a los significados de la Constitución de la República a través de la lengua Shuar es muy importante para desarrollarla en el ámbito la lecto–escritura, lo que contribuirá al mismo tiempo a fortalecerla en el contexto de la sociedad ecuatoriana. Hoy los Shuar estamos recuperando nuestro idioma y tenemos el mayor interés en utilizarlo de forma escrita para referirnos a temas de nuestra cultura, pero también a otros del contexto universal. Este reconocimiento facilita también la formación de intérpretes y traductores, que son muy necesarios, por ejemplo en el ámbito legal, para informar a detenidos que no comprenden bien el español, lo que se encuentra establecido en la Constitución de 1978. Igualmente, se necesitará en el futuro inmediato maestros profesionalmente capacitados para cubrir las necesidades del Sistema Educativo Nacional.

Lucía Mejeant

IWIÁNIAMU

Shuartikia amítiai iwiartukar juní emkatá tachamaitiatar, yuanchu aujmatssamu jintinkiertaná nú antukar, amikiar, ii pujamurin, uchirijiai, ii aentsrijiai, iruntrar araantunaikiar, amirnaikiar pénker shiir warasar pujúwitji, nú másh nájánmasha nekáchma, ii pujamurinink nekámu, antsu yamai yámaram Umitiai Umpuarma nújainkia máshi ankanta amáji, ii chichame, ii najántai, entsátaí, nekátaí, pujútaí nuna imian amajeawai, yaunchu yaksha nekáchma armia nuna, paant amajeawai.

Yatsurtirmin juna tájarme, amítiai pénker aarma akuisha íniu tajinia nú aráantumat najánchakrikia timiatrusa amíkchattaji, aya chikichkimsa ii enéntai yapajiar shuaraitji tú enentaimsar takakmakrikia, máshiniu amiktatji, tuakar enéntaimiaj aintsarik.

Nunis asamtai, másh kákaram ajasártai irunratai, kejérnaikiachartai, chíkich unuimiaruitji tumamainiasha nupetkatai, másh iruntrarik kakarmaitji, shir matsamsatin enéntai achikiartai.

Lic. Gustavo Tunki
SHUAR CHICHAMA UNUIMIATRA

PRESENTACIÓN

Nosotros los shuar, sin las leyes y constituciones definidas nos hemos organizado para vivir en comunidades y somos educados a través de los mitos, que es el mensaje sagrado de Arutam, para dirigir el bienestar social; en la actualidad, la nueva Constitución aprobado en el 2008, nos permite y nos garantiza nuestros derechos sociales, culturales y lingüística; por lo tanto, es el momento de apoderarnos y llevar de manera constituida nuestra cultura en las comunidades y en el lugar donde estemos situados.

Hermanos, a pesar de que tengamos escrito y garantizado nuestros derechos en la constitución, si no ponemos en práctica y no hacemos respetar los derechos consagrados en las normas legales a nivel nacional e internacional, estaremos entregando nuestra sabiduría y conocimientos a las personas que nos conquistaron y siempre pensaron exterminar, el shuar es único, su pensamiento y decisión, es en conjunto.

Por eso mi pedido es, organizarnos, ser fuertes, mantener nuestra cultura, nuestro idioma, dejar el odio, el egoísmo, la mentira y trabajar siempre para el buen vivir.

Lic. Gustavo Tunki
SHUAR POLÍTICO

INIÁKMA

NÁNKAMEAMU	33
-------------------------	-----------

TESÁMU I

CHIKÍCHKIMSAR II NUNKÉ UMPUARMA.....	35
---	-----------

Akankámu chikíchik

Juarkurenentáimsamu.....	35
---------------------------------	-----------

Akankámu jímiar

Núa, aishmank pachiniainia.....	37
--	-----------

TESÁMU II

NINIURI	39
----------------------	-----------

Akankámu chikíchik

Niniuri juarkur nájanma.....	39
-------------------------------------	-----------

Akankámu jímiar

Shir matsamsatniun niniuri.....	42
--	-----------

Tésak chikíchik

Entsa nuyá yurúmtai.....	42
---------------------------------	-----------

Tésak jímiar

Pujámunam pénker.....	42
------------------------------	-----------

Tésak menaint

Ujánaiyamu nuyá étserma.....	43
-------------------------------------	-----------

Tésak aintiuk

Najántai nuyá Nekátai	45
------------------------------------	-----------

Tésak ewéj

Unuimiatai.....	46
------------------------	-----------

Tésak ujúk

Jea nuyá pujámu.....	48
-----------------------------	-----------

Tésak tsenken	
Tsuamatainiu	49
Tésak yarush	
Takat nuyá pénker pujústinnia	49
 Akankámu menaint	
Aentsu niniuri nuyá pénker iisma átin	50
Tésak chikíchik	
Núa nuyá aishmank úunt	50
Tésak jímiar	
Nátsa	53
Tésak menaint	
Aents Wekásatin	53
Tésak aintiuk	
Núa ajáprukaru	55
Tésak ewéj	
Uchi, núa, natsáma	56
Tésak ujúk	
Aents iniasnum tunamararu	58
Tésak tsenken	
Aents iniasnum sunkura takakainia	61
Tésak yarush	
Aents najantairi suritkiarma	61
Tésak usúmtai	
Aents nerentin nuyá súmau	62
 Akankámu aintiuk	
Írutkamu, iruntramu nuyá tarimiataentsu niniuri	64
 Akankámu ewéj	
Pachinma niniuri	69
 Akankámu ujúk	
Ankanta niniuri	71

Akankámu tsenken Kampunniu niniuri	78
--	----

Akankámu yarush Ayamrumatai niniuri	79
---	----

Akankámu usúmtai Amiktinnia	86
---	----

TESÁMU III TUAKMA JÚARKIMIU ÁTUA.....	89
---	----

Akankámu chikíchik Umiktin umpuarma yain	89
--	----

Akankámu jímíar Máshiniu enentai, máshiniu yaimtai, nuyá aents pachiniainia	89
---	----

Akankámu menaint Nuyánunak atuari	90
---	----

Tésak chikíchik Máshiniunu umimtikma	90
Tésak jímíar Ayamruktajtsa nájanma	91
Tésak menaint Amítmaku ayamrutai	92
Tésak aintiuk Másh ujákma atín	93
Tésak ewéj Ayámrumamu	93
Tésak ujúk Amiachmanumia	94

Tésak tsenken	
Neáchma yáamu	94

TESÁMU IV

CHICHAMA JUINIA PACHINKIAR IRUNAINIA.....	95
---	----

Akankámu chikíchik

Máshiniu pachiniainia	95
------------------------------------	----

Tésak chikíchik	
Pachinma juarma	95
Tésak jímiar	
Máshiniu irunma	95
Tésak menaint	
Úuntriniam máshiniu pachinma	97
Tésak aintiuk	
Nákak máshiniu	98
Tésak ewéj	
Enéntai juinia iruntramu	100
Tésak ujúk	
Enentai júinia pachintiamu	102

Akankámu jímiar

Umitiai najántairi	105
---------------------------------	-----

Tésak chikíchik	
Úunt Iruntai	105
Tésak jímiar	
Úunta takatrí iirin	111
Tésak menaint	
Umitiai najánniu najántairi	113

Akankámu menaint

Úunta najántairi	117
-------------------------------	-----

Tésak chikíchik	
Iruntramu nuyá najánmari	117
Tésak jímíar	
Méteketji Tama chichamrin	124
Tésak menaint	
Suntar nuyá Pushú Suntar	125
Tésak aintiúk	
Másh Wajarchatin	128

Akankámu aintiúk

Umitiai Najántairi, Tarimiat Aentsu Umimtiktairi	130
---	-----

Tésak chikíchik	
Umitiai takatrí juarma	130
Tésak jímíar	
Tarimiat aentsu umimtiktairi	131
Tésak menaint	
Umitiai Takatrí Júarmari	132
Tésak aintiúk	
Iruntra nuyá takakmatairi	133
Tésak ewéj	
Umitiai iwiarin tuakma	135
Tésak ujúk	
Umitiainiu nekasri	136
Tésak tsenken	
Arantunaitiai chichamrin	139
Tésak yarush	
Chicham nuyá itiurchat iwiartunairtin	140
Tésak usúmtai	
Máshiniu Ayámrin	140
Tésak nawe	
Másh Takat Júamu iin	141
Tésak nawe chikíchik	
Aents waintiai akantramuri	143

Tésak nawe jímíar	
Nekáamu Yáimin	143
Tésak nawe menaint	
Sépu máshiniunu iwiarnatai	144

Akankámu ewéj	
Pénker Takámunu lyámu	146

Tésak chikíchik	
Niniuri nuyá takatrí	146
Tésak jímíar	
Máshiniunu listin Tuakma nuyá Pachíniu	147
Tésak menaint	
Kuit Umuchkiamu lin	151
Tésak aintiúk	
Kuit Chichaman Émtuku	152
Tésak ewéj	
Máshiniu Ayámrin	152

Akankámu ujúk	
Anaitiai Chichamramu	153

Tésak chikíchik	
Anaitiai Chichamramu Tuakma	154
Tésak jímíar	
Anaitiainiu másh chichamrin	156
Tésak menaint	
Máshiniunu umitiai chicham júamu	157

Akankámu tsenken	
Máshiniu takákmatai	158

Tésak chikíchik	
Máshiniu tuakma	158

Tésak jímíar	
Máshiniu takakmamu	158
Tésak menaint	
Núa nuyá aishmank máshiniu takátai	159
Tésak aintiúk	
Amitiainiu Júamu Chichamrin	161

TESÁMU V

ÚUNT NUNKA NUNKÉ IRUNTRAMU	163
---	-----

Akankámu chikíchik	
Másh júarmari	163

Akankámu jímíar	
Nunke iruntramu	164

Akankámu menaint	
Náamka nii nunkénink takakmastin tesármajai métek	167

Akankámu aintiúk	
Tesármajai métek iniakmámma	170

Akankámu ewéj	
Kuitnia aujmatma	176

TESÁMU VI

ÉMKATNIUNU TESÁRMA	178
---------------------------------	-----

Akankámu chikíchik	
Máshiniu júarmari	178

Akankámu jímiar
Émkatniunu másh irunturar iwiarnarma.....180

Akankámu menaint
Yurumkanam yaimtai.....181

Akankámu aintiúk
Kuitnium yaimtai.....183

Tésak chikíchik
Kuit tesárar nuyá chichamruktin.....183

Tésak jímiar
Kuitnia chichamramu.....185

Tésak menaint
Máshiniu tumashmamu.....186

Tésak aintiúk
Máshiniu Kuit Enkémma.....188

Tésak ewéj
Kuit Júamunu.....190

Tésak ujúk
**Kuit chichamramu, yapajitiai, ikiámtai nuyá
kuitjai yaimtai.....**191

Tésak tsenken
Surútai enentai jurúsma.....192

Tésak yarush
Kuitnia najátamu.....193

Akankámu ewéj
Tuakma júamuri, yaimmia nuyá máshiniu surin.....194

Akankámu ujúk
Takat nuyá arakmar ipiampatai.....197

Tésak chikíchik	
Arakma ipiampatai nuyá chichamramu.....	197
Tésak jímíar	
Takurmakma niniuri.....	197
Tésak menaint	
Takatairi nuyá waitmatairi.....	198
Tésak aintiúk	
Arakma takákmatai máshiniu.....	203
Tésak ewéj	
Kuit yapajia nuyá métek surutmatai.....	204
Tésak ujúk	
Kuit ikiusar umuchma.....	205

TESÁMU VII

PÉNKER MATSAMSATNIUNU CHICHAMRAMU.....	206
---	------------

Akankámu chikíchik

Métekrak pachinma.....	206
-------------------------------	------------

Tésak chikíchik	
Unuimiatna.....	207
Tésak jímíar	
Tsuamatna.....	213
Tésak menaint	
Máshi pénker ítai.....	215
Tésak aintiúk	
Pujámuri nuyá jee.....	218
Tésak ewéj	
Najántairi.....	219
Tésak ujúk	
Muchitra nakurutai nuyá ankant takutai.....	221
Tésak tsenken	
Chicháma etserin.....	222

Tésak yarush	
Nekatainiu, takakmatainiu, yamáram nuyá yaunchuya nekátai	222
Tésak usúmtai	
Nunka emésmakui yáimmia	224
Tésak nawe	
Aents tuákma nuyá wekatairi	225
Tésak nawe chikíchik	
Aents wainma	225
Tésak nawe jímiar	
Wekatainiu	226

Akankámu jímiar

Kampunniunam pachim íwiaru, iwiakchash irunin..226

Tésak chikíchik	
Kampúntin nuyá pujámuri	226
Tésak jímiar	
Kampunniunam irunu	228
Tésak menaint	
Kampunniunam nuyá paantin pénker wainma	229
Tésak aintiúk	
Kampunniunam irunin	230
Tésak ewéj	
Nunka	231
Tésak ujúk	
Éntsa	231
Tésak tsenken	
Pujámu, Kampunniunmanía nuyá tsuramtikin	232

TESÁMU VIII

YAJÁNIAJAI ACHINIAIRMA.....233

Akankámu chikíchik	
Yajániajai achiniairma juarma.....	233

Akankámu jímíar	
Umírnaikiatin timia ejéramu.....	235

Akankámu menaint	
Yámaram nunkanam pujúiniajai pachínma.....	237

TESÁMU IX

UMÍKTIN UMPUARMA IMIANTRI.....	239
---------------------------------------	------------

Akankámu chikíchik	
Juarma.....	239

Akankámu jímíar	
Úunt Tuakaru Chicham Tsupin Umíktin Umpuarma..	240

Akankámu menaint	
Umíktin najánamu iwiaramu.....	244

AMINKIATIN NAJÁNAMU.....	246
---------------------------------	------------

AMUKATNIUNU NAJÁTAMU.....	254
----------------------------------	------------

CHIKÍCHNUM INIANKAKTIN.....	254
------------------------------------	------------

AKANKAMU CHIKICHIK

Itiura iniankaktiniait.....	254
------------------------------------	------------

AKANKAMU JÍMIAR

Anairatniunu.....	255
--------------------------	------------

AKÁNKAMU III	
Takamastin tuakma yapajmia.....	261
AMUAKUR TAMA.....	267
Yamaram chicham	
Chicham eaka ejéramu.....	269
EKUATUR ANENTRUTMA.....	277

**ECUADOR NUNKA
UMÍKTIN UMPUARMA**

NÁNKAMEAMU

II NÚA NUYÁ AISHMANK, Ecuador awákkachmin
arantukma nunkanmayaitji.

Núa nuyá aishmank iruntramu, yaunchu najántai imiantri
emtikiatniun ENENTAIMTAWAI,

Kampunniu úuntri, nui iisha ii iwiakmarijiai pachitkia
asakrin NAMPERMATEAWAI,

Itiur seatniuit, warí enentaiya takustiniait, nú néka asakrin
Arutman ENENTAIMTAWAI,

Aents tuakaru nii enentaimtai nuyá najántai arantakur
émtikiatai tusa AYAMRAWAI, Yaunchu ii úuntri kakáram,
maanin, awákkachma ármia nuna TIRANKI asakrin
pénker enentai jukitai tawai, Yamaiyá jui nuyá atak atatna
nú enentaimtusar,

Émtikiatai taji

Yamaram enentai jukir pachiniairar matsamsartai,
kampunniunam warasar pujustin jeatsar “shir
matsamsatin” enentaimsamuiti;

Aents tuaku aráanta, máshi tamanum, nii imiantri nuyá
mashiniunam;

li nunké mashiniu, yamaram nunka pachíniu Bolívar nuyá
Alfaro karí atirman umiak-, ankant nuyá másh nunka
pujúinia pénker enentaimtak; nuyá,

li nunké ayamrakur, írutkamu Alfaro, Montecristi,
matsatkamu Manabí, nui jú enentai jukimiuiti:

TESÁMU I

Chikíchkinsar ii Nunké Umpuarma

AKANKÁMU CHIKÍCHIK

Juarkur enentáimsamu

Akánu 1.- Ecuador nunka máshiniu pachinkiar, takusar nuyá arantunaikiar matsamsatai tusar iruntramuiti; núní asa máshiniuiti, tuakmanuiti, aráantukmaiti, ankantaiti, chikíchkiti, núkap aents mátsatkaji, úunt nunka iruntramuiti, úuntri takákui, ankanniuiti.

Úuntri anaikiamuka aents matsatkainia nuiti, utsumamu iis yaimkiatniuiti, enentai jukimiua nújai métek takakmastiniaiti.

li nunkenka máshi nii warirí irunui, kampúntin, yawi, numi, éntsa, kuri, ataichmin, enkemtuachmin nerenniuiti.

Akánu 2.- Tarach Ukújturma, Tantar nuyá Ecuador Anentrutma, ii nunké iirkari iniakmawai umiktin timianum,

Ecuador nunkanmanka apach chicham máshi chicháji; apach chicham, kichwa chicham, nuyá shuar chicham másh chichaktiniaiti anturnaikiatai tusar. Chíkich Tarimiat aents chichamen chichainia nuka núumtak nii nunkénink, chichasartatui, umiktin tana nuna umiak, chicham menkakaink tusa ii nunké arantuk, chichaktinian émtikiattui.

Akánu 3. - li nunké juna amiktatui:

1. Umiktin umpuarma nújai métek takakmak, arantia umitiaincha, unuimiatnum, tsuamatnum, yurumtainium, aents shiir iistinnium nuyá nii aentsri éntsa susatniunam nisha akántsuk átuktatui.
2. Nunké arantukma átuk nuyá ayamruktatui.
3. Máshi métek iruntrar matsamsartinian ikiakartatui.
4. Iruntrar ankan matsamsatniun nuyá amirnaikiatniun chichaman najáta atuktatui.
5. Másh emkatniun iwiarnatratniuiti takakainiachu takusarat warinkish, pujamunam irunu eméstsuk, nuyá sukartaksha métekrak susatin, “shir matsamsatniun”.
6. Métek emkatniun nuyá yain atiniaiti, nii pujámuri iruntrar ankant ninki takakmasar másh ii nunkén émcartinian.
7. Kampúntin nuyá iniu najántai irunna nuna ayamruktatui.
8. Aents matsatainia pénker matsamsarat tusa, iisma árat, ankant iruntrar matsamsarat nuyá kasa atsuarat tusa atuktiniaiti.

Akánu 4.- Ecuadora nunké najánaka másh yaunchu tesáramu, aents matsatma nuyá nii najántairi áinia nuwaiti. Tarimiat aents matsatma tuke yaunchu pujú áinia, nú nunkenka nunkarí nuyá entsarí irunna nuwaiti, nuyá nayants, átentra áinia, nunká inítri, tesamurinkia umirnaikiar, aráantunaiyakur umiktin yamaipiat umpuarma.

Ecuador nunkaka enkemtuachmin, tsupirkachmin, nuyá eméstukchamniaiti, nunkén yakesh yajauch enentaimturchamniaiti.

Ecuadora nirinkia Quitoati.

Ecuador iruntramuka máshi irunun nerenniuiti, nunka, nayaimp nuyá ankant ainiasha nuyá aintsank nayantsanash nunké tepákmajai métek enéteawai.

Akánu 5.- Ecuador nunkaka shir matsamtainti, arantia suntar írar enkemá matsamsachminiaiti, yajánia suntar tuakmaksha achatniuiti, nuní asamtai, chikich suntarka ii nunké enkemáchminiaiti.

AKANKÁMU JÍMIAR

Núa, aishmank pachiniainia

Akánu 6.- Másh núa nuyá aishmank Ecuador nunkanam pachiniainiawai, umítiai umpuarma tana nújai métek warasar pujustinian.

Aents Ecuador nunka pachitkiainiaka ayamrukmaiti, takakmari arantukar, tura tarimiat aents irunusha métek enentaimtusmaiti.

Aents Ecuador nunka akinia, nuyank asa, chikich aentsjai nuatnaikiasha, kanáksha, ajápnaiyasha nuyá chikíchnum pachinkiusha nuyankete.

Akánu 7.- Núa, nuyá aishmank Ecuador nunka akiniawaru:

1. Aents Ecuador nunka akiniawaru.

2. Aents yajá akiniawaru nii aparí, nukuri Ecuador nunka akiniawaru nuyá nú numpanmayank áinia.
3. Tarimiat aents Ecuador nunka pachitkiainia nekámu ainiawai chikich nunkajai tesarnaiyamunam ayamas pujúinia ausha.

Akánu 8.- Aents aishmank nuyá núa Ecuador nunkanam pachinkia jú aents ainiawai:

1. Ecuador nunkanmáya ajasma takakainia.
2. Aishmank nuyá núa Ecuador nunkanmania uchin yajánia weaker itiamu, juyá ajásuiti suritkiachu akuinkia.
3. Uchí arant akiniawaru aparí nuyá nukurí Ecuador numia ajasaruitkiuinkia úchi ásarka juniank ainiawai, nii wakérakuinkia.
4. Nuatnaikiaru turutskesh tsaninkiaru Ecuador numiajai tímiatrus umitiain umínia.
5. Ecuador nunkanam pujus takata najána paant iniakmámas nuyank ajas juaku.

Yá Ecuador nunkanmania ajas juaka nuka nii akiniamu nunkénianka ankant ikiuktia tichamniaiti.

Ecuador numia ajasma ikiuajai taku eménkawai.

Akánu 9.- Aents írar Ecuador nunka pujáka nunisank umirkamu nuyá umitiairi métek iisma atiniaiti umitiai umpuarmajai.

TESÁMU II

Niniuri

AKANKÁMU CHIKÍCHIK

Niniuri juarkur nájanma

Akánu 10.- Aents, írutkamu, tuakma, tarimiat aents nuyá mashiniu pujúinia auka nuyank ainiawai niniuri imiantri takakainiawai umpuarma umitiain nuyá arantia ayamrana nunisank.

Nunka pujamuka mashiniu amitiai aarma áinia nújai métek umimtikma atiniaiti.

Akánu 11.- Imiant takakmaka jú juarmajai aminki wetatui:

1. Iniu imiantrinkia juní jukittiui, chichamruktatui nuyá utsuktatui Chikíchkimias turutskesh tuakmanum úunt namkaru áinia; úunt namkaru áinia nuka amimtikiartatui.
2. Máshiniu aents métekrakete tuma asa máshiniu imiantrintin, amiktintrin nuyá waitmaktintrin takakainiawai.

Niniuri iirsar, Pujámuri, akiniamuri, tsawantri, pampatairi, núa aishmanjai, najántairi, nuatnaikiamuri, chichamrin, Arutmari, enentaimtairi, anamtai tuakmari, itiurchat wainkia nankasmari, kuitri, aran wekamuri, pampatai nekámuri, iniashi imiatairi, VIH sunkuri, tunamarmari, iniashi takakmari aents ankásma achatniuiti; nuyá chíkích aentsu niniuri imiatkimiamu achatniuiti. Amitiai papi áarma aintsan asutiamu átatui

ya aentsu imiancha iiya nuka.

li nukénka pénker aents iisma arat tusa amámkes mashiniu amimtikartatui ankan iisma áraink tusa.

3. Aentsu timiantri nuyá iirsatin amíktin papiniun juyank nuyá arantia ána aintsank wárik nuyá nákak amirkamu aartatui nuyá takakmau ánia nusha pénker wakeramu amirkatin ainiawai.

Aentsna amirkatin, amítiai tana nuna iniankas nii wakeramu najanachtiniaiti, amitiain pénker amiktiniaiti.

Aentsna amirkatniun amichuka asutiamu atiniaiti. Nuna amiatsna nuka nekachkun najanamjai tichamniaiti nuyá aintsank imitmakmanum susatniuncha nakitrachtiniaiti.

4. Amítiai papi áarma ánia nuna aents aarmarin emesmakchamniaiti nuyá amiktinnia tama ánia nunásha nunisank.
5. Núa nuyá aishmank mashiniu yaimtai júamunam takamainia nuka amítiai papi áarma tana nuna amámkes iisar takata jukiartiniaiti.
6. Mashiniu júarkimiu nuyá yaitiir irunna nuka enkentuachminiaiti, atankchamniaiti, akankáchminiaiti, kanakchamniaiti tuma asa métek ainiawai.
7. Aents ayamrúktin tusar chicham júsar áarma juyank tura arantia ánia nújai métek chíkich amítiaisha aentsnaka, irutkamunka nuyá tarimiat aents

iruntramuncha atanteatsui ninki najantairijiai métek najanawarat tusa.

8. Amiktinnia aarmaka aminki wetatui najanatniujai, amimtikiatniujai métek nuyá yainkma itiur atiniait nújai timiatrusank.

Amíktin tama áarma nújai metekchaiti nájanma emesmak niniurin amirtsuk, ayamrutsuk japir nájanna nuka.

9. Amiktinnia aarmaka aminki wetatui najanatniujai, amimtikiatniujai métek nuyá yainkma itiur atiniait nújai timiatrusank.

Amíktin tama áarma nújai metekchaiti nájanma emesmak niniurin amirtsuk, ayamrutsuk japir nájanna nuka. li nunké úunt takatrinkia amíktin tama papi áarma ána nuna arantuk nuyá amimtikiatniuiti aents imiantrin.

li nunké, yaintri, atuintri nuyá másh aents mashiniuna takáuri áinia auka emesmakma iwiartatniun emtikiartiniaiti takat juakur aents pénker enentaimtusar yainkma arat tusar.

li nukénka aents niniuri emestukma akuinkia ya nuna amikcha nuna aentsun iwiarturtiniaiti emesmakunka niniuri imian amajtutsuk, nuka takakmaurin. Aentsun amikchamtai imiancha asutiamtinkia ii nunké sumameawai mashiniu emesmakma nuna iwiarturtasa, máshi chicham iwiartin pénker junakcha asamtai.

Núkap tsawant asutniatin tama yapajniakuinki yamaram najannakuinkia yá aentsua imiancha najanamuit nuna yainktatui, yá takakmau imitmaka nuna asutiak.

AKANKÁMU JÍMIAR

Shir matsamsatniun niniuri

TÉSAK CHIKÍCHIK

Éntsa nuyá yurúmtai

Akánu 12.- Aentsnum éntsaka kanakchamniaiti. Éntsa ii nunkenka timianaiti mashiniu uyumak, yaksha nerenniumachmin, akinkiachmin, atankichmin nuyá iwiakmanum utsumtainti.

Akánu 13.- Aents nuyá mashiniu yurúmak núkap nuyá pénker iwiárturma aartiniati iniashi iwiaratniujai métek nunka pujamurin takákматаi áinia nuyá aents nii najantairi nújai métek atiniaiti.

Ecuador nunkanmanka yurúmak pénker wainkiatin tusa chichamrúkma átiniaiti.

TÉSAK JÍMIAR

Pujámunam pénker

Akánu 14.- Aents tuakar, pujútai nuyá ikiamri pujustin nekarámu atiniati shir matsamsarat tusa.

Kampúntin áinia nuka ii nunkenuiti, kampunniunam imiatkin irunna nu pénker iyamusha nuyá ii nunké enetkamush

aintsank, emésmamu iistin nuyá iwiaratin nuik ámiania aintsarik pujústai tusar.

Akánu 15.- Máshiniunu nuyá niniunak takainia áun muchitruktatui nunkan nuyá pujámu emésmatsuk yamaram takakmataijjai junákit tusa. Tsuramtin takamunmaka yurumkanun entsá imiantri emésmatsuk.

Ipiattaijjai, mesetnum ipiattai, kiakar jakamnia, najanachmin ainiawai takakmastinian, najanatniun, nerenniumatniun, suruktinian, yaruaktinian, utuaktinkia surimkiamuiti aentsu iniashi emesin asamtai yurumka emesniuiti tuma asa ii nunkén nújai takaschamniaiti.

TÉSAK MENAINT Ujánaiyamu nuyá étserma

Akánu 16.- Másh aents, tuak nuyá ninkish, jú imiantri achiakainiawai:

1. Ankant aujnaiyamu, máshiniu, pachiamu, pachim nuyá pachinaiyamu atiniaiti, másh aents tuakar matsatainiamunam, itiuraksha nuyá warijainsha aintsank nii chichamejaink nii irkarijaink.
2. Máshi ujanaitiai imiatkin pénker iwiarkamu wárik ujanaitiai máshi ankant susamuiti.
3. Aents tuakar pujúinia ujanaitiai. Métek tuiniamu anturnaikiatin imiatkin tuntui máshiniu írutkamu áinia nui susarar nuyá chinchipnumani chichataisha máshiniu, niniurink, írutkamu áinia nuyá aintsank máshiniu achimtikramu ejémak ejékamu susamu ártiniaiti.

4. Máshiniu iisar, antukar, nekar nuyá chichachu áinia nusha chicham ujáktin iwiárturma atiniaiti.
5. Másh aents pachinkiertiniaiti jú kara atirma tana nú amimtikkiur.

Akánu 17.- li nunkénkia máshiniu nuyá timian nájanma ujanaiktinia juni jukitniuiti:

1. Chichatai, ujanaitiai, máshiniu sunástatna nunaka timian najánatniuiti tura iistiniaiti pénker chinchipnumani nuyá wakan aents niniunak, máshiniunu nuyá iruntramunam susartinia nújai takakmakrisha máshiniunu imian ati tamajai métek.
2. Najanatniun chichamruktatui nuyá chichatai ítiainmani chicham wárik ujanaiktin iwiarkatniunam nuka.
3. Áinia nusha iisma átatui pénker junákit tusa, máshiniunu, aentsnajai métek nuyá iruntramu áinia nui, nuka yamainia ujanaitiai tímiatrus júamu ána nújai métek aents chicham ujashtai pujúinia nusha chicham nankamainian wárik nekawarat tusa.
4. Chicham ujánaityamu máshi emesmaktin nuyá aents chikichkimsanksha aentsu emesmaktaj nuyá yajauchin titiaj tauka suritkiamuiti nuní chicham junaktin juachma asamtai.

Akánu 18.- Másh aents, níichik nuyá máshiniu jú imiantri takakainiawai:

1. Eáktin, wainkiatin, yapájiatin, núkapeatin, nuyá etsérkatin chicham tímiatrus, nusha nekámu, iisma,

wárik, najánamu, máshiniu nekatin nankámasu pénker áinia nú, nusha timiájai titin atiniaiti.

2. Máshiniunu takakmainiana nuyá niniunak turasha ákik susamu áinia nui pachinkiar chichaman etsérkatin ankan susamu atiniaiti. Antsu chíkich chicham etsérkashtin yajauch áinia tusar umpuarma ána nuna iniankas iniankaschamniaiti. Nuna aentsu imiantri emesmakma akuinkia máshiniu surimtsuk nuyá útsuk máshiniu nekámतिकामु atiniaiti, etsertai nuyá tuntui irunmánamani.

Akánu 19.- Umíktin áarma nuka nekáska unuimiatai nuyá aentsu najántairi etsérkatniun emtikartatui tusa chicham ujanaitiai irunna nuka amimtikiatniuiti, nuyá aintsank mashiniu ii nunkén najánjinia nuka etserkamu nuyá nekámतिकामु atiniaiti.

Chicham aents tuakman imiancha emésmakmin, kajéramu, wishíkma, jiyámua nu tuntuikia suritkiamu atiniaiti.

Akánu 20.- li nunkénkia aents nii nékamuri, najánmari nuyá tuinsha nankámasu áinia nuna tuntuinmani, chinchipnumani étserna nunaka wararás ikiakártiniaiti máshiniu nekámतिकु asamtai.

TÉSAK AINTIUK

Najántai nuyá Nekátai

Akánu 21.- Aents nii turutairin, najántairin imian amajsatniuiti, chíkich nuyá núkap irutkamunam tuak pujutainiam pachitkia atiniaiti nuka ninki jui atájai tinia, turasha másh ititurá iruntra juarkiaruit nuna nekátiniuiti

másh takurmakmancha aintsank, juní iruntra pujáji tusa paant ujukatniuiti, turamuncha máshi nekamtikiatniuiti.

Másh turutaiyá nusha paant amajsatniuiti jú umpuarma aujai métek nuyanchuka nuna iniankas najánachma iniakmámu achatniuiti.

Akánu 22.- Aentska nii nekámurijiai nuyá jeamujai warinkish warásmajai nuyá nii najantairi, pujútairi, tuntuítairi, jantsemtairi najánatniuiti, túmak iisma, wainkiamu arantukma nuyá nekás nii najanaiti tama átatui.

Akánu 23.- Aentska máshiniu timia irunna nuna niniua ánis enentaímsatniuiti tura nisha najántai, jantsemtai nuyá iniakmámtai áinia nújai pachinkiatniuiti. Nuyá yaáksha suritkiachma máshiniu nekawarat tusa najának, aar, nampés niniunak néka iniakmámsatniuiti, umítiai umpuarma tána nuna amiak.

Akánu 24.- Aentska áyameak yája wekas, tuinsha wee warastinia, nakurustinian, tsawantan tesáa nájaneak másh warásmajai wekásatniun takákui.

Akánu 25.- Aentska másh yayámu irunna nunajai, yamaram enentai nekatniunam tura yaunchuya najántai nekatniunam yainkma atiniaiti.

TÉSAK EWÉJ

Unuimiatai

Akánu 26.- Unuimiataínkia aentsu imiantrinti iwiaku pujána nuinkia nuyá ii nunké juamua nuna takátrinti aents unuimiatnum yainktin. Tuma asamtai ákik umuchtukar

yainkma atiniaiti máshiniu unuimiat ati tusa nui máshiniu tuakmanum aents pujúinia nui shir pujústin tama nui jáawai. Aents, núamtak aents, aents tuakaru unuimiatnum pénker yainkma ártiniaiti, túmak niisha unuimiat pénker junákit tusa pachinkiertiniaiti.

Akánu 27.- Unuimiataínkia aentsu ajapérinti túmak nii iwiarnartinnium yayawai, aentsu niniuri, pujútairin, kampuniuirin ayamrawai, máshiniu atiniaiti unuimiatka, máshiniuiti, pachimnaiti, yanáksha timiaiti, túmak pénker iwiárturma, iirsamu atiniaiti warawarat áti tusa; máshiniunu, núa nuyá aishmank unuimiatnum pachíniu, timiaturusank, nuyá tsankajai arantukar yainkma átatui, chicharkar warásmajai máshi najántai irunu nekámtikiamu atiniaiti. Chikíchkimsar, iruntramujai nuyá aintsank aentska wájármín nuyá aintsak jujút néka atiniaiti yamaram najanatniunam nuyá takastinnium.

Unuimiatka timianaiti aentsu enentaimtai nekatairi iwiarin asa, tura nuna neká niniurinha arantukma nájanu asa, túmak ii nunkénka shiram émkatniun eawai.

Akánu 28.- Unuimiataínkia máshiniu atiniaiti nuyá unuimiatkayakshanuyáchíkichtuakmakshanérenniuchuiti. Tuma asamtai máshiniu atiniaiti, tsurinchamu, tuke atín nuyá yaksha enkematin suritkiamu achatniuiti túmak kuirach unuimiatai júarki, uchi unuimiatai, natsa unuimiatai nuyá nii jeámun ejékatniuiti.

Tuma asa aents tuakmanum irutkamunam pujuiniaka pachinkiar yainiaikiartiniaiti unuimiat pénker junákit tura nekámu ati tusa. Ii nunkénka umúchmaka máshiniu pachiniaikiar unuimiat júamu atiniaiti.

Unuimiataínkia tuke tsawant jeanam tuakar nuyá unuimiatainiam atiniaiti.

Unuimiataínkia máshiniunu junisrik ákikchajai unuimiantratniuiti, kuírchinmaya júarki úunt unuimiataiyá timiai enkeamuiti.

Akánu 29.- li nunké tuakmaka máshiniu jintiawarat tusa yainktatui, úunt unuimiatainmash aintsank, tura unuimiainiasha nii chichamejaink nuyá pujamunam turutairiyá nújai métek unuimiatan jukiartiniaiti.

Nuku nuyá apa turutskesh aparimkia áinia auka nii uchiri unuimiarinian nii enéntaijiaink unuimiatan nii takutairijiai métek unuimiat júamu iis enkea unuiniaartiniaiti.

TÉSAK UJÚK

Jea nuyá pujámu

Akánu 30.- Aentska nii pujútairi pénker, warawarat, imian najátamu takustiniaiti, pénker tímiatrus enéntai jea jeammia atiniaiti nii itiur pujamunam iruntramunam puja nuyá akíkia tákaka nújai métek.

Akánu 31.- Aentska apach írutkamu áinia nuisha wekásatniun, pujustinian nuyá irunun tímiatrus timiantri takákui turasha tuakaru áiniana nu pénker enentaimtusma nii urukuit nújai métek, írutkamu ayámach nuyá jeachat pujúinia nusha métekrak aents pujustin ainiawai. Apach irutkamunam irunea nuka máshiniuiti tuma asamtai arantukmajai iistiniaiti.

TÉSAK TSENKEN

Tsuamatainiu

Akánu 32.- Tsuamataikia aentsu timiantrinti túmakui ii nunké túakmanmaka pénker iisma atiniaiti, nuinkia másh pachíniu, entsá imiantrí, yurumkanam, unuimiatna, iniash umuchratniunu, takatna, aents wainiaikiatniunu, pujámu pénkernum nuyá chíkich shir matsamtai áiniana nui.

li nunké tuakma juamuka nekáska juiyaiti akíknum, aents tuakmanum, turutainiam, unuimiatnum, pujamunam, Tsuamatnumka wárik yainkma atiniaiti chicham jurukir máshiniu iniash imiastinnium yainkma ati tusar, aintsank nijirmatainiam nuyá pampátainiam sunkur kishmaktai tusar. Tsuamatai chichamruktinkia méteketete núa nuyá aishmanknajai, niniu, turutai, pujútairi, tsuamatairi arantukar junaktiniaiti máshiniunu tama aintsank.

TÉSAK YARUSH

Takat nuyá pénker pujustinnia

Akánu 33.- Takátka máshiniuiti tura tuakar pujúinia nunaiti, aents ninki nájanma nuyá akíkrijiai métek. li nunké tuakma juamuka aents takakmau áinia nuna pénkeri iiras yainttatui, pénker pujustinnium, akik susatniunam nuyá aintsank pénker takáak aents enéntaimmijai, wakéramujai métek waitmakar takakmasarat tusa.

Akánu 34.- Máshiniu aents pujútairi iwiakmarin iirsatniuka másh aents atankichminiaiti tuma asamtai ii nunké chichamruinia pénker enentaimtustiniaiti. Nuka aentsu imiantri iistinkia yainkma atiniaiti, máshiniunu, takamtsukna, metékrakna, timiatrusar, yainkiar, núkap

najánar, paant amajsar nuyá pachinkiar najánatniuiti, aents chikíchkimias nuyá untsurimiak.

li nunké tuakmaka imian amajsattui, nuyá nekasá nuna jukittiawai aents nii jenin takakmainia yainktinian, takata takas nujaink akíkia waitmakat tamanum, nuka chikíchkimias najánmanum aentsun pénker iisartiniaiti.

AKANKÁMU MENAINT

Aentsu niniuri nuyá pénker iisma átin

Akánu 35.- Aents núa nuyá aishmank uchi natsa, núa ajámtin, aents tunamaru, aents niniuri susamu, aents núkap tsuamarchamnia sunkurmaku, áinia nuka pénker iisma atiniaiti, máshiniu nuyá chikíchkimsar iyámujai, aents itiurchatnum nuyá kajernakcha áinia nú iisar yainkma atiniaiti, aintsank waitiainia nú ii nunké tuakma juamua ausha nuna íistatui.

TÉSAK CHIKÍCHIK

Núa nuyá aishmank úunt

Akánu 36.- Aents úunt áinia aú nii iniashi pénker iisma atiniaiti, máshiniunu nuyá chikíchkimias chichamrin áinia nú, nekáska aents pénker pujústinia ákik wainkiatniun chichamrin áiniana nuwaiti yaksha itit amákma aink tusa. Aents úuntka nekás ujuk nawe yarush uwi takakainia irunna nuwaiti.

Akánu 37.- Aents úunt áinia nuna ii nunké iruntramu juni yainktatui:

1. Tsuamatainmaka pénker nuyá aents unuimiararu tsuakna áinia nújai yainkiartatui nuyá aintsank tsuaknasha ákikchajai susartiniaiti.
2. Takakmakuish akíkma, nusha nii jeamujai métek takakmamtiksamu atiniaiti turasha máshiniu takat áinia nuchaiti.
3. Takakmasa ejér amujai titin.
4. Máshiniu tákarma nuyá ankant tákarma áinia nui, nuyá ewekákratin áinia nusha ákik akikmatai ajáperin akíkmakartiniaiti.
5. Nuyá aintsank ii nunké akikjai ii takat najánmanum akiajnia auka pénkeraiti turasha úuntnaka ankantaiti.
6. Aintsank umíktin umpuarma áinia nuinkia, warinsha akik áinia aunka akíkmakchartatui úunt asar.
7. Jéesha warás pujusat tusa jeamrimiu atiniaiti nii itiurá nuyá warinia jéami pujústaj tá nújai métek.

Akánu 38.- li nunké tuakmaka, aents úunt ainian iistiniaiti, enentai jurús emtikiatniuiti nunaka aents apach irutkamunam, ikíamani pujámuri émamkes iiras yaintinaiti, tarimiat aents nuyá aents urukuit nújai métek atiniaiti; tura aentska métekchari iirsamu atiniaiti, tura úuntcha chicham juamunam pachíkma atiniaiti.

li nunkénka juna iis takakmastatui:

1. Iniash iwiaratin, ímiastin, unuimiatnum tsawantjai métek aentska wainkiamu atiniaiti, tura aintsank

nii aentsnum pénker emétna pujústin eatnáktiniati,
nunkéntin ajas pujusat tusa.

2. Aents pénker akiachiatar tii takamtikmanumsha
ii nunké iruntramuka chichamruktiniaiti. Aintsank
máshiniu pachinkiar tuinsha takákmatai áiniana
nui úuntcha takata waitmakarat tusa, aintsank nui
takakmainiasha pénker takata jukiarat tusar jintinkiamu
ártiniaiti nii wariniuna nekaínia nuyá warínma takainia
nújai métek.
3. Aents úunt áinia ausha itit amájsachma ankant pujúsar
takakmainiak pachinkiertiniaiti aents tuakmanum
pujúinia nui.
4. Yainkma atiniaiti warínmaksha úunt eméskamu nuyá
itit amákma aink tusa.
5. Takat junaktiniaiti úunt warastin nuyá aintsank wekas
waras pénker enentaimiar pujústin.
6. Emkaka úunt enentaimturtiniaiti warinsha
nankamamunam, maniamu meset ána ai úunt itit
amákma aink tusa.
7. Nunka pénker tesárma ártiniaiti emamkesar niniuri
iirsatai tusar. Ankant aents takakma nekartsuk
imiancha amákma aink tusar, turasha chíkich enentai
najánkuinkia nuka umitiai tana timiatrusrik iisar
asutiamu atiniaiti, nuyá antsu wárik iwiarturtinaitkiuinkia
jéniasa achikiar enkeamniaiti.
8. Ayamrúktin, wainkiatin aents sunkur tsuamarchamnia,
pénker ajáschamnia sunkurmak jakuinkia.

9. Kuitniumsha nuyá enéntaimtairincha iisma atín, pénker iniashnum nuyá enéntaimmianum waras pujusat tusar.

Umitiai asutiawartatui nii shuarin úunt áinia aun ajapa páchichuk ikiunia nuna nunisank ííсарat tusa chichamruiniancha.

TÉSAK JÍMIAR

Nátsa

Akánu 39.- li nunké juamuka nátsa núa nuyá aishmank áinia auncha niniurin ayamrawai, tuma asamtai iwiarnar, warinkish takakmaki émki weti tusar eamruktiniaiti, iirsatniuiti niniun itiur ayamruktata nuna, aintsank warínmaksha anamtai áinia nuisha pachiniak paant ajaki nekáki weti tusa pachiktiniaiti.

li nunkénka nátsa aishmank nuyá núa aunka nekáska ii émkatniunam tíí ímianaititawai, tuma asamtai unuimiatnum, tsuamatainiam, jeanam, irastinnium, nakunum, tsawant ankant sumámsatniunam, suritkiachma chichaktin nuyá iruntratniunam yayawai. Nuyá ii nunkénka núkap takatan ankantan susartatui natsasha takata wainiak nunak enentaimtus juki nii enentaimmiajai métek émki weti tusa.

TÉSAK MENAINT

Aents wekásatin

Akánu 40.- Aents arant nii nunké ikiuki chíkich nunka wetinniash niniuri iruneawai. Aents yajá wekana aunka penké imiancha nekachma nuyá wainkiachma wekawai

tichamniaiti áyatik pénker iistiniaiti.

Ecuadornumia arant nii nunké ikiuki weana aunka chichamruktiniaiti wekamuri itiurchat inkiunkaink tusa, tuma asa juna amiktiniaiti:

1. Aentsu tura núumtak aents áinia yajá nunka nuyá juinksha pujúinia pénker pujusarat tusa wainkiatniuiti.
2. listiniaiti warinkish uyúmamun susátniuiti pénker itiurchat waintsuk niniuri ayamrumakat tusa.
3. Ayamruktatui niniuri aents imiancha amajtuiniana nui.
4. Ecuadora enentaimtin ati tusa jintintiatniuiti nuyá aintsank ninki enentaimias yaksha tachamaitiat nii aentsri, nunkén wakétkit tusa enentai enkétatniuiti.
5. Aents yajá nunká wearu áinia nuna Ecuador numiaiti tama papinium anújramu atiniaiti.
6. Yajáya aents ii nunké wekainia auncha pénker shir warás wekasarat tusa iisartiniaiti.

Akánu 41.- Aents niniuri ayamramu umpuarma ána máshi nunkanu nújai métek aents kajerkamú wekáa itiar nuyá úktinniasha awai. Tura aents úka apujsamua nusha pénker iistiniaiti niniu ayamrumatai tana nújai métek.

li nunkénka aents arantia kajerkamú wekanka pénker iistiniaiti warinkish imiatik najanawaraik tusa nekáska chichama iwiarin áiniana nújai chichama ejétuktiniaiti. Warinkish nii pujámuri núkap tunámak wekanka iwiarturchamniaiti nunaka awayashtiniaiti, nuka ii

nunkénka itiurchataiti.

li nunkénka aents arantia tau itiur niniuri iirsatniuit nunaka umitiai najatatniuiti umitiai umpuarma nújai métek.

Akánu 42.- Kakarmajai arant weri wekasatniuka suritkiamuiti. Aents nekámu awakektin tama áinia aunka niniuri pénker iirsatniuiti nuyá aents úunt namkaru áinia ai susátniuiti nii íisarat tusa yurumkanam, kanartinnium, jéa pujustinnium, tsuamatnum nuyá iniash imiastinnium.

Uchi aishmank nuyá nuach, natsa, núa ajámtin, nukuach uchiram kuirchin takáku, aents úuntach nuyá aents iniashin imiancha áinia nuka nii iniashi aentsua aintsar pénker iisma atiniaiti.

Aents arantia papí amitsuk wekáa awakektin tusa amirkamu áinia auka ninki yaksha untukchamu nunkén waketkiartin ainiawai pénker itiurchata inkuitsuk nuyá nékasenk nii nunké jeatniuiti.

TÉSAK AINTIUK

Núa ajáprukaru

Akánu 43.- li nunkénka núa ajámtin nuyá úmuntska áinia nuna pénker iistiniaiti niniuri amirnak júnis:

1. Núa ajámtinia auka arantukar iisma atiniaiti, unuimiatnum, takatnum nuyá tuakmanum suritkiamu achatniuiti.
2. Núa ajámtinkia ákikchajai weanak ímiatainiam ímiastiniaiti.

3. Iniashi pénker waitkiamu atiniaiti, ajápramunam, takámunam nuyá takúsmanum.
4. Iwiará ati tusa ajápramunam nuyá úmuntsmanum pénker iisma átiniaiti.

TÉSAK EWÉJ

Uchi, núa, natsáma

Akánu 44.- li nunkénka, aents tuakmaka, núumtak aents pujuiniaka uchi núa nuyá aishmank, natsáma áinia aun pénker niniuri ána aujai métek iisartiniaiti, chíkich aents áinia nunásha iniankas niniuriyá aintsank.

Uchi núa nuyá aishmankach, natsámaru áinia nuka niniuri amirkur pénker iistiniaiti, tsakatainiam, úuntmamunam, enentaimtanam, nékamunam, wakéramunam, másh tuakmanum, núumtak aents pujuiniamunam anéasma nuyá pénker wainkiamu atinia nunisank. Jú enentaikia nii pujamurin, warastinia utsumamu yainktiniaiti yaimtai pujamurinink turachkunka másh yaimtiainiam irunna nui.

Akánu 45.- Uchi núa nuyá aishmank, natsáma áinia auka niniuri másh aents takakainia aintsank nisha takakainiawai katsúnrijiai métek. li nunkénka uchi ánianka pénker wainkiatniuiti nekáska nájanna nuyá júarki akinia, tsakar pujamunam.

Uchi núa nuyá natsa, natsáma áinia auka niniuri ayámrumamun takakainiawai iniashi nuyá enentaimmia iirsatniunam; niniurin, naarin nuyá ii nunké pachitkia átinnum; iniashi nuyá tsakatairi iirsamu atiniaiti: unuimiatainiam nuyá nii najántairin, nakunum,

warastinnium, unuimiatnum, tuakmanum iistinnium; nii aentsu takakunka níjjai nuyá tuakmanum warasa pujustinian; tuakmanum pachinkiatniun, niniuri nuyá urukuit nuna arantuktin; uchisha pachinkiatniuitkiuinkia anintrusma atiniaiti; nii chichamejaink unuimiarma atín niniuri arantukar tarimiat aents itiur pujúinia nújai métek; nii aents ya áinia nuyá tui pujúinia nusha ujákma ártiniaiti, uchí enentai emésmakchamniaka.

Uchisha nii enentaimmia chichakat, iruntrat nuyá unuimiau k junaikiar tuakmá najanawarat tusa ii nukénka íistatui.

Akánu 46.- li Nunkénka itiúrak uchi núa nuyá aishmankach, natsámaru niniuri iirsamniait tusa juna eaktiniaiti:

1. Uchi ujúk uwi nunkach takakainia iniashi iwiaratniun, ímiastinnian, unuimiatnum, nuyá warinkish pujamurin iis nuyá kíshmatkatniuiti.
2. Takatnum waitkiasma, akik kasárkamu aink tusa iistiniaiti. Uchi nawe uwej uwi nunkáni takakuka takákmamtiksashtiniaiti, tuma asamtai uchi takákmāsaink tusar chicham máshi ujárma artatui. Uchi unuimiak takata nájanna nuka suritkiachma átatui turasha takata nájankush iniashi, tsakámuri eméskachmin, yajauch ajáschamnia nu atiniaiti. Tuma asamtai émamkes íintsattawai pénker jukimiu ati tusa uchi unuimiatsuk chíkich takata najánawaink tusa.
3. Iniashí imiancha áinia nuka pénker iisma máshi uyúmamujai yainkma artatui. li nunké unuimiatainiam nuyá aents tuakmanum pénker iintsat tusa emtúktatui.

4. Warínmaksha itit nuyá niniuri arántukchamu, asutiamu, nijirma nuyá ch́kích imitmamu aink tusa wainkiatniuiti.
5. Iniashi emésmau áinia nuyá awarin umartinnium nuyá ch́kích iniashi emésmau áinia nuna surítkiatniuiti uchi mesekaink tusa.
6. Pénker wainkiatniuiti warinksha nankamana ai, mesetnum nuyá itiurchat áinia nui uchí mesekaink tusa.
7. Surimkiamuiti úchi pujamunam imiancha iniakmastin nuyanchuka chicham chicharkar antutainmani másh iniankaktin aents itiurchat timia nú. Chichama juakmaru áinia ausha arantukmajai másh pénker antukminia nuna iniankakiártiniaiti, tura nuna amiachuka umitiai tana nújai métek asutiamu átiniaiti.
8. Uchi akiawaru áinia nú maimtek sepúnam enketainiakuinkia, uchirínkia pénker iirsamu atiniaiti.
9. Iniashnum tsuamarchamnia nuyá jakamnia sunkura achiakainiaka pénker iisartiniaiti.

TÉSAK UJÚK

Aents iniashnum tunamararu

Akánu 47.- li nunkenka aents iniashi imiancha áinia nú yainkiartinian enentai jusattawai, máshiniu aents tuaku áinia aujai tuakar, nuyá másh aents itiur iisma áinia aintsank iisma arat tusa.

Aents iniashi imiancha áinia nuka niniuri nekaramuiti tuma asa juni iisma atiniaiti:

1. Tsuamatai mashiniunu nuyá chikíchkimsamunu tuakma áinia aisha aents iniashi imiancha takakainia ausha pénker iisma yainkma ártiniaiti tsuamartinnium nuyá tsuak ákikchajai susamu atiniaiti.
2. Tuinksha pujus ayámratniun nuyá pujámuri shir atiniaiti.
3. Akik warinmanksha, kankémnum wekatai áinia aínkia nunkach itiaramu ártiniaiti.
4. Ii nunké warinksha akikmatai áinia nuinkia ninkia akíkmakchartatui.
5. Takat waitmaktinniumka métek ártiniaiti nii nekámuri nuyá unuimiarmajai takustiniaiti, amitiai tana nújai métek takátaí tuakma áinia nuisha pachinkiatniuiti.
6. Jea pénker iwiaramu, iniashi ímiastinnian yúpichu takustiniaiti nuyá yaksha itit amájsachma pujústiniaiti. Tura aents iniashi imiancha nii aents tuke tsawant wainkiachminiaitkiunkia aents nuniniak apujtai najátamunam ikiutniuiti.
7. Unuimiatka nii urukuit nuyá itiur enentaimmia nújai métek jukimiu atiniaiti métekrak pachinma ati tusar. Pénker unuimiatai juamua ai unuimiat susátniuiti. Unuimiatai áinia ai iniashi imiancha aunka pénker iisartiniaiti nuyá wainkiartiniaiti. Máshi pachiamu atiniaiti unuimiatainiam tura unuimiarat tusa yayámusha átatui akikjai.
8. Aents iniashnum imiancha áinia nunaka unuimiat pénker ejéturma atiniaiti, tura aya núke unuimiararat tusa unuimiatai urátmia ártiniaiti nuyá chíkích

nekátaisha iwiartukarma átatui.

9. Enentaimtainiam imiancha áinia aú nuyá ni aentsrijai iisma átatui ákikchajai.
10. Suritkiachma imiatkin irunna nunásha nisha pachintiuktiniaiti nuyá jeamkamuka atsutniuiti.
11. Chicham ujatainmasha tímiatrus ujákma atiniaiti nii urukuit nújai métek, ántichu ainiasha chichama nekawarat tusa.

Akánu 48.- Aents iniashnum imiancha áinia nunaka ii nunkenka juni yainktiniaiti:

1. Aents pénker shir pujústin, ána nújai nii itiur wainkiattaj nu iwiartuktiniaiti nisha pachinkiat tusa, unuimiatainiam, tsuamatainiam, najantairi nuyá akíknium.
2. Ákik ikiamsatniunam, itiaramu atiniaiti nuyá akitiai najánmanum akíkmakchatin nuyá takata juarkitniuiti, unuimiatnumsha ákik susátniuiti unuimiar amukat tusa.
3. Aintsank chíkich takatcha eatkamu atiniaiti nii shir pujus ayamrat tusar.
4. Anáamtainiumsha umitiai umpuarma tana nújai métek pachinkiatniuiti.
5. Nii pujútairi iwiártukma atiniaiti máshiniu nii pujútairi itiur aa nunisank yainkma ati tusa tura aents wainiamu pujúinia nuisha ankant ajakiar ninki ímiaki wearat tusa.

6. Ákik ipiampartinjai, arakmatniujai yainkma artatui iniashi imiancha áinia nuna aentsrinkia.
7. Máshiniu tímiatrus yainkma artatui aents iniashi imiancha áinia nuka. Umiktin Umpuarma tana nújai métek aents yá iniashi imiancha imian iyá nuka asutiamu átatui, katsekkamunam, tunamarmari imian chicharka áinia nuka.

Akánu 49.- Aents nuyá nii aentsuk ya aents iniashi imianchan waininia nuka iistin tama áinia nújai enentaimtusma artatui, nuyá aintsank jintiamu artatui aentsun pénker wainkiarat tusa.

TÉSAK TSENKEN

Aents iniashnum sunkura takakainia

Akánu 50.- li nunké iruntram u aents ya iniashnum tsuamarchamnia sunkura takaka nuyá itiurchat iniashnum wainia nunaka wárik yainktiniaiti, tsuamatainia juki tsuartinian nusha ákikchajai tsuamartinian nuyá tsuak susatniunam.

TÉSAK YARUSH

Aents najantairi suritkiarma

Akánu 51.- Aentsu najantairi suritkiarmu imiantri jú ainiawai:

1. Asutiamu tamaka aentsu imiantrinia akankamu achatniuiti.

2. Aujsamu nuyá nii aents iisma nuyá aintsank umitiai umpuarma takakmastinia unuimiatra ainia aujaish chichastiniati.
3. Yama achiamunam itiur isarma nuna etsérkatniuiti Umitia umpuarma unuimitrarun.
4. Aents sepuna pujuinia iniashisha pénker waitkiamu atiniaiti tuma asantai nui aents pujúinia yainkma ártiniaiti.
5. Unuimiatnum, takatnum, ákik waitmatnum, yurumkanam nuyá ayamratniunam pénker iisma atiniaiti.
6. Núa ajamtin áinia ausha pénker iisma artatui, ajapramunmaya juarki, takámunam nuyá takusmanum nekaska iniashi imiancha ainia nuwaiti nuyá aents jau áinia nusha.
7. Uchi núa nuyá aishmankach, natsamaru iniashi imiancha áinia nusha imiatkin nii wainkiatin iwiartusma ártiniati nuyá aintsank aents uuntach ainia nusha pénker iisma ártiniaiti.

TÉSÁK USÚMTAI

Aents nerentin nuyá súmer

Akánu 52.- Aentska imiatkinian pénkeran takustiniati nii wakeramun nuyá aintsank chichamsha pénker ujakma atiniaiti nuyá nekamuri, niniuri arantukar yajauchi ujakma achatniuiti.

Umitiai umpuarmaka imiatkin ainia ausha pénker áti tusa iistiniaiti nuyá nuna imiatkinia takusartíncha ayamrukma atiniaiti; nuna umíniachuka asutiamu atiniaiti nuyá imiatkin imianchaitkiunkia ya susait nuka akíkma atiniaiti aintsank imiancha ana nuinkia takakmamusha, nájanmasha seturminiaiti.

Akánu 53.- Tuakma nuyá takat máshiniunu juamu ainia nuka takata pénker jukiartiniaiti, máshiniu nui waitmainiana nuka pénker iisma nuyá yainkma aártiniaiti nuyá warinksha emesmamu akuinkia pénker iwíara eseamu atiniaiti. Warinkish takakmamu irunna nui emesnakhmatainkia ii nunké juamu iistiniaiti emamkes iis ya imitmakuit nuna chicharak iwíaratniunam tura asutiatniuitkiunkia nunasha najanatniuiti.

Akánu 54.- Máshiniunu takat jukitin tama iruntramu ana nui imiattkinia najánin nuyá suruinia papí iwíarar najánawartinniaiti tuma asamtai pénker istiniaiti, yajauch najánainiakuinkia asutiamu ártiniaiti. Aents imiatkinia najánainia sumamsartatui, aents pujamu itit amajkaij tusar.

Akánu 55.- Aents irutkamuna takakmainia tuakar pujuinia auka, tuakar nii iruntramu najánámnia ainiawai niniuri ayamrumaktai tusar, nuka máshi ujanaikiar, unuimiartin ainiawai niniu ayamrumaktinian tura, úunt ainia aish nekámu ártiniaiti.

Nuna iruntrar juamunam yaksha nakitia amesha pachinkia tusa, enkeachminiaiti.

AKANKÁMU AÍNTIÚK

Irutkamu, iruntram nuyá tarimiat aentsu niniuri

Akánu 56.- Irútkamu, tuakma, tarimiat aents, Afroecuatorianos, montubios tuakma nuyá irútkamu másh ii nunké Ecuadornúm pachitkiawai, chikichik nakákchamnia.

Akánu 57.- Nekámuiti nuyá atúnkattawai, tuakma, irútkamu, aents tuakma, nuyá tarimiat aents, umiktin umpuarma áujai métek, yajáya kara atirma, jimiartukma, etserkamu, nuyá chikich kara atirma yajá nunkánmaya aents ayamrutainiu tana nújai métek junis máshiniu atatui:

1. Wainkiatin, emtikiatin, ikiakártin niniurijiai métek, yaunchu najántai aintsank nuyá tuatairi ana nujai métek.
2. Tarimiat aents asa imian iisma achatniuiti nuyá itiurchat amakma nii urukuit nújai nuyá tarimiat aents asa nunkach enentaimtusma achattawai.
3. Nekámu, iwiarturma, máshiniu, nekaramu, ayamrukma emestukma nú ejeturma atatui imiancha amakma aink tusa.
4. Irutkamu nunké áinia nuka iirsamu nuyá arantukma atiniaiti, yáaksha enkemtuawaink, atankimiu nuyá tesaramu aink tusa. Núu nunkánmaka akikmakchartiniaiti nunka akikmatai ana nujainkia ankant amajsamuiti.
5. Yaunchu nunké tuke matsamtairi úunt nunka áinia nui ákikchajai matsamsartiniaiti.

6. Kampuntin, yawi, kuri irunna nú umuchkatniunam tarimiat aentscha pachinkiatniuiti nii nunké irunna nui pénker takasma ati tusar.
7. Tuke anintrusma, ankant nuyá ujakma, tsawant jeámujai métek tesaramu, iwiarnarma nuyá takat juamuka atiniaiti, jusar nuyá suramusha aintsank, imiatkin nuyá yawi jusar tuke amukamnia ainia nú nii nunkén irunu nuyá aintsank pújakma aun emesmakchamnia, nii najantairi áinia nunasha nunisank pachinkiertin ainiawai nú takat juamu máshiniu ati tusar aintsank imiatik emesmankamtaisha ákik susamu atí tawai; úunt naamkaru áinia nuka wárik untukmajai nuyá anintrusmaké atiniaiti, antsu nuna anintrusar ejekacharka aents atsá tama jinkimtainkia umiktin tama amiak anintrutsuk enkematin ainiawai.
8. Chichama jurusar kampuntin ii nunké irunu júkitniuiti. li nunkenka juarki nuyá najanattawai takata iwiarnatar, irutkamu pachinkiamujai, pénker jukimiu ati tusar nuyá kampuntin ainia ausha émamkesar umuchkamu atí tamajai.
9. Ampistin nuyá najánatin aents itiur matsamin ainia nuyá tuakar pujuinia nujai métek, náamkamu itiur takata juinia nujai métek, nunké iwiartukmanum nuyá irutkamu nunké tuke yaunchu pujutai áinia nui.
10. Najánatin, takakmastin, jukitin nuyá amiktin niniu amirkatniunam najántairijai métek, niniun emesmitsuk nuka núa, nuach, uchi nuyá úunt áinia nunajai métek.
11. Ni yaunchu nunké pujutairiya jiiikir akupkamu achatniuiti.

12. listin, ayamruktin nuyá takakmastin máshi enentai juukmajai; nii nekámuri, najántairi nuyá yaunchu najántairi nékamu; iwiakma nuniniak najánniuri pachitkia nuyá máshi pachim irunu; tsuamatairi nuyá nii yaunchu tsuamatairijaink, yanchuya menkaka ataksha najánatin nuyá aintsank ikiam irasmin pénker nuyá arantumat ainia, iwiarkatin, numisha, yajasmash, yawisha, ii nunké irunu áinia; nuyá nekámu atiniaiti ii nunké irunu, tura yajasma nuyá numi nii nunké ainia nusha nunisank atiniaiti.

Antsu surítkiamuiti ya enkemawar nekatairi, najántairi niniua ainis jukitsa wakeruinia nuka.

13. listin, wainkiatin, ayamruktin, najánatin nuyá yainktin yaunchu turutai nankamasu timia ainia nusha Ecuador nunkanam imian ama asamtai. Nu emtikiatniunka Ecuadora úuntri kuitia apujsatniuiti
14. Takakmastin, emtikiatin nuyá ikiakartin tarimiat aentsu unuimiatairi jimiara chichamjai niniuri nekáa emtikma nuna, pénker ati tusa, uchi akinmánmaya juarki úunt unuimiatiniam ejekatin, tarimiat aentsu najántairiya nújai métek, niniuri najántairi áinia nú emtikiat tai tama nújai métek, tura uchi jintiatniusha nii turutairijaiya nujai métek atiniaiti.
15. Unuikiartintcha pénker unuimiakaru ártiniati. Ju umuchmaka máshiniu nuyá pachintiukma atiniaiti, tsawant nuyá pujamurijai métek, turasha irutkamunam takat pénker junakit tusar iisma atiniati nuyá takat najánmasha nekamtikiamu atiniaiti.
16. Tuakma najánatin nuyá emtikiatin tu irutkamunma

pachitkiainia nui, máshiniuiti taman arantukar nuyá pachim aents ainia nunasha nunisank, chichama juakmaru áinia nunasha aintsank. li nunkénka nú iruntramu pénker junakit tusa atúktiniaiti.

17. Iruntramu úuntri anaikiamu áinia nusha paant ajasar niniun ayamrukartiniaiti umiktin tana nunisank, nuyá kara atirtiniunmash aintsank iwiarnamunmash, ii nunke itiur emtikiatniuit tusa nájanmanumsha pachinkiartin ainiawai.
18. Amítmakmataisha chicham jurutsuk emkaka ujakma atiniaiti aentsu máshiniu niniuri emesmatkaij tusa.
19. Tuke iniaístin nuyá takat jukutin achiniaitrar, chikich tarimiat áinia nujasha emkartai tamajai tura aintsarik emkatin chicham jimiartukir núnka tesamu awini aents pujuinia nujasha nunis asamtai ankant susamu atiniaiti.
Tarimiat aentsu entsatairi tuke entsaki wearat tusa emtikiamu atiniaiti, ímiamke nuyá tarachrishá niniua nunisank árat tusa.
20. Suntar áinia nusha tarimiat aentsu nunkénka arantuiniak pénker nekámujai enkemawartiniaiti, nánkamas enkemtsuk, umitai tana nújai métek.
21. Arantumatri, pachim aents matsatma, najántairi, takakmatairi nuyá enentaimtairi máshi unuimiatainiam nuyá chicham etsertainmani nekámu atiniaiti; tuma asamtai nii chichamejaink chicham ujanaitiai takusartiniaiti nuyá aintsank aents imian itsuk takat junaktiniaiti.

Tarimiat aentsu nunké arant tepakainia auka yaunchu pujutai ainiawai ementukchamnia nuyá atankichmin tuma asantai nunkenka pénker waitkiamu ártiniaiti. Ii nunkenka aentsu iwiakmarin pénker iismij tusa chíkich enentai jurúsar takastiniaiti, ninki juyaitjiai tumámit tusa. Nuna amiachuka tii emesmawai tama atiniaiti nuka umiktin umpuarma tana aintsank asutiamu atiniaiti.

Jú máshi aminkiat tusa núa nuyá aishmankjai métek iis Ecuador nunka chichamra takata pénker jukíttiawai.

Akánu 58.- Niniuri najántairin yaunchu turutaírin nuyá takurmatairin emtikiattawai, tumak mukusa aents áinia aunka umitiai nuyá chikich arántia chicham jimiartukma áinia nújai arantuk emtikiartatwai.

Akánu 59.- Montubios aents nii najantairi nuyá niniuri pénker imtikstartatui pénker iruntrar nii enentaimmiajai métek amikiar emki wearat tusar, máshiniu tarimiat aents turutairi takakena ainis atiniaiti.

Akánu 60.- Yaunchuya tuakma, tarimiat aents, mukusa aents nuyá chikich kajen ainia nusha máshiniu tarimiat numtak tuakar nii nunké tesamuri najanwartiniaiti niniu kajinmatkij tusar.

Umitiai itiur iruntrartata nuna najánatniuiti.

Irutkamu nekáamu atiniaiti yá nii nunkénink tuak pujuinia, nii yaunchu itiur puju armia nujai métek tuakma atiniaiti.

AKANKÁMU EWÉJ

Pachínma niniuri

Akánu 61.- Ecuadornumia núa nuyá aishmank jú imiana takakainiawai:

1. Anaikiatin nuyá anáamkatniun.
2. Másh imiannum pachinkiatniun.
3. Waitmaktinian iwiar ejeturma awastinian.
4. Infasma átinian.
5. Máshiniunu imianan iistiniaiti pénker wainkiarat tusa.
6. Aniaikiamu imiancha takákuinkia jíki ajapar chikich ekentsatniun.
7. Takat waitmakar nuyá máshiniunu takakmastinian nii nékamujai nuyá jeamujai métek nuka máshi nekámujai, pachikmajai, métekrak, máshiniu, núkap jukar aniaikiamu atiniaiti, métekrak arantukmajai núa nuyá aishmank, nuyá iniashi imiancha ákush métekrak ainiawai.
8. Tuaktinian tura enentai juakmaru tuakma najánatniun nui pachiniak nuyá ankant nii enentaijiaink jinkitniun nuyá aintsank chicham juamunam enentai awastinium. Aents arántia írar ániaka nii tui pachinkiamnia ánia nui pachinkiertatui.

Akánu 62.- Chicham jukmanum aents pachiniainiana nuka máshiniu anaiyamunam pachiniak ajapruatniuiti,

métekrak, nakak, ukmajai nuyá máshiniu ajapruiniamunam juna amiak:

1. Ajapruatniuka aents nawe yarush takakainia nu iniarmaiti. Nuyá aents asutiamu áinia nusha chicham umirkachma áinia nuka anaiyamunam ajapruawartiniaiti.
2. Tura aents nawe ujuk nuyá nawe yarush uwi takakainia nuka yana ajapruatsa wakeruinia nuka iniarchamujai nii enentaijaink ajapruatniuiti nunisank úuntach ujuk nawe ewej takakush, aintsank Ecuador numia núa aishmank arant wearua nusha ajapruatniuiti, tura suntar pushu suntar nuyá aents iniashi imiancha áinia ausha ajapruatin ainiawai.

Akánu 63.- Ecuadornumia núa nuyá aishmank ainiaka ayatik nii úuntrin nuyá nuna atuarin núan nuyá aishmankan anaikiartiniaiti, nuyá úunt ii nunkén takakmasartin áinia nuyá arant pujuinia emtikiartin nunak anaikiar nuyá namruktiniaiti.

Arantia aents Ecuadornum tar pujuiniasha ajapruawartiniaiti ewej uwi pujuinia.

Akánu 64.- Nu imianan takakainiaka ju enentaijia tsurinkiamu atiniaiti nuyá umitiai tana nújai métek nuka jú ainiawai:

1. Imiantri tsurinkiamu, najanmari juruktiasa pujamu, aents imiancha iisma amichu asutiamu ainiana nú.
2. Emesmakmatai nukap asutiatin timia chicham jurusma nú turasha najatnaki weakui.

Akánu 65.- li nunkenka aishmank nuyá núa anaiyamunam nuyá takat suamunam métekrak pachinkiarat tusa chichamrutnaktatui, tuakma jukitniun tura chichamruktinnium, anáamtai tuakma ainia aisha aintsank. Anámkatin enentai jusr aents juamunmanka metékrak pachinkiamu atiniaiti núa nuyá aishmanksha.

li nunkénka aents kajinmatkimiu pachischamu ainiana nú pachinkiarat tusa chichamruktiniati.

AKANKÁMU UJÚK

Ankanta niniuri

Akánu 66.- Aentsun neká nuyá imiantri juiti:

1. Aentsu iwiakmarin emestukchatin máamush achatniuiti.
2. Pénker pujústinia, iniash imiástinnium iwiartumaru, yurumatniun, iniash iwiaratniun, entsanam, jeanam, pujamuri pénker, unuimiatnum, takatnum, takat suamunam, ayamratniunam, tampunam wettinium, iniash umuchkatniunam, entsatainiam, máshiniu itiaíniam tura chíkich tuaka pujamunam utsumna nui.
3. Aents pénker niniuri iistinnium, jú enkemui:
 - a. Iniashnum, enentaimtairi, iniakmamtairi nuyá pampatairi irsatniunam.
 - b. Máshiniunu aents niniuri emesmatsuk pénker íisma atiniaiti. li nunkenka aents emesmakma aink tusa emamkes chikíchkimias íis ayamruktiniaiti

tura nuna emesmánka asutiatniuiti nunaka nekaska núa, uchi nuyá natsa, aents úunt, aents iniashi imiancha nuyá chíkich tuakmanum pujuinia nuna; timiatrus iistiniaiti, emesmakaraink, iniankas iniarma araink, nuyá pampatainmash nánkamas yajauch amajkaraink tusa.

- c. Waitkiasma, úkar emenkakma nuyá asutiamu itiurchatri nekáchiata enkeamu, aentscha aink tusa iisma átiniaiti.
 - d. Imiatkin infashi emésmakmin nuyá nii nékamuri nekaratin itiurchat amajainia nuka najanachartin ainiawai aentsu imiantri itiurchat amaju asamtai.
- 4. Imiantri nuyá imiatkintri métek ainiawi máshiniunu tuma asamtai suritkiamu achatniuiti.
 - 5. Nii iniashinkia yaksha imian najanachma, tsurinkiachma máshi métekrak enentaimtumas átiniaiti.
 - 6. Enentai apujsatniuiti nuyá nii enentaimmia ankant atiniaiti tuinksha nuyá warinkish titinnium.
 - 7. Máshi aents nekáchiata chicham suritkiamu achatniuiti, máshi etsérturma aintsank awénar máshi etséramu ákikchajai chicham iniankatramu atiniaiti chicham etsértai akantukma ánia nui pachár iniankátkimiu átiniaiti.
 - 8. Najánatniun, ikiustinian, yapajiatniun, máshiniu nuyá chikíchkimias ántamunam etsérkatniunam máshiniu niniuri arántukar najánatniuiti.

li nunke emtikiattawai aents Arutam enentaimtutai nii wakeramujai émtiki wéti tusa aintsank Arutma enentaimtichu áinia nusha pénker matsamsarat tusa.

9. Ninki enentaimias ankant najanatniuiti, ujakma atiniaiti, ankant atiniaiti, ninki enentaimias pampartinniash najanin atiniaiti. li nunkenka máshiniu chicham ujanaitiai ainia au aentsu imiantri iniankakiarat tusa chichamruktiniaiti.
10. Ninki enentaimias najánatniuiti, amírmamak nuyá iniashincha iistiniaiti, pampártinnium nuyá urutmá uchin nuachin nuyá aishmanchi wainkiartata nunasha.
11. Aents nekámunka nii enentainink takustiniaiti. Yaksha utsukchamniaiti nunak ataksha awena etsérkat tusa. Nerenniuri nekáchmajai yaksha warinkish najánachtiniaiti, arutam enentaimtamua aisha yaksha enentaimtus susachminiaiti, aintsank anamtaiya aish; aentsu tsuamatairinsha nuyá pampatairincha antsu tsuamartiniaitkiunkia etsérkatniuiti.
12. Chichamjai tunáitin imianaiti, nusha aentsun timiantri emesmatsuk nuyá niniuri nuyá ikiam pujákma imiantri emésmatsuk. Máshi aents warinsha imiancha najántai tamanum nakitratniuiti aintsank suntarnum wetincha útsukmajainchuiti.
13. Tuaktinian, iruntratniun nuyá warinkish títinian nii enentaijaink najánatniuiti.
14. li nunkén yaksha suritkiachma wekasatniuiti nuyá tui pujústiniait nuna iistiniaiti aintsank ankant nii nunkéya jinki we tura ataksha tatiniaiti, nuna najánatniuka

umitiai najánamua nújai métek amiktiniaiti. Arant wetinian surimkiatniuka áyatik aentsu iwiartin aínia nuke suritkiamniaiti imitmakma takakeakui.

Aents arántia awakékmia áchatniuiti ii nunkéya juka iwiakmari nuyá itiurchatan nii nunkén, nii aentsjai, tura warinmakesh wainkiamnia auka.

Arántia aents máshiniu jírchatniuiti. Arántia aents awakektinkia pénker ejeturar awakekmia átiniaiti.

15. Ákik tuakar tura chikíchkinsa waitmaktinnium, tsánka najánar nuyá aents pujuiniamunam pachinkiatniun imianán tákakui.

16. Takat ankánt susamu atiniaiti.

17. Ankánt takákmastiniati. Yáksha ákikchajai nuyá kakármajai iniarma achatniuiti, antsu umitiai tana nújai métek atiniaiti.

18. Náari nuyá niniuri pénker tímian atiniaiti. Umitiai aentsu imtin nuyá chichamen ayamruktiniaiti.

19. Aentsu imiatri niniuri pénker waitkiamu atiniaiti, tuma asa warinksha ujákma atiniaiti nuyá niniuri ayamrukma atiniaiti. Júktin, ikiusma, júрма, súsarma nuka aents yá nerénniuit nú útsukmajai paant najánnatniuiti tura aintsank umitiai támajai métek.

20. Niniurin nuyá níi aents pénker iisma átiniaiti.

21. Niniuri eméstukchatin nuyá iniashí urúkuít nusha nuyá takákmari; juka achíkma achatniuiti, urkar

achírkachminiaiti, antsu umitianiam ana nui atsakui najanamniaiti, iwiarin najátatniuiti nuyá chicham akuish chikíchnaka pachíkchatniuiti, íischatniuiti. Jú imíanka máshiniunuiti, tamasha niniukéte.

22. Aentsu pujámurinkia antínkma áchatniuiti. Aentsu jéen wayáshtiniaiti, warínksha eakchátniuiti jéentin wayárum íistarum tachákuinkia túrutskesh chichama íwiaru wayátarum tachákuinkia, nekás nekámua nui, umítiai tana nújai métek.
23. Imiántrinkia warinksha timia átiniaiti nuyá chikíchkimsa nuyá untsurí áinia úunt seámujai métek nuyá warinksha emámkesa aníntrusma átiniaiti. Nuyá aentsú náarijai warínkish níniunatsa seámchatniuiti.
24. Aéntska írutkamunam warínksha nájanmanum pachínkiatniuiti.
25. Imiátkin máshiniunu irutkámunam irunna nuna niniua áni íistiniaiti nuyá niniuiti, chichamsha pénker ujákma ártiniaiti irunu pénker wainkiamu ati tusa.
26. Warinkish máshiniu takurmástinian, máshiniu umiámujai nuyá pujámunam aná nújai métek. Warínkish takurmástaj takunka máshiniu umítiai ana nuna amiktiniaiti nuyá chikích enentaijiainsha.
27. Pénkernum pujústinian imianan tákakui, kampunnirijai métek, nunké tseásmatachma nuyá kampunniujai warásma atiniaiti.
28. Aentsun nuyá máshiniunu imiántri átiniaiti, núa nuyá apá, naári nenánkatin nuyá naári nii wakéramu

átiniaiti; nuyá takústinian, takastinian, máshi paant atinnia juamu, tarimiat aentscha nunisank, tu aentsuit nuna, enentaimtainiam, najantainiam arutam enentaimtainiam, chichatainiam, enentai juamunam nuyá mashiniunam.

29. Ankant pujamu imiantri ju ainiawai:

- a) Aentska ankant akinniuiti timiaiti.
- b) Iniarma achatniuiti, nuyá aentska arant jukimiu, asutiamu tuma surukma aintsank yajauch iisma achatniuiti nuikia aentsua ain iisma atiniaiti nuyá chikich aents emesmamu irunna nuni iisma achatniuiti nuna ii nunkenka ayamruktiniaiti.
- c) Aents tumash asamtai, akikmachkui, chikich amíktinia amiachkui ameka najanachminiaitme timia achatniuiti, antsu uchi ákik iniankatmaka nú nuka awai.
- d) Najanachmin aents najanata tusa iniarma achatniuiti nuyá umitai amiktin najantsuk iniaisachtiniaiti.

Akánu 67.- Numtak aents pujuiniasha pénker nekamuiti. Ii nunkenka aents matsatma iistiniaiti nuyá itiu pujustinnia wakéra nuna emtikiatniuiti. Nusha pénker máshi nuyá anujmamtainmasha nekámu atiniaiti metékrak máshiniu nú imiantriniak takaku asar.

Nuatnaiyamuka nuajai aishmankaiti, nii yajai pujustinia wakera nunisank atiniaiti métek nuniniak imiantrinkia ainiawai.

Akánu 68.- Tsaniniamuka chikichkijiainkiti, ankant natsa ánia, tuke nuatnaikia atiniaiti umitiai umpuarma tana aintsank, máshi nuatnaikiar matsatainia aintsank pujuartiniaiti.

Uchirimmiaka nuájai aishmank uchinkia tsakátmartin áiniawai.

Akánu 69.- Numtak aents pujuinia niniuri ayamruktin:

1. Apa nuyá nuku uchirmaku pénker enentaimtustiniaiti; nuku núa apa uchiri iistiniaiti, tsakatmartiniaiti, ayuratniuiti, iniashi iirsatniuiti, uchiri, nuyá nawantrin ayamruktiniaiti warinsha nankamasaink tusa, aintsank niiní warijainsha kanaki pujuinia nui.
2. Nii pujamurin warinkish utuar imiatik najanamu aink tusa umiktin tana nújai métek iisma atiniaiti. Émamkesar enentaimtústiniaiti niniu nuyá takurmastinia nui.
3. Li nunkenka enentai apujsatniunmanka métek ainiawai tu enentaimtústiniaiti nuatnaikiar pujuinia nuinkia nuyá aents tuakma shir amajsatniunam.
4. Li nunkenka nukuachin atuktatui nuyá apa yá numtak aentsu úuntri ajás pujá nuna, amiktinnium nuyá numtak aents warinkish takurmascha áinia nuna nekaska yainktiniaiti waittsamu aink tusa.
5. Li nunkenka apa nuyá nuku uchirmaku áinia nuna atuktatui nuyá émamkes iistatui nii najantairi nuyá amiktintri pénker najanki weti tusa nuyá nuku apa, nawantri uchiri pénker tuak warás pujusarat tusa.

6. Úchikia yaksha uchirimkiamu achatniuiti áyatik niniuri aráantak apa nuku nii uchirin pénker iistiniaiti.
7. Akiniamu papiri juramunam ántrank winia uchiruiti tinia náari juruschamniaiti tura chikich papincha najatachminiaiti niniua anis.

Akánu 70.- li nunkenka núkap chichamruktatui núa nuyá aishmanjai métek ainiawai taman, umitiai tana nuna amiak, takat iwiarnatra juamunmash anujkamu ártatui, tura takat juki weamunmash nunaka amimtikiattawai.

AKANKÁMU TSENKEN

Kampuniu niniuri

Akánu 71.- Ikiám nuyá ikiamu arutmari, pampataiya nui nuyá iwiaku pujutaiya nú nii pujamuri arantukma atiniaiti máshiniu irunu nuyá pénker wainkiatniuiti nini irunu, éntsá numi nuyá chikich iwiartuki wetincha aintsank.

Máshi aents, írutkamu, tarimiat aents matsatma, úunt namkaru áinia nuna amimtikiartiniaiti ii pujamu emesmatsuk pénker wainkiamu ati tusar, nunaka ju kara atirar najanmunam tana nújai métek iistiniaiti.

li nunkenka aents mísuram nuyá nekaamu áinia nuna enentái susartatui ikiamá pénker wainkiarat tusa máshi pujamunam irunna nuna, iwiaku nuyá iwiakcha ainiancha.

Akánu 72.- Kampunniuka ataksha yaunchu urukúya aítkiasrik najanatniuiti. li nunkesha nuna chikichkimias amiktiniaiti, aents nii nunken takata najankarma imiatik irunu emesnakmatainkia akikma ártiniaiti.

Nunká pujamunam takata najanainiak pujutain emesamainiaka, ii nunké takatrinti ataksha kampuntin pujamu urukuit nuna imiatrusank iwiar ikiuktinian, tura aintsank kampuntin irunu máshi amuunkaink tusa chichamruktiniaiti.

Akánu 73.- li nunkenka warinksha takat najanamanum kuntin, yajasma iruna nú menkaraink tusa takat pénker junakit tu enentaimias chichamruktiniaiti, iwiaku nuyá iwiakcha ainiancha nunisank, tura enentai itiur wainniaktiniait nunasha enentaimturtiniaiti.

Aintsank imiatkin katsuram nuyá miniar ainia núu nunka emesmakminian ajapatin surimkiamuiti.

Akánu 74.- Aents, irutkamu nuyá tarimiat aents kampunniunam irunna nuna niniuiti nuka tarimiat pujustinia suawai.

Kampunniuna irunna nunaka yaksha nerentin ajaschamniaiti nuyá aintsank nekachman arakmashtiniaiti tura antsu warinkish ara nuyá nui nunka takamastatsa wakerakka ii nunké nekamu atiniaiti.

AKANKÁMU YARÚSH

Ayamrumatai niniuri

Akánu 75.- Máshi aents ainiaka chicham iwiarturtinkia antrank akikchajai iwiarturma ártiniaiti nusha pénker najatamu nii itiur enentaimia nutiksarik, niniuri arantukmajai wárik tura núkap tsawanchajai; ayamrumatsuk juakchamniaiti. Nuna amimtikiainiachuka kara atirma najanamum umiktin timia ana nújai asutiamum atiniaiti.

Akáu 76.- Warinmaksha takat juamuka amirkatin nuyá amiktin ana nusha tuke awiti tumak juni aminkiatin tamaiti:

1. Chichama iwiarin úunt áiniana nuna takatri ainiawai juni itiur takat juamu amimtikiatniuit nunaka.
2. Aentsu nekachu ajamurincha nekaratniuiti, neকাশ yainktiniaiti niniuri emestutsuk itiurchatri nékarman nuyá asutiatin chicham juramun.
3. Yaksha aents asutiamu achatniuiti nekas amiktin tama arma ana nui atsakuinkia warinkish amitmaku ana nuka itiurchat najanachminiaiti; tura asuttiakesh asutiachminiaiti umitiainiam atsakuinkia. Ayatik úunt chichama iwiarniunam etsertukar iwiarturtiniaiti antsu nui asutiamniaiti emamkesar jintiasar iismajai.
4. Umitiain amitsuk yajá enentai juki aentsu asutiataj takuinkia imitmakma papí najateamussha najatachma junisank juaktatui wari nekáchma asamtai.
5. Amitiai tama nui aents asutiatin jintiukmatainkia jimiar ana nú iisar tua ujumchik kakarmartiniat nújai asutiamu atiniaiti turasha amitmakma nankamasainia nui, tura aents tua amitmakuit nuka nújai asutiamu atiniaiti.
6. Umiktin ana nujai amitmakuka asutiamu atiniaiti nukap nuyá nii itiur umitmakuit nuyá warinia amitmakuit nújai métek.
7. Jujai aents ayamrumaktiniaiti niniuri itiurchat amakma aij tusa:
 - a. Yáksha niniuri ayamrumaktin suritkiamu achatniuiti.

- b. Tsawant nuyá imiatkin ayamrumakat tusar susamu, iniaitiusma atiniaiti.
- c. Anturkamu nuyá nekaramu atiniaiti, chikich ánturajnia aintsank.
- d. Takat juramuka mássh nekámu atiniaiti nusha umitiai tana nujai métek. Papí najatmancha máshiniu nekatniuiti.
- e. Yaksha anintrusma achatniuiti, nuyá nekaramu úunt chichaman iwiarin ainiana nú, suntarkesh aentsun ayamrin netakchakuinkia nuyanchuka máshiniu ayamrutainiam takakma pujachkuinkia, tuamunam nuyá akankinsha.
- f. Wari chichamjaiya umirki wena nú chichaman aents chichachkuinkia nuna iniankatin nemarka atiniaiti.
- g. Chicham juki weamka nisha ayamrumaktinian ayamrinian eak itiatniuiti ayamrutkat tusa; ayamrinkia suritkiachma atiniaiti.
- h. Aarmajai nuyá chichasmajai timiatrusank ayamrumamuka atiniaiti, nuyá nekáschaiti tama nekaamu atiniaiti ya imitmakai ta nuka nunischaiti tama.
- i. Yáksha nú itiurchatjaink jimiará asutiamu achamniaiti. Tura tarimiat aents nii chichamejaink chicham iwiartamuka timiatrusank iwiarturma átiniaiti.

- j. Yá nekájai tuinia nuyá nemarainia ainiaka chichama iwiarin ainia untsuamka weankartiniaiti, tura anintramu aimkiartiniaiti.
- k. Chichama iwiarin nekámu tura ankant akunka nú chichamnaka ejeturtniaiti. Yáksha chíkích iwiartainmani imitmakmari iwiarturchamniaiti.
- l. Chichama iwiarniuka máshiniunu ainiana nu nekamtikiamu artiniaiti. Yáaksha juni najanata tusar utsukma achatniuiti itiur amimtikiatniuit nújai métek junaktiniaiti. Tura nú pénker aminkiachmatainkia chicham jukí weamuka nui amunawai. Tura nú pénker junachkuinkia chichaman iwiarin asutiamu átiniaiti.
- m. Chichama inkiunkuka tuinksha wekas chichaman iwiartumratniuiti.

Akánu 77.- Asutiatin tusar chicham juramunmaka aents juni chichaman najana ímiastiniaiti:

1. Aents niniuri atanteamuka pénker nekaramu atiniaiti nuyá amimtikiatniuiti, tsawant ikiursamu nuyá ankant susamu atiniaiti umitai aarma ana nújai métek. Tura pénker nekaramuka nunistchaiti, tura aents itiurchatri imitmakmari nekarachmaka chikichik tsawant enkeamu pujuschamniaiti. Chicham iwiarniuka pénker nekatniuiti aents achikma itiur pujustiniat tura wari najatatniuit nuna.
2. Yaksha sepúnam enkeamu achatniuiti chichama iwiarin aar susachuitkiuinkia, antsu nekas paant wainkiamua nuka nunistchaiti. Tura nekas nekaramua

nuka chicham amirman amiak enkeamu atiniaiti.

3. Máshi aents, sepúnam achikia enkeamu, nekatniuiti warinma enkéma nuna nuyá ujakma atiniaiti chichama iwiarniua nú tura yá achik enkea aintsank yá takakmainia enkeatsara.
4. Aents achikmanka yá achikia nú chichatsuk nuyá warinkish chichamujai wetai tinia jukitniuiti nuyá ayamrumaktin ayamrin achirmamkata titiniaiti nuna jeachkuinkia yainktiniaiti nuyá nii aentsnash ujaktiniaiti nii enkemá pujamurin.
5. Yajáya aents irar achikiar enkeamuitkiuinkia yá achik enkea nú itiur tawit, nui etsertuktiniaiti.
6. Ujakchamuka achatniuiti.
7. Aents niniuri ayamrumaktinkia junisaiti:
 - a. Ujakma atiniaiti, émamkesar nuyá jintiasar, nii chichamejaink nuyá itiur najatamuit nújai métek nuyá wari itiurainia nusha aintsank, tura yáa úunta chichaman nájata nunasha.
 - b. Takamatsatniuiti nekachua ainis.
 - c. Ninki surumakat tusar aents utsukma achatniuiti, sepúna enkematniun najatmamachminiaiti.
8. Nuarink nuyá aishrinkish enkeat tusa yaksha utsukma achtaniuiti, tsaniakmarin nuyá nii aentsun nuyá nii aents nekamua nusha aintsank, antsu nuamtak pujamunam amitmakua nuka asutiamu atiniaiti, nijirmarua nusha. Etserkatniuiti itiur unukait nuka

nusha nii aentskeka achatniuiti. Nu aentska chicham jurusar sepunam enkeamu atiniaiti.

9. Chichaman iwarin ainiana nú nekámujai aents yamaik achikia enkeamuka ujuk nantu iniankaschatniuiti nuyá chikichik uwish ejechamniaiti nú asutiamujaink. Nuna iniankakmiatainkia chicham juruki weamuka nui amuwawai.
10. Chicham juruki weamu aminkiachmatainkia aents imitmakuka ankant juawai, warinksha ejetuki weamu taasú asamtaish.
11. Chichaman iwarin áinia nú chicham nájanma aminkiachmatainkia yá nuna amimtikiacha nunaka asutiawartiniaiti umitiai tana nunisank. Yámaichik asutiamuka aents itiur amitmakuit nújai métek takat nuyá chicham jurukmia atiniaiti nii asutniatin.
12. Aents imitmakuka sepúnám enkeamuka, pujustiniiaiti. Amitmakuka chikich jeanam pujuschatniuiti ayatik sepu máshi nekamunam pujutniuiti, umitiai tana nújai métek.
13. Aishmank natsamainianu nuyá núa natsamainia amitmakaruka nii itiur amitmakara nújai métek najátamu atiniaiti. Ii nunke itiur asutiamu atata nuna titiniaiti, tura aintsank yajai wekaasa imitmaka nú iisar nekára asutiamu atiniaiti, tura natsámaruka úunt sepúna matsamtainia nuinkia iwiarturchatniuiti.
14. Nunischaiti, waitiaiti tusa imiatrus ejek timatainkia chichamka nurant ajaki wechamniaiti.

Yá nuna nékayiat aentsun umitai iniankas achikia nuka umitiajai métek asutiamu atiniaiti. Nuna amitsuk aentsu kakármajai achik enkeaka asutiamu atiniaiti tura nii takamamurisha iirsamu atiniaiti aentsu imiancha amaku asamtai.

Tura pushú entsarú nuyá suntar áinia amitmakarmatainkia umitai tana nújai métek asutiamu ártiniaiti.

Akánu 78.- Aents imitmakaru ainiaka iisma atiniaiti emamkesar imitmakmari nekara nii itiuur iistiniait nújai métek, tura aintsank imitmakma aents tariar yajauch amakaraink tusa iistiniaiti. Tura aintsank aents imitmakmatai sepúna enkeamuka nii imiantri pénker iirsamu átiniaiti itiuur chat amajkashtiniaiti.

Itiura ayamruktiniait nu iistiniaiti nuyá imitmakma aentscha iistiniaiti aintsank aents imitmakarmataisha iirsamu atiniaiti.

Akánu 79.- Aents núa nuyá aishmank Ecuadornum pachitkia chikich nunkana akupkar asutiamu achatniuiti. Ecuadornum umitai tana nujai métek asutiamu atiniaiti.

Akánu 80.- Mesetnum, maniamunam nuyá chikich maniamu najanmanum aents menkakamunam nuyá ii nunka imian amakma achattawai, nunis najaneamuka antrar emenkakma, asakarma achattawai. Nunis imiatik nájanmanum aents útsuku nuyá pachinkia áinia nuka nekachma itkiunkia warinksha itiuur kamu achatniuiti.

Akánu 81.- Umiktin tama imiatrusa aarma nú aminiak aents tuakmanum itiuur chat wainmanum, nijirmatainiam, suir iniaiyamunam, nuyá uchi aishmanchin nuyá nuachin

itiurchat amajainia úuntan, natsan, aents iniashin imianchan, úuntach, ainiancha pénker iisar wainkiartatui. Nuna ayamruktinian umitiai tana nujai métek aniaitiukma atiniaiti amimtikiatniun.

Akánu 82.- Umitiai aarma aná nui nekaska itiur aents ayamruktinait nuna étserui nuka paant timiatrusar najanamuiti máshiniunu tama nunaka úunt anamrukaru áinia nú amimtikiartiniaiti.

AKANKÁMU USÚMTAI

Amiktinnia

Akánu 83.- Núa, aishmank áinia Ecuadornum pachitkiainiaka umitiain nuyá imiantri takakainiawai umitiainiam nuyá chikich aents umiktin umpuarma tana nujai métek.

1. Umitiai umpuarma, umitiai, nuyá chikich umitiai ainia nú pénker najankur amiktiniaiti.
2. Naki aip, wait aip, kasa aip.
3. Ecuadora nunké nuyá kampunniurin ayamruktin.
4. Tsankurnairar nuyá pénker matsamsatniunam yaimkiatniuiti.
5. Aentsu timiantri arantuktin, kakantratin nú ayamruktasar.
6. Kampunniu imiantri arantuktin, pénker ati tusar iirsatin, nunká init irunusha emámkesar jusatin, emesmakma

aink tusar.

7. Máshiniu pénker pujustin chichamruktin, máshiniu yayamu iniaisar, chikichkimsar iistin tarimiat pujustin tana nújai métek.
8. Yaimkiatin enentaijiai takakmastin umitiai tana nujai métek, máshiniunu, nuyá kasamma akuinkia etsérkatin.
9. Yainkma atiniaiti, niniuri amireakur nuyá warinksha takurmamu máshiniunu wainma asamtai.
10. Iruntrar matsamsatin chichamruktin metekrakna unturi matsatmanum nuyá pachim aents pujamunam.
11. Máshiniu tákarmanum pachinkiar yaimkiatin, nuyá aintsarik juni takájai tusar paant amajsatin aents tuakmanum nuyá úunt takata amasuana nui umitiai tana nújai métek.
12. Unuimiarmajai takakmastin, wariniua unuimiatraitiaj nújai métek setúrmajai.
13. Ii turutairi iistin, máshi ii nunken ainiana nusha nuyá aintsank máshiniu imiatkin áinia nusha pénker wainkiatin.
14. Arantukar nuyá nekatín warí aentsua pujuinia nú mash nunkanam matsatmanum, tsawant nankamamunam, aents urukuit nujai métek nuyá pampatairiya nujai métek.
15. Ii nunké yainktiniaiti nuyá ii irutkamuri, máshiniu pénker

imiastin nuyá máshi iin yainkmajnia nui akikmaktiniaiti
umitiai tana nújai métek.

16. Pachinkiatin, uyuratin, unuimiartin, nuyá ii uchiri
nawantri pénker wainkiatniuiti, apajai nuyá nuku métek
iisartiniaiti, nuyá aintsank aishmankchish nuachish
apari utsumainiakuinkia yainkiartin ainiawai.
17. Kara atitaiinmash pachinkiatniuiti arantumat
tsawantnum, irutkamunmash pénker enentaimsamujai
nuyá paant najánmajai.

TESÁMU III

TUAKMA JUARKIMIU ÁTUA

AKANKÁMU CHIKÍCHIK

Umiktin umpuarma yain

Akánu 84.- Tuamu nantujen nuyá chikich chicham najantai áinia nuinkia pénker iwiaratniun yainktinian, umiktinia susatniun, umitiai, nuyá chikich umiktin najánamu ana nújai métek nuyá arantia tama umitiai áinia nusha najatamu atiniaiti aents nuyá irutkamu ayamruktaj tusar aitkiasrik tarimiat aents áinia nusha umitiai umpuarma, nuyá chikich umitiai papi áinia ausha aents imiancha iistinkia atsawai. Chikich chicham yapájmiaka umitiai umpuarma iniankaku achatniaiti.

AKANKÁMU JÍMIAR

Máshiniu enentai, máshiniu yaimtai, nuyá aents pachiniainia

Akánu 85.- Nájaneamu, takámu, takasma iyamu nuyá másh nájanma iyamuka umitiai umpuarma ana nujai métek jukitniuiti ju tama ana nujai métek najanatniuiti.

1. Máshiniunu enentai jurusma nuyá takat juamusha amirkamu ana nusha tarimiat pujustin tama nújai métek atiniaiti, tura chikich áinia nusha najanmaiti tama nunisank atiniaiti.
2. Máshiniu tura chikichkimas aents yainktin tama ana nuna amiak kajernaikiachmajai iniaisartiniaiti pénker iniaisarat tusar manitsuk shir pujamu tamaiti.
3. Li nunkenka kuit métekrak susamu arti tawai nuyá máshiniu utsumamu eamramu takamuri irunna nunisank.

Najáneamu, takamu, takakmasma iyamu, másh nájanma iyamuka, aents pachinmamtikiar, irutkamu nuyá tarimiat aents áinia au pachinkiar jukitniuiti.

AKANKÁMU MENAINT

Nuyánunak atuari

TÉSAK CHIKÍCHIK

Máshiniunu umimtikma

Akánu 86.- Máshiniu umitiai áinia nuka máshiniunu atatui ju enentaijiai:

1. Yá aentskesh, nukap aentskesh, irutkamukesh tarimiat aentskesh umitiai umpuarma tana nuna juni takat junakti titiniaiti.
2. Núa nuyá aishmank chichama iwiarin áinia takatrinti chichama amimtikiatin nuka juwaiti takatrinkia:
 - a) Takat juamuka yupichuchiti, warik nuyá pénker nusha tui tuinksha chichasmak atiniaiti.
 - b) Tuke tsawant tura akantsamu takakmantsatniuiti.
 - c) Chichásrik nuyá aarar timia atiniaiti enentaimmiaka, jintiasa najantsuk antsuka aujnaisamu atiniaiti nuyá chichama iwiarin áinia nú nakak atukma achatniuiti.
 - d) Warik ujanaikma atiniaiti.
 - e) Tura nukap tsawanti iniankaska takat pénker junatsui.

3. Chicham awannasmatainkia iwiarin warik untsumkatniuiti máshi pujuiniamunam chichastinium ántranka junisaiti tichamniaiti tuma asa yaimkiatniun anairatniuiti, chikich timia timiatrusank atiniaiti chikich aents eamu wantinchakuinkia. Tura nuna iwiarin amamkes takata jukittiawai yá amikiuit nunanak papi amirkamu jinkitniuiti.

Tura nú papi nájateamu aminchakuinkia takakmanka nii takatri jikmia atiniaiti nusha sepúnam enketsuk tura antsu aents misuram nuni enentai jurusmaka amitiai tama nújai amirkatniuiti.

4. Aents takakmauri ánia nú ni amitiari amikcharuka chichama iwiarin etserkar iwiamujai asutniatin ainiawai nusha asutiamu achatniuiti sepúnam enkeamu. Tura ya chicham ejeramu amiatsu nuka amitiai tana imiatrusank asutiamu atiniaiti.
5. Máshi chicham jurka asutniati tama jeakmatainkia chicham iwiaitai nantuje etserkamu atiniaiti nui chichaman ejetur asutiamu ati tusa.

Akánu 87.- Aintsank emesmaku iwiaitamunam imitmaku ánia nusha ni ayamrinjai chichama ejer ayamrumaktiniaiti, niniuri itiurchat amajkamu aink tusa.

TÉSAK JÍMIAR

Ayamruktajtsar nájanma

Akánu 88.- Ayamrumaktinkia nakak atiniaiti umitiai tana nujai metek tura aintsank imiancha nekapeakka jintiatniuiti

tura aintsank namkaru áinia niniuri imian iyachkuinkia etsertukma atiniaiti tura máshi umitiai ainiana aintsank aminiuk najantniuiti aents imiatik iisma aink tusa.

TÉSAK MENAINT

Amitmaku ayamrutai

Akánu 89.- Ayamrakur ankant ujuakatin aents itiurchatri imian nekártsuk enkeamua nú ankant ujuakatin nii iniashi warinksha imitmatsuk itiurchat amajtsuk ankant ujuamu.

Tura chichama iwiarin untsumkatniuiti núkap chicham itiurchat ajakuinkia pénker iwiaratin chikíchik tsawant nekapmasmajai achiniak enkenati timia atiniaiti. Chichama iwiarin sepúna enkeamu pujan untsuk anintrus iwiaratniuiti. Nuyá chicham iwiartainium wetin jeachkuinkia sepunam enketmanumak weri nú takatnaka najanawartiniaiti.

Chichama iwiarniuka jimiara nawe aintiuk tsawant akantsamunak takakui iwiaratniun, tura nekas imianchanum enkeamuitkiunka warik ankant susamu atiniaiti nuka warik amikma atiniaiti.

Tura ti waitkiasma nekanamtainkia, núkap asutiar waitkiasmaitkiunkia warik imitmakuka ankant jikir ukupkamu atiniaiti nuyá tsuamarmatai ataksha enkeamniaiti sepúnmake.

Tura aents imitmaku chicham ejeturma, enkeatai takurkia pujamunmak Corte Provincial de Justicia tamanum ejeturtniiaiti.

Akánu 90.- Aents enkemachmin itiurchatri takakcha enkeamuitkiunkia chichama iwiarin nekaska pushu

entsaru ainia nújai ii nunken chicham iwiartai irunna nújai métek tura nui itiur ejekattaj nújai métek juarkitniuiti.

TÉSAK AINTIUK

Másh ujákma atín

Akánu 91.- Chicham ujanaktinkia máshiniunu atiniaiti chicham pénker nekar warinksha emtikiatin asa tura warinksha tichamu chichamka máshiniu nekamu atiniaiti. Turasha aents chichama imiancha étserkuisha chicham ejeturar nekáramu atiniaiti, nuka mashiniuchuka etserkashtiniaiti. Tura chicham tuakma emesmakminiatkiuinkia chichama iwiarin ainiana nui etserkamu átiniaiti, pénker ujanairtai tama asamtai.

TÉSAK EWÉJ

Ayámrumamu

Akánu 92.- Máshiniu aents, niniuri amiak nekas nii nájanu asa, pujamuri nekatniuiti tura máshi najankamu nekatniuiti tura naari iwiareak anujmamkamu émamkes awakeki imiastiniaiti máshi takat juamu nui. Nuyá aintsank niniun warinia najanainia nunash nekatniuiti, máshiniu akaar iwiarkamu áinia nui.

Tura aents anújar takakmauka aents seamea nuna naarinkia paant aar iniakmamsatniuiti umitai tana nunisank.

Tura aents niniu imiantri nekatsa wakeraka aakmakma seami iistiniaiti pénker aarma ati tusa, nuyá aitkiasank ataksha awakeki iwiaramniaiti tuna asakartinnia wakera

nuna. Tura aamarma itiurchatchaitkiuinkia umitiai tana nujai métek amimtikiatniuiti. Seammia nekarnattawai, juka chichama iwiarniunam weankatniuiti. Tura aents itiurchat amakmaka umitiai tana nújai métek ejeturma atiniaiti.

TÉSAK UJÚK

Amikchamunam

Akánu 93.- Amiachkui najateamuka nekaska umitiai tama najánamu ana nújai métek najátamu atiniaiti, nuyá arantia umitiai umpuarma nújai métek ayamrumaktiniaiti, tura aintsank nunisar najanatatsa wakerakrikia esetra iisar najanatniuiti. Tura nú aminki weak chicham iwiartai nantuje tana nunisank amirnaktiniaiti.

TÉSAK TSENKEN

Neachma yayámu

Akánu 94.- Neachma najántai ana nuinkia imitmakuka asutniati timia awai nuka ninki surumaktiniaiti úunt namkaru ainia nújai, tura nuna imiatrus takata jukichuitkiuinkia ayamtusa puja asar nekaji turasha yá amitmakuit nu.

TESÁMU IV

Chichama Juinia Pachinkiar irunainia

AKANKÁMU CHIKÍCHIK

Máshiniu pachiniainia

TÉSAK CHIKÍCHIK

Pachinma juarma

Akánu 95.- Aishmank nuyá núa pujuinia, chikichkimas nuyá máshiniu nisha atukar pachinkiartatui chicham juamunam, iwiarnamunam, máshiniunu eamramunam, takakmau ainiana nú iistinnium nuyá aents matsatmanum nuyá úuntri ainian, mashiniu kara atirar juamunam. Pachinmaka metekrakna atiniaiti, kanakmia, ankant máshiniunu, chikichkimas arantukma uruku áinia nújai métek, mashiniu iniaismajai, tsankamkamu nuyá másh aents tuamujai.

Máshiniu aents másh takurmastinnium pachinmaka iniuiti, máshiniu tuakmaiti nakak nuyá irutkamunmani pachinkiatin asa.

TÉSAK JÍMIAR

Máshiniu irúnma

Akánu 96.- Aents matsatmanumka nankamas ni wakeramu irunma ayu timiaiti, máshiniunu iruntrar nii jeamun eamrumkar matsamsarti timia asamtai, turasha emkatniurinkia ii nunke úuntri nuyá umitiai umpuarma ana nujai métek takat jukimiu atiniaiti, nuka iruntramu máshiniu nuyá niniunak juana nuka máshiniu yainkiartiniaiti.

Iruntramu áinia nuka ii nunke takat juamua nuna nisha ikiakartiniaiti itiur takakma nújai métek; nuink init tuakmanumak pachintiamu atiniaiti, náamkarurinkia takat juamuncha paant najanki etserki weartiniaiti.

Akánu 97.- Máshiniu iruntramu áinia nuka itiurchat akuisha wajatar itiurchata pachintiutsuk chichama iwiarartin ainiawai nusha Umitiai tana nu najanamniaitme takuinkia; úunt naamka ame tuakmarminkia chichamaka amék iwiarata tusa súamuitkiunka, warinkish máshiniunu timian emesmakuinkiuinkia etsérkatniuiti mashiniu nuyá niniunak takau áinia auka, aintsank juni takakmantsachaintiuash tusa enentai susatniuiti akik, enentai juamunam, pujamu wainmanum, matsatmanun, nuyá najántainiam; nuyá chikik enentai tarimiat pujustinia amiakuinkia.

Tura aintsank ántrank máshiniunu takaurin pénker matsamnasat tusa nuka nekamuiti.

Akánu 98.- Aents nuyá tuakma áinia imiantrijiai métek najanawartiniaiti, máshiniunu tama aintsank nuka aents ejeturma tura nekáchma áinia nusha máshiniu ju umitiai umpuarma nújai métek takakmasartiniaiti tura yamaram aentsu imiantri iisartiniaiti.

Akánu 99.- Aents tuakmanum chicham juamunmaka chikichkimias timia atiniaiti nuka imitmamu akui; úunt namkarui áinia nui nekamtikiamu atiniaiti umitiai tana nújai métek. Juni takat juamuka suritkiamu achatniuiti amiktin juamujai métek aa asamtai.

TÉSAK MENAINT

Úuntriniam máshiniu pachinma

Akánu 100.- Úunt anamka takakmamunam máshiniu anamka ainia nuna pachikiar takakmastatui, nuka nunka tesaramunam aents matsatainia nuna átuajai métek, máshiniunu takakmastatui. Nú pachinmaka juna najanawartin ainiawai:

1. Iwiarnamu najanawartin, nuyá máshiniu enentai juamunam, uchich tuakmanum, irutkamunam ii nunke úuntrijai nuyá aents matsatainia.
2. Ákik máshiniunu ajapeamu pénger jukitniunam nuyá itiur takakmatsata nuna iwiarnamu.
3. Úunt naamkaru ii nunke jukiertin nú itiur akikia umuchkata nuna yainktiniaiti.
4. Máshiniunun emtikiatniuiti tuke paant juamujai, takat juamu etsérak nuyá aents pujuinia takatri iirsamu atiniaiti.
5. Aents matsatainia unuimiaktinian nuyá itiur ujanaiktiniait nuna emtikiatniuiti.

Juna takata emtikiatsa tuakar chichama jukiartiniaiti, iíncha matsamiartiniaiti, tuakma átiniaiti, náamkaru pujuartiniaiti, anintrutai tuakmash átiniaiti, intrí nuyá chíkich aentsu umuchinia pachintuaktiniaiti.

Akánu 101.- Tuakma ankant nii úuntrijai takakmainiaka máshiniunu atiniaiti tura nusha ankant chimpi ikiursamu atiniaiti pachinkiat tusar, enentai apujas nisha ée nuyá

atsa tama emtikiat tusa.

Akánu 102.- Núa, aishmank Ecuadornumia aránt chikich nunka pujuinia nusha, ninkimias nuyá tuakar, takata najanawar emkatniu tui tuinksha awastin ainiawai nusha umitiai tana aintsank.

TÉSAK AINTIUK

Nákak máshiniu

Akánu 103.- Máshiniu pénker iwiarnatra jukítin juamuka máshiniu najanatin nekaska chichma iwiarin umitiai najánin ainia emkaka timiatus juarkiartiniaiti. Nú najanátniuka nekáska ajápin ainiana nuka atsáa nuyá jimiará ewej washimramu jea anújmamkaru ártiniaiti. Yá nuna kara atia nuka amiktinian washim yarush nawe tsawanta takakui tura nuna amikchamtainkia yaunchu najánamua nuke imiatus atatu.

Umitiai najannakuinkia, ii nunké úuntri najánamun iwiarnatniuiti tura takamtsukka tsurinchatniuiti tui imiancha najanmuit nunak iwiarnatniuiti.

Umitiai juní najannatniuiti tusar chicham juukar awamunam aents nuna yainia atiniaiti nuka chikichik washimramu aents anámtainiam anújmamra atiniaiti. Nuna chicham amiktinian iwiarin áinia chicham juukar awasma ítsuk chikichik uwi ejémtainkia máshiniu anintrusma atiniaiti anaitiai pemkaru ainiaka yarush aents pemraru ainiawai. Nuna aujmatuk pujuiniamunam chikich aujmatma achatniuiti.

Akánu 104.- Anaimiata chichamruinia anintrusar áyu

tumamtiktinian untsunkartiniaiti nekaska Ecuador nunka úuntri utsúk:majai, kanakar tuakma najanainia nuyá aents tuakarma áinia nú seammiajai.

Ecuadora úuntri anaimiatai chichamruinian untsunkata titiniaiti anintrusma atí tusa, warinkish uyumamujai métek.

Aintsank ninki tuakar irunraru áinia nusha nii utsumamurijjai métek seamiartiniaiti, aents anintrusar takat emtikiatati tama.

Aents máshi ii nunken pujuinia ausha utsumamu akuinkia untsunka seamiartiniaiti anintrusma ati tusa. Máshiniunu untsunka akuinkia aents unujmamraru ajaprutain tusa ainiawai nuka ewéj washimramuri atiniaiti nuyá warik chichamnaitkiuinkia náwe washimramu atiniaiti.

Ecuadornumiainiat yajá nunka wekainiana nusha ewéj aents washimramu nekapak tuakar anintrusma seamiartiniati ii nunken imiancha akui iwiarnarat tusa, nii pujamuri tesaramujai métek.

Ninki tuakar anintrusma ati tusa seamainiaka akikmaktin warinmaksha takakmamunmanka atsá timiaiti antsu umitai papi kara atiramun tana nújai métek takuinkia ankant susamu atatui.

Tura anintrusma émamkes ayu tama atí takúr Corte Constitucional umpuarmar pai pénkeraiti timia atiniaiti.

Akánu 105.- Aents Ecuadornumia imiantri takáka nuka úunt iniaikiamua nuna chichama jurus ajapamnaiti, jikminiaiti.

Jú jiki ajapatin tamaka chikichik uwi ejemtai chichamka juruktiniaiti tura chikichik uwi amuktin taasmanum. Nii takakmaurinkia chikichiki jikir ajapamu atiniaiti.

Jiki ajapatin seammaka atukma átiniaiti aents tuakma náwe washimramu ajapin áinia ejekartiniaiti. Ecuadora úuntri ajapatniuitkiuinkia náwe ewej aents ajapin áinia atuamu atiniaiti.

Akánu 106.- Anaitiai chichamramu, Ecuadora úuntri enentaimmia neká turutskesh ninki iruntrarú áinia nú, seámmajai anintrusman untsuamkatniuiti náwe ewéj tsanwant tesamutin, úunt ajápatniun, tura ayu titinian, ujuk náwe tsawantin najanatniuiti.

Umitiai papi ayu titinkia, úunt ajapniuka, anintrusma najanatniuka núkap ajapramu atiniaiti, antsu úuntri ajapatniuka nunschaiti, ajapin áinia núkap tuiniakuinkia wárik atiniaiti.

Máshiniu tamaka útsukma atiniaiti tura wárik yainkma. Tura úunt ajapatniuitkiuinkia warik najanamu atiniaiti tura amítiai tana aintsank chikich ekentsamu atiniaiti.

Akánu 107.- Ákik ajapruatniua nuka tui tuakar najánainia nuke akikri akántukar najánamu atiniaiti; tura antsu Ecuadora úuntri najánkuinkia máshiniu nunka ákikri ana nújai najánatniuiti.

TÉSAK EWÉJ

Enéntai júinia iruntramú

Akánu 108.- Anamatai iruntramú tura uchich iruntramú

áinia nuka máshiniunuchuiti, nuka yá tuakaruit núnak ainiawai, nuka aents tuakar seámmia ainiawai, ni enentaimmijai, itiur junakit tusa enentaimias najánawaruiti nújai métek nusha surímkiachmaiti.

Ni iruntramuri, akantramuri, umuchmari máshiniunu atiniaiti, tura nammanusha máshi pachikma atiniaiti, tura aintsank nú aishmank pachinkiamu atiniaiti. Úuntrisha pénker eakar anaikiamu atiniaiti numtak tuatai najánawar anairartiniaiti.

Akánu 109.- Anáimiata tuakma áinia nuka máshiniunu atatui, nii amitiari najátamu atiniaiti, Ecuadora úuntri takamurijiai amiktin enetai jusamu atiniaiti nuyá nuna atuiniasha aents perma atiniaiti. Tuákmaka úunt namkatin enetai jusamu tura aintsank yajá nunka aents yujainia nú tuakmash atiniaiti.

Nú tuakartinnia tura anamkartinnia amiktinniaka máshiniu najatkamu ártiniaiti tura nuna jeainiachuka chikich iruntaijiaish tsaninkiar juarkiarminiaiti.

Tura tuakma áinia nuka enentaimmia etserkartiniaiti, tura itiur yaimkiartata nunasha aintsank, nuka nii iirkari nekatairi, tarachri, tura itiur iirkait nuna nekarawarat tusa najátmatin ainiawai, nuka aents urútma tuakaru áinia nújai métek atiniaiti.

Akánu 110.- Namtai úunt tuakma nekámu tura uchich tuakma áinia auka pachintuunia tura ikiakainia ákik apujtusar emtikma atiniaiti, amitiainiam tana nuna amiak ii nunkén ákik tesaramu atiniaiti turasha iirsamu atiniaiti pénker umuchkamu ati tusa.

Uchich namtai tuakma áinia au ewéj washimramu jea ajapruamu takákna auka úunt tuakma anamtai tana aintsank ákik tesáramu atiniaiti.

Akánu 111.- Námtai chichamramu ana nui námtai uchich nuyá úunt tuakma áinia nuka nui anujmamka atiniaiti.

TÉSAK UJÚK

Enentai juinia pachíntiamu

Akánu 112.- Uchich tura úunt tuakma namtai áinia tura tsaniaku áinia ausha nii atuinia pachikiartiniaiti nuyá anaikiatniunam pachinkiatin ainiawai pachitkiachu ainiasha namkatí tusar namtai tsawant jeamtai.

Uchich anamtai tuakma ainia auka pemkaru atuinia nuu yainkma artiniaiti nii pujakmarinik uwéj washimramu aents nuyá nuna nunkachikia achamniaiti.

Ya namkatsa pemkatniu seamainia nuka itiur takakmasartata nuna iwiarnarman namtai chichamramu irunna nui awasartiniaiti juni takakmastatjai namkanka tusar.

Akánu 113.- Jú anamtainiam núa nuyá aishmank pachinkiachmin ainiawai:

1. Yá ii nunke takakmatairi takakmastasa papi kuesmaruit nuwaiti, aents nekamu nuyá nekachma turutskesh aparimkia ainia nú, nusha aya takat máshiniu najanatniu nukete turutskesh yawii entsari jusatsar takata achikiu ainia nuwaiti.
2. Yá imitmakmatai asutiatin tusar chicham jurusar papi

iwiartukma áinia nú turasha pénker nekámu áinia nuwaiti.

3. Yá uchi yajutmarar akíkia iniankatainiatsu nusha aintsank.
4. Chichama juinia, nuyá chichama kara atirin áinia nuyá namtai chichamramunam takakmainia áinia au namtainiam namkatsa pemkachmin ainiawai tura nui pemkattsanka ujúk nantu iniaisa atiniaiti nii takatrin.
5. Tura aintsank chikich nunkanam ii nunké takakmauri áinia ausha anujmamkachminiaiti, nusha antsu ujuk nantu takata iniaisaka penkamniaiti.
6. Takakmau warik namtai umuchkiamnia anamkaru ainia nusha, nuyá anujmamma jeachmanumak takata iniaisaka anujmamkamniaiti. Tura chikich takakmau ainiaka nuyá unuikiartin ainiaka pachinkiatniuiti namtainiam tura ankant susamu atiniaiti akikchajai urutai anujmama nuyá juarki anamtai amuwa timianai tura anamtai amukamtai ataksha takatrin enkematniuiti nuyá anaikiamka timiatai takatri amuktiniait nui. Tura antsu uchich tuakmanum anamkara nuka nunischaiti, takatri takakmayiat anamkamunmash takakmaki weminiaiti.
7. Yá úunt anamka emesmakunam pachiniak takakmasuit nuka pachinkiachminiaiti.
8. Suntar nuyá pushu suntar takatan juinia nuka anamtainia pachinkiachminiaiti.

Akánu 114.- Ajapruar anaikiamu ainia nuka chikichki

anaikiamu atiniaiti nú takatnumkeka tura antsu chickich takat jukitniuitkiunkia takakmamunka iniais chikicha anamrukminiaiti.

Akánu 115.- li nunké, etserin áinia nuni, máshiniu namtai áinia nuna ankant susatniuiti nii anaimmian takakmastinia etserak anamtairi pénker etserak jukit tusa. Tura aintsank namkatsa tuakarua nuka nii enentaijiaink chichama, chicham etsertai áinia ai awaschatniuiti namtai juinia nuwaiti chichaman iniankatkiartinkia.

li nunke imiantri áinia nuna namkatsa pujuinia achikchartin ainiawai, nuyá jea ainia auncha antinchartiniaiti nuka suritkiamuiti.

Yá nuna aminiatsu nuka amitiai tana nujai métek asutiamu atiniaiti nusha warijiai nuna amikcha nujai métek iirsar najátamu atiniaiti.

Akánu 116.- Untsuri aents anaikiatniunmaka, amitiai tana aintsank métek akantukma nuyá ankant ajapruamu susamu atiniaiti aishnank nuyá nuasha aintsank, tura nunka tesaramu áinia nújai métek akantukma atiniaiti.

Akánu 117.- Anamtai chikichik uwi taásmanum anamtairi juamu amiktin umpuarma nú yapajiachminiaiti anamkatin juamunam.

Antsu anamtai amitiairi jukimiua nui imian junakchamniaitkiunkia yapajiamniaiti turasha nuka papí umpuarmaka amitiai juamun chichamrin nekaska umpuar pai titiniaiti núsjai anammaka jukimiu atiniaiti.

AKANKÁMU JÍMIAR

Umitiai najántairi

TÉSAK CHIKÍCHIK

Úunt Iruntai

Akánu 118.- Umitiai najánamu awájtin ainiawai
Úunt iruntai najánamu ana nuni jukiartiniaiti, umitiain
awájtin takakmasartiniaiti aintiúk uwi pujusartiniaiti
anaikiamunmaya juarki.

Uunt iruntai ana nuka chikichkiti nii takat juamuka
tunkiniam ati timiaiti.

Tura utsumamu akuinkia ii nunké tuakma ana nui tuinksha
iruntratniuiti.

Úunt iruntai tuakmanumka ju pachiniainiawai:

1. Nawe ewéj awájtin mash ii nunké anaikiamu atiniaiti.
2. Jimiar awájtin chikichik nunka tuakmajai métek atiniaiti
nuyá jimirá washim amuchat aents tuakma akuinkia
chikichik patásrik anaikiamu atiniaiti, tuakma aentsna
nekatai yamaipiat najanamu ana nujai métek.
3. Amitiai papi amimtikiattaiwai itiur nunka tesamujai
métek anaikiatniuit nujai métek nuyá yajá nunka aents
wearua ausha akanturmaiti aintsank.

Akánu 119.- Awájtin namkatsa wakerakrikia ii nunké
ekuaternumia átiniaiti, náwe yarush uwi iniankakin atiniaiti,
nuyá warinsha tsurinkiamuchu ankant átiniaiti.

Akánu 120.- Úunt iruntai tuakmaka jú takatan nuyá

amiktinia takakeawai amitiainiam tana nuna íniankasank:

1. Ii nunké úuntri anamtai chichamruinia ju awakmakai tamajai ekenas ikiuktniait nuyá aintsank patatkarincha aintsank. Namka ekentsartinkia tsawant jimiara nawe yumi nantutin urutai anaiya nui.
2. Anamkaru áinia nuna iniashnum imiatik wainkiamtai amitiai tana nujai métek takakmaki wechamniaiti titiniaiti nuyá ankant ikiukiartiniaiti.
3. Úuntri patatkari núkap tamma akuinkia úuntri etserkamtai anaik ekentsatniuiti.
4. Uwijiai nekapek ii nunké úuntri takakmasma etserkamtai amankes tishipias iistiniaiti penkerashit tusa tura nii itiur iisa nuna etserkatniuiti.
5. Amitiaia papi umpuarma ana nú iwiaratniunam pachinkiatniuiti.
6. Jiktin, iwiaratin, yapajiatin nuyá ánkastin amitiai papi nuyá nekaratin máshiniu.
7. Najánatin, iwiaratin nuyá imianchaka atankitin amitiai tana aintsank, nuamtak tuakar takata juinia nújai métek.
8. Ayu tura nekáskechuiti tiartiniaiti yajá nunkanmayajai chicham yukimiu nusha nii najanatniuitkiuinkia.
9. Úunt namka takat juamun iirsatniaiti, namtai takata juinia nunasha, máshiu nekámu ati tusa takarainiancha nuyá aents mashiniu juiniancha nuyá chikich

mashiniunu juinia nunasha, nuyá ii nunké takauri ainia nunasha najanatniuitkiunkia.

10. Úunt nuyá patatkari takata imiancha juakuunkia tuakma menaintiu akankamu asutniati tuiniakuunkia takata juarkiartin ainiawai asutnia ati tusa amitiai tana nujai métek.
11. li nunken waimiaku iniaikiamun ni chimpiri takata jukit tusa ekentsatniuti, ayamkartutai chichamrinniasha, ii nunken takat juamun iinniasha, máshiniu ayamrinniasha, akíkie nantuje chichamrinniasha, tura anamtainiam takata jukiartinniasha, papi nantuje ujuiniancha, nuyá aents másh pachinkiar takata jumamtikiainiancha ekentsartin ainiawai.
12. li nunke akikri iwiarar jukitniun ayu penkeraiti tusa umpuartiniaiti, tumash núkap wenk tusa tura nú umuchmancha iistiniaiti.
13. Amitmaku nekaschaitkiunkia tsankuratniuiti, nekás aents urukuit nuna iis, nii takauri tuakma jimiara menait akankamu akui. Tura antsu ii nunké takauri áinia nuwaitkiunkia tsankuramu achatniuiti, tura aintsank máshiniunu imiancha amajsaitkiunkia tsankurachma atiniaiti, aentsu emenkakauitkiunkia, maitkiunkia nuyá chikich chicham juamu emesmakuunkia.

Akánu 121.- Úunt iruntai nii úuntri nuyá patatkari iniaikiatniuiti jimiara uwiniu nuyá ataksha áwakeasank anaikiamnaiti.

Patátkari aniaikiamuka itiur aniaikiamuit aintsank takatcha susamu artiniaiti nii taamainiakuisha turutskesha takatan

iniaíyajai takuisha. Úunt iruntai ankant akuinkia aimrattui tsawant taasainia nujai métek aniaikiamu tsawantri amikiat tusa.

Úunt iruntai ankant aaintrin nuyá nuna patakaríncha anaikiatniuiti takat juamu aártinian.

Akánu 122.- Takat nankamaku juamunka úuntri nuyá jimiará patatkari jukiartin ainiawai nuyá aintiúk atuari áinia nuwaiti tuakar iniaikiarma awájtín máshi tuakma iruntrarunam anaimiaku ainia nújai métek.

Akánu 123.- Úunt iruntai juamuka tunkinmaiti untsunkachmajai nawe aintiuk tsawant ámanum yumi nantutin tuatan juarkitniuiti warí uwitinia anaikiamuit nujai métek. Nuka tuakartatui iruntaijjai métek tura warik iruntaincha aintsank uwijjai métek chikichkimias jimiará ayam takusartiniaiti. Úunt iruntai irunmaka paant máshiniu amajsamu atiniaiti antsu amitiai tama amiak itiur jukitniuiti nuna amiktiniaiti.

Ayammanumka tuamu juamu úuntrinkia ninkisha turutskesha núkap seamainiamujainsha nuyanchuka Ecuadora úuntri seammajai wárik iruntai untsunkatniuiti wariniu irunturtinia utsumaj nujai métek.

Akánu 124.- Awájtín áinia nawe washimramu tuakma nuu namtainiumak jeainiaka tuakar iruntrartiniaiti, tura nunis tuakma jeachuka chikich ainiajai tsaninkiar tuakartiniaiti.

Akánu 125.- Nii amiktinrin najaneak, tuakma juamuka tuke pujuriartinian anaitiurtiniaiti nuinkia mash anaikiamu pachinkiartiniaiti. Umitiai nunaka urutma artiniait nuna tawai tura wari takatna najanawartiniat nunasha aintsank.

Akánu 126.- Awájtin Tuakma juamau takatri najanuk amiktinri umitai tana nújai métek jukiartiniaiti. Umitia iwiaratniuitkiuisha chicham juamunam tuakaru áinia nuka núkap ayu tiarma atiniaiti.

Akánu 127.- Awajtín anairamu núa nuyá aishmank áinia nuka nii takatri juamuka mashiniu yainktin enentaijai atiniaiti, máshiniu enentaijai tura najánmarinkia itur najána nunaka neka artiniaiti, nii amiktinri iturampait nújai métek takata jukiartiniaiti tura takat jukimiun juni takasjai tusa nii úuntri ujakartin ainiawai.

Awajtín núa nuyá aishmank áinia nuka juna najanachartin ainiawai:

1. Chikich takat máshiniu tura ankant ainiamunmasha takakmaschatin ainiawai, antsu úunt unuimiatainmaka takakmasartin ainiawai ankant akui nii tsawantri ankant akuinkia.
2. Amastai warinksha tusa chichamrukchatniuiti turutskesha ii nunke akikri umuchkachtiniaiti, tura antsu tuakar chicham jutainiam akik ana nunaka umuchkamniaiti.
3. Takata achirak chichamruk susashtiniaiti.
4. Chikich akikian achikchatniuiti tuakma chichamramu susachmanka.
5. Anaikiar, takat susam, nuyá chikich takat akikmajai íniamka amikchatniuiti máshiniu ii nunkenú takatrinkiuinkia.

6. Chikich takat juamu akuinkia pachinkiachtiniaiti ii nunke takatri juamuitkiuinkia.
7. Takat achikman najanachtiniaiti chikich takat máshiunu takat juramuitkiuinkia.

Nuna amiachuka anaikiamurin emenkaktatui nuyá umitiai umpuarma jeareatsui awajtinia najantairi ana nunis achattawai.

Akánu 128.- Awajtin núa nuyá aishmank takat juamuka atukma ainiawai warinkish aran wekas nii nunken chicham nuyá takat jukimiua nusha pénker iirsamuiti, tuituinksha wekas takatnaka najanatniuiti.

Warinksha awajtin núa nuyá aishmak chicham itiurchat niniu najanatsa wakerakrikia tuakma ankant seamu nuyá susamu atiniaiti, antsu chikich enentainkiuinkia ankant iniaitiusma atiniaiti. Tura nuna chicham najátu seammia menaint nawe tsawant nankamas aikchamu weakka nakak ayu timia ainis juawai. Tura nuna najatainiakuinkia takatri tsuríntsamuk atiniaiti.

Tura sepúnam enkeamu atiniaiti chicham másh amirnakma jeamtai turutskesha amikmaku pénker nekanamtainkia. Tura chicham itiurchat namtsuk juarkimiu emtuki weakuinkia chichama iwiarin seamniu nuna ewejen juawai nuni chichamri ejeturma ati tusar warinia imitmakuit nújai métek.

TESAK JÍMIAR

Uunta takatri iirin

Akánu 129.- Úunt tuakmaka Ecuador nunka úuntrin nuyá patatkari asuttiatniun takata jukitniuiti ju enentaiijai:

1. Ii nunke imiantri pénker iirtsuk ayamrukchamtai.
2. Ukurkamtai, kasamkamtai ninki kasamak kuitriniamtai.
3. Emesmakmatai, nankamas asutiamtai, aentsu emenkarmatai, aentsu achik waitkiasmatai, nii iruntramurijai chichamen juak aentsu yajauch amajramtai.

Nú enentai juruiniakka chichama jurus eseetin áinia nú ayu timiajai juarkitniuiti, turasha sepunam enkeatniuka jukishtiniaiti.

Tsawantrí tesaramuka tsenken nawe jimiar tsawant akantsamu ankant susamujai úunt tuakmaka pénker iiras súmamtikiatniuiti itiurchat najánamun Ecuador nunka úuntri awantsamunka.

Asutniatin tura jikir ajapatin akuinkia úunt tuakma juinia nú jimiará menaint tuakma ayu tusa ajapruawarmatai najanatniuiti. Tura antsu imitmakma nekarnamtainkia nuna umimtikniu ewejen juaktiniaiti nii másh amirkat tusa.

Akánu 130.- Úunt tuakmaka Ecuadora úuntrinkia ju itiurchatnum ankasminiaiti:

1. Amitiai umpuarma ana nuna amitsuk nii enentaimmiajai takata juakui, nusha nekasenk jutai jua takui.

2. li nunken itiurchat akui, aents nukap wajarmatai.
Tsawantri tesaramuka tsenken nawe jimiara tsawant akantsamu ankant susamujai úunt tuakma pénker iiras súmamtikiatniuiti itiurchat najanamun Ecuador nunka úuntri awantsamunka.

Asutniatin tura jikir ajapatin akuinkia úunt tuakma juinia nú jimiara menaint tuakma ayu tusa ajapruawarmatai najanatniuiti. Tura antsu imitmakma nekar ajapnamtainkia patatkari úunt ajawai.

Jú takatka chikichki najanamun atiniati chikichik menaintu uwi amiakui.

Tsenken tsawant jeamunam anamtai chichamruinia nú ankan juakai tamajai untsamkatniuiti yamaram anaikiatniun nusha aya tsawant taatsainia nujai metek.

Tura nuna namkattana nunaka úunt iruntai ekentsatniuiti anamtai chichamra urutma tsawantna anaimiaka nujai métek.

Akánu 131.- Úunt tuakma chicham juruktiniati tuakma aintiuk akankamu métek jeakui nuyá amiktin tama nuna amiachkui nuyá amitiati umpuarma imian juakui takauri áinia nuna (ministros) nuyá iwiarniu úuntri, akik umuchma úuntri, aintias inia úuntrin, aentsu ayamrinia úuntri, akikia úuntrin, ananmtai juamunam pachiniainian, aents pachiniamun iinian nuyá chikich úunt amitiati tamajai métek anairamu áinia takata imian juiniachkui.

Asutniatin tura jikir ajapatin akuinkia uunt tuakma juinia nú jimiara menaint tuakma ayu tusa ajapruawarmatai najanatniuiti. Tura antsu imitmakma nekarnamtainkia

nuna amimtikniu ewejen juaktiniaiti nii mash umirkat tusa.

Ajápeamujainkia uuntka warik ajapar chikich anaikiamu atiniaiti. Tura nú ajapma sepunam wetiniatkiuinkia úunt nuna ínia ewej juaktiniaiti.

TÉSAK MENAINT

Umitiai najanniu najántairi

Akánu 132.- Úunt tuak máshiniunu imiant ainia nunak awájturtiniaiti. Úunt tuakma umiktinrinkia umiktin umpuarma jinkichminiaitkiuinkia ayattik ujumek awajturmajai takakmastiniaiti. Nuka juni akui:

1. Niniuri umimtikiatniuiti nuyá umitiai áinia nuna atuktiniaiti.
2. Imiancha nájanun chichama juruktiniaiti nuyá asutiatniun eatkatniuiti.
3. Najánatniun, iwiaratniu nuyá jurustinian takakui warinmaksha akik apujsatniun turasha ninki tuakar nii enentaijiaink takakmainia atantsuk.
4. Amimtikiatniun, takamtiksatniun nuyá ninki tuakar iruntraru ainia nuna niniunak iisarar tusa.
5. Itiur ii nunken takakmastiniait nuna iwiarturtiniaiti antsu uchich tuakma ainia nuka ninki imiasartiniaiti.
6. Ii nunken takakmauri áinia nuna ankanta susartiniaiti nii itiur takata jukiartiniait nújai métek takata jukiarat tusa, iniankakka untsukmajai najamtikiawartiniaiti.

Akánu 133.- Umitiai ainiaka nantuje nuyá akantramurisha nekas ártiniaiti.

Amiktin iwiamnia:

1. Takakmatai amitiai tamajai métek uraimiua nú.
2. Máshiniu imiantri enentai jea nuwaiti nuyá umitiai umpuarma tana nújai métek.
3. Ninki tuakar takakmainia nuna amiktintri, takakmastintri, tsurintri nuyá utsuari.
4. Namtai iruntraru áinia nuna nuyá itiur anaikiatniuit nuna.

Iniakmamu, iwiarma, tsuriamu, enentaimsa juamu umitiai tana aintsank nuka awajtin máshi ayu tuiniakui turatniuiti.

Tura chikich umitiainkia pénker iwiarachmin másh umiktin najantai ainiawai, timia nuka nunisank atiniaiti.

Akánu 134.- Umitiai umpuartaasa itiur juarkitniuit nuka umitiai tana nunisaiti júnis:

1. Awajtin áinia nuka nuamtak tuakaru áinia nú iruntrar juarkiartiniaiti ewej akantukma úunt tuatainmaya.
2. Ecuador nunka úuntrisha awastiniaiti.
3. Tura chikich takauri nii amiktin ana nújai metek.
4. Amimtikin, Takat juamu iin, Aents tuakma ayamrin,

niniu umiak umitiai tama najana awastiniaiti.

5. Tura aents Ecuadornum pachitkiainia imiantrinch takacha áinia umitiai junis achaintiash tusa nii enentaimmia najanawartiniaiti nunash másh aentsu enentai jea atiniaiti nuka anain nuyá ajaprin áinia nú utsukma atiniaiti.
6. Ya nuna umitiai najána awasa nuka úunt tuataniam jea ninki ayamruktiniaiti juni asamtai najánamjai tusa nuyanchuka yaksha ayamra atiniaiti.

Akánu 135.- Aya Ecuadora úuntrink umitiai najána awastiniaiti akikna áinia nunaka, ákik ikiaunkatniunka, iwiaktinniaka nuyá itiur ii nunke takakmasma atiniait nunaka.

Akánu 136.- Umitiai aarmaka chikichki enentainiuk atiniaiti, tura úunt tuakma úuntri susatniuiti, tura chikichkimsa akantramuri áinia nusha paant ártiniaiti, tura yamaram jinkiuinkia chikich yaunchuyanka ankant ajakar wetiniaiti. Tura nuna pénker amiachkuinkia takat juarnakchatniuiti.

Akánu 137.- Yamaram umitiai jimiará iruntramunam awajtiurma atiniaiti. Úunt tuakma úuntri, umitiai tsawant tesamua nújai métek másh awajtinian susartiniaiti, tura másh nekawarat tusar paant amajsamu ártiniaiti, tura wariniuit nuna iis yaa iisartin áinia nuna susatniuiti nú émamkes nuamtak tuakaru áinia nú iistinian juarkitniuiti.

Aents núa aishmank másh ii nunke pujuinia nusha nii enentaimmiari uyumamuri imian jeachkuinkia, enentaimmia awástiniati, pachikma ati tusa.

Umitiai umpunramtainkia tuakma Ecuadora úuntrin akupkatniuiti, ayu nuyanchuka imianchaiti titi tusa. Tura pénkeraiti takuinkia menaintiu nawe tsawant jeamtai Ecuadora úuntri awajtiurma jiktiniaiti.

Akánu 138.- Ecuadora úuntri imianchaiti takuinkia chikichik uwi tesaramujai ataksha iwiarnartiniaiti. Nú nankasmatai úunt iruntramu ataksha chikichki jianaitkiamunmank umpuartiniaiti tura nakak awájtiuma jinkiti tusa seamtiniaiti.

Antsu umitiai atenkar imianchaitkiuinkia tua imianchait aya nunak iwiar nakuertiniaiti.

Úunt tuakma emamkes iistiniaiti tua iwiaratniun Ecuadora úuntri iniakmasuit nuna menaintiu nawe tsawant tesamujai, chikichki jianaikiamu atiniaiti, nusha núkap tuakaru atiniaiti nú umpuamunmanka. Tura yamamtaik ayu timiancha awakeki iistiniaiti núkap jimiará menaint aents tuakmajai.

Mai apatak tuakmaka awajtiurma nakak ati tusa akupkatniuiti paant awajnasat tusa. Antsu úunt tuakma nu tsawan tesaramunam nuniskechuitkiuinkia Ecuadora úuntri awajtiurma nakak jiktiniaiti.

Tura amitiai tama ana nújai métekchaitkiuinkia emkaka urukamtai imianchait nú iintsatniuiti.

Akánu 139.- Ecuadora úuntri takat nájanma nekaskechuitkiuinkia umimtikin junis atí timiajai takat junaktiniaiti, nunaka menaintiu nawe tsawantnum najánatniuiti.

Antsu nú turamunam tii imianchaitkiunkia jusar ankant

najáñar ikiusma atatui, antsu iwíaramnaitkiuinkia úunt tuakma irunar iwíaratniuiti tura Ecuadora úuntri asutiamu atiniaiti, tura iwíarin chichak nekaskete pénker najánui takuinkia úunt tuakma awajtiurtiniaiti.

Akánu 140.- Ecuadora úuntrinkia úunt tuakmanum umitai najánamun akupkatniuiti akikri itiura atata nuna. Úunt tuakma iwíaratniuiti, pénkeraiti titiniaiti turutskesha atsa timiniaiti menaintiu nawe tsawan urutai achikiuit nuyá juarki.

Jianaitkiatin, iwíaratniun nuyá ayu titinian untsuruktiniaiti nekas iruntain tsawant nui tesamua aintsachu. Nú iisar amiachmanumak Ecuadora úuntri chikich umitai aar ataksha akupkashtiniaiti, antsu wárik chichamaitkiuinkia najánamniaiti.

Antsu nú tsawant tesamun úunt tuakma ayu tachakuinkia ákik chichamnanka Ecuadora úuntri umpuarma Najána takata jukimniaiti, awajtiurma pénker najána. Úunt tuakma warinkish nunaka iwíaramniaiti turutskesh yapajiamniaiti, umíktin umpuarmajai métek.

AKANKÁMU MENAINT

Unta Najántairi

TÉSAK CHIKÍCHIK

Iruntramu nuyá najánmari

Akánu 141.- li nunké úuntrinkia takata jukitniuiti máshi yaimkiatin enentaijjai, niyaiti ii nunke úuntri, iniamin, iya, nuyá takat juamu másh iistin.

li nunke chichamraka junis tuakaruiti, úuntri nuyá patatkari, nuyá aintsank atuintri irunui, nuyá chikich tuakma utsumamu áiniana nuwaiti, nuyá aintsank nii utsuin ainiawai, iwiarnatrtin, umuchkatniun, nuyá pénkerash junaki tusa iisartinian takata najánawartiniaiti ii nunken takat juamu pénker ati tusa.

Akánu 142.- li nunke úuntrinkia Ecuador nunkanmania atiniaiti akiniamunmayank, menaintiu nawe ewej uwi takaku atiniaiti, ankant najánamnia niniuri ana aintsank, nuyá umitiai aarma ana aintsank atiniaiti warinsha suritkiachma antsu nuna amiachkunka iniaikiamu achamniaiti.

Akánu 143.- Ecuadora úuntri tura patatkari anamkataj tauka nú anujtainmank pemkatniuiti. Úuntri tura patatkarinkia, nukankap ajapruamu atiniaiti anaimiaktaj takunka ajapruamu imianjai. Emkaka anaiyamunam anaimiakartin pujuinia ajapramun núkap jusacharka ataksha utsumkamu atiniaiti ajapruatin, nuinkia nekas ya awakmaka nú nekanatin núkap ajapruamujai, tsawant aintiuk nawe ewej jeamtai ataksha ajapruatniuiti, nuinkia jimiari ajapruatniuiti emkak ajapramunam ya timia núkap ajapruamuit aya nuke awakmaku juawai.

Tura ajapramunam juarmanumak nuka nukapet ajapruamu jusainia nuka nakak ekemsatniuiti, anaikiamu juawai, nusha aintiuk nawe washimramu jusa nuyá nawe washimramu chikicha ajapkimtai.

Akánu 144.- li nunké úuntrinkia úunt iruntai ayu tumamtiki nankasmatai nawe tsawant nankasmatai takatrinkia juarkitniuiti nui tuke ayamruktatjame tinia iniais. Úunt iruntai tuak juarkimiuitkiunkia, nuyá nii takatrinkia aintiuk nawe ewej tsawant iniaikiamu nankasmatai takatrinkia juarkittiawai.

Ecuadora úuntrinkia aintiuk uwi nii takatri pujustiniaiti, tura ataksha chikichki awakeasrik anaikiamu atiniaiti.

li nunké úuntrinkia ni takakmamurinkia nuyá chikich uwi nankasmatai úunt tuakma ujaktiniaiti nii jinmarin, takakmasmari nuyá nii arant weamurin.

Akánu 145.- li nunké úuntrinkia nii takatri amikiu atiniaiti turutskesh ankant juaktiniaiti ju enentaijai:

1. Nii takatri tsawant tesaramu amik.
2. Takatrun juink iniaiyajai taman úunt tuakma ayu timiajai.
3. Jikir ajapam, umitiai umpuarma nújai métek.
4. Iniashnum itiurchata wainiak takakmaki wetinia jeachuk, tsuakratin nekamu áinia nekas jawai timiajai nuyá úunt tuatai jimiará menaint tuakma pachiniaya ayu timiajai.
5. Takatri etsertsuk ikiukmiatai, nekas amimtikin nekamujai, nuyá úunt tuataisha jimiar menaintiu tuakma pachinmajai nekasaiti timiajai.
6. Imitmakui jiki ajapeamujai, umitiai tana imiatrusank.

Akánu 146.- Nukap tsawant tasma akuinkia nuna patatkari úunt ajas ekemsatniuiti. Nusha jakkesh nuyá chikich najanmajainsha tamkunka nekamu atiniaiti tura menaintiu nantu ankant pujus ataksha iwiartumar pénker ajas waketkitniuiti, nunaka úunt tuatai ankant susamu atiniaiti.

Antsu tuke jinkiuinkia ya patatkarin nú úunt ajas ekemsatniuiti nusha ayatik tsawant urutma tattsa nuna amiktasa.

Tura aintsank ii nunké úuntri nuyá patatkari imiancha najaneakuinkia nuyá jinki ajapnakuinkia nekaska úunt iruntai úuntri warik ii nunke úuntri ajas ekemsatniuiti, aintiuk nawe yarush tsawant tesaramu jeamujai métek, tura anamtai chichamramu áinia nú wári chikich anaikiatniun untsumkatniuiti. Ya anainiakara nú takata juarkitniuiti, tura ishichik tsawant tamsamtainkia úunt irunma úuntrink tsawant tasunka amiktiniaiti.

Akánu 147.- li nunké úuntri takat jukitin tura amiktintri umitiainia arma áinia nuyásha ju ainiawai:

1. Umitiai aarma nú umikiar nuyá umimtikiatniun, umitiai, tura chikich arantia umitiai ainian, nuyá chikich umitiai nii takat juamujai métek irunun.
2. Úunt iruntainiam itiur takatri jukittia ii nunké emtikiatniua nuna ée tuke ayamruktatjai taku awastiniaiti.
3. Itiur takata jukiatia nuna Najána takamtiksattawai máshiniunu ati tusa.
4. Takat iwiarnattai juamunam úunt tuakmanum awastiniaiti nui ayu timia ati tusa.
5. Takat juamu emtikiatniuiti tuakmarijiai métek, amitiai najatkatniuiti, pachitkaiainianu, tuakmari, iwiaratniun, nuyá iistinian.
6. Najánatin, iwiaratin nuyá jurustin atuin áinia nuna nuyá

chikich chicham jimiartutai áinia nunasha aintsank.

7. Uwijiai métek úunt iruntainiam etserkatniuiti nii takamasmarin umiktin nuyá enentai jusamu ana nújai métek wari uwiti métek amiktiniait nunisank.
8. Ii nunke akikri uwijiai métek itiur umuchkatniuit nuna ejek úunt iruntainia akupkartiniaiti iis ayu tuiniakui takat juarkitin.
9. Iniaikiatin, jiktin atuin ainia nuna nuyá chikich yaimrin áinia nunasha nii anaikiamua nújai métek anaikiatniuiti.
10. Yaja nunkanmaya enentai áinia nunasha ejeratniuiti tura anaikiar umuchkatin arantia chichamrin nuyá nú enentaijiaink takatan juinia nunasha.
11. Yamaram enentaijiai pachinkiatin umitiai enentai juamunam.
12. Umitiai umpuarma juka imianchaiti tusa chikich enentai apujsatniun tura umitiai iniamratin awajtiur iniaisatin.
13. Umitiai yairach najánkatniuiti iniankatsuk tura timiatrusrik takat najánatin.
14. Untsumkatin anintrusma máshiniunu aimkiata tama nuyá umitiai ana nújai métek najánatniuiti.
15. Úunt Túatai untsumkatniuiti imiatrus nuyá warikmasar iruntain chicham imian wariniua aujmitsatin wakerajnia aintsank.
16. Paant iisma atiniaiti suntar tuakma nuyá pushu suntar

tuakma nuyá úuntri áinia nusha anairatniun.

17. Pénker pujusarat, itiurchat aink tusa iistiniaiti, itit aink tusa máshiniunu pénker wainiaikartai tama nuyá aintsank másh nunkanam.

18. Pachischatin, Ikiakamu, yapajtiuatín, asutiamu akusha umitiai tana nújai métek.

Akánu 148.- Ecuadora úuntri úunt tuakma aun amukminiaiti nusha nii umiktinian najanchakui, nuyá umitiai tana nújai métek juawai tura úuntri takat jukitniu umpuarchamtai, tura núrante ajakar weakuinkia uchichikia núkap kakaram atiniaiti.

Ju takatka chikichkí najánamu atiniaiti menaint uwi amiakui.

Tsenken tesaramu ajapamu tsawant jeamtai, úunt tuakma nunisank ataksha iruntan juarkittiawai turasha chikich anaiyamunam.

Úunt iruntai tuak pujuinia Ecuadora úuntri chichama ejetur ákik, tura aintsank umpuarma juaktiniaiti.

Akánu 149.- Ya ii nunké úuntri patatkari júa nusha nunisank amiktrintri takakeawai, suritkiamu, najánatniun takakui úuntri takatria aintsank nuyá tsawant amiktrintrincha aintsankete.

Tura úuntri takat jukitniua nuna ni juachkuinkia ayatik wari takatna najánatniuit nuna takakmastiniaiti.

Akánu 150.- li numke úuntri pataka núkap tsawant

ikiuakuinkia atuintri úunt ajas ekemsatniuiti nusha ii nunke úuntri iniaikiamu atiniaiti.

li nunke úuntri patakari wari itiurchatjaiya ankant sua nunaka úuntrink nekamu atiniaiti.

Antsu tuke ankant juakuinkia úunt tuatai ii nunke úuntri aents jú achaintiash timiajai ajapruawar aniaikiartin ainiawai. Tura nú patatkari anaikiamu tsawant urutma tamrusuit nuna amiktiniaiti.

Tura úunt tuatai menaintiu nawe tsawant amik jú juakai timiajai aents emak puja anaikiamu juawai.

Akánu 151.- li nunke úuntri atuin (ministros/as) áinia nuka ankant iniaikiamuiti ii nunke úuntri tura enkear nuyá jikmin ainiawai, nuyá akanturma áinia nuka atuinia enentai awai. Tura aintsank nú takat susartinkia pénker iisma atiniaiti tura nuna amiachkuinkia warinksha chicham jurusar umitiaijai asutiatniuiti.

Atuintri ajastinkia Ecuador numia atiniaiti, ankant niniuri imiana takustiniaiti, tura warinksha apapekchamu atiniaiti umitiai tana nújai métek. Nú atuintri iniaiyamuka ii nunke úuntri imian awajtiurma jiktiniaiti anaiyamu tama.

Akánu 152.- li nunke úuntri atuintri ajaschamniaiti:

1. li nunké uuntri nuyá patakari ni shuar aintiuk numpe akanturkma takat susamu achatniuiti.
2. Aents misuram tura nerentin, namkaru áinia nui pachitkia, aintsank juyan, arantia tuakma ai takainia ii nunkejai takata juinia nú achatniuiti.

3. Suntar nuyá pushú suntar takata takaku ankancha áinia nú namkachminiaiti atuintri ajastatsa.

Akánu 153.- Ya atuinrin nuyá timiai niirin takata juinia nuka jimiará uwin nankamaska ataksha iniaikiamu achatniuiti nuyá nui takaurish ahamniaiti, aintsank chikich takatcha atsumniaiti, takat achiktinniash jeatsui, nuyá arant takat juamunam nuish takakmastin jeatsui.

Akánu 154.- Atuari ii nunkenyu umitiai tamanum ana nunasha iniankas juna amiktin ainiawai:

1. Nii takamastintri pénker utsuamu enentaijiai najánatniuiti, umiktinia jiktiniaiti nii itiur takata júa nújai métek jukitniu utsumamu aintsank atiniaiti.
2. Úunt iruntainia nii takat najánamun etserkatniuiti ujakma atiniaitkiunkia nusha nii takatri jukitniua nújai métek nuyá aintsank warinkish imiancha akui chicham juramsha wantiniak ayamrumaktiniaiti.

Akánu 155.- Nunka tesarmajai métek nii atuari takustiniaiti, nii takat júamu chichamruk ayamruk emtiki wetinian nuyá takauri áinia nusha pénker takata jukiarat tusa.

TÉSÁK JÍMIAR

Méteketji tama chichamrin

Akánu 156.- Máshiniu métekraitji tama chichamruiniaka nii ainiawai aentsu niniuri iisartin nuyá umitiainiam tama timiatrusan aentska iisma atiniaiti, arantia aintsank umitiai tamajai métek aentsu niniuri iirsatin ana nújai métek. Nú tuakmaka iwiaratniun takakui, métekrak, wainkiamnia,

jintiasa iismin nuyá nekapmamsa iismin chicham jusámu núa nuyá aishmankna, tarimiat aentsna, tuyampait nuna nuyá aents najántairijiai métek, aents iniashnum imiancha áinia nusha nuyá muchitkiachmin áiniasha umitiai tana nújai métek iisma atiniaiti. Nii takatri amiktasa takakmaurijiai jimiartuktiniaiti nuna unuimiatra áinia nújai máshi úuntrin achimrur.

Akánu 157.- Métekraketji tama chichamramunmanka métek takat susamu atiniaiti aents misuram áinia nuyá aents ii nunke chichamruinijai nuyá naamak chichamrinia emtuktatui. Nui takakmastinkia métek akanturma atiniaiti tumak pachim atiniaiti, máshiniunu, pachiamu nuyá másh pujúinia aunu.

TÉSAK MENAINT

Suntar nuyá Pushú Suntar

Akánu 158.- Suntar nuyá pushú suntar áiniaka ii nunken pénker ati tusar iista timiaiti tura aentsrish pénker matsamsarat tusar wainkiatin ainiawai.

Suntarka nekaska nunka ayamrukta yaksha enkemtuawaink timia ainiawai.

Tura aents pujuiniamunam imiatik aents emesmamu aink tusa iistinkia ii nunke chichamruiniana nuna ainiawai, tura pushú suntar áinia au iisartiniaiti.

Suntarnum nuyá pushú suntarnum takauri áinia auka chikich aents imiantri takakainia aintsank ainiawai, pénker paant takakmamuri amajsatin ainiawai tura aintsank aentsnash arantukartiniaiti tura aintsank takat arantukmajai

pénker jukiartiniaiti umitiai tana aintsank.

Akánu 159.- Suntar nuyá pushú suntar umin artiniaiti nuyá iniamniuka achatniuiti nuyá takatri pénker amikiartiniaiti aents matsatainia nuna yainiak tura umitiai tana nunisank.

Suntara nuyá pushu suntara chichamrin ainiaka umikiartint ainiawai nii úuntri itiur takakmastinia jintia aintsank. Umiktinkia úuntri tama nújai métek atiniati, antar takat suaku turachmaiti antsuka pénker junakit timiati.

Akánu 160.- Aents suntar nuyá pushú suntar ajastasa wakeraka enkematin suritkiachmaiti. Umitiai warinia umiktiniat nunaka iniakmawai nii itiur warikmas iniashnum takaka.

Suntarnum nuyá pushú suntarnum pachiniainiaka amitiajjiai takakmainiawai nii umiktinia nuyá takakmastinia áinia nuna, nuyá aintsank tsawant nankamakui ni waki wetinniash nuyá iniakmamsantai warinksha wararma susatniush métek núa nuyá aishmank atiniaiti. Tura nui takakmaki weti tusa yainkma atiniaiti nuyá unuimiaki weti tusa yainktiniaiti.

Suntarnum tura pushú suntarnum tuakmanum pachiniainiaka nii itiura takakma nújai métek iwiakma atiniaiti, nuyá pujamurinja, nuyá awajtiamusha umitiai tana aintsank, nuyá umirmari nakaschamniaiti.

Suntarnum nuyá pushú suntarnum pachitkiainia nuka asutiamu ártiniaiti chicham najánin áinia nui; emesmakmatainkia nii takatriya nuyá asutiamu atatui suntar itiur asutiatniuit nújai, umitiai najánin áinia nui. Tura amikchamtainkia itiur umimtikiatniuit nú najáta

amirkamu atatui.

Akánu 161.- Suntarnum wetinkia utsúkchamuiti ya wetasa wakera nú wetiniaiti. Arantukmajai najanatniuiti niniuri arantukmajai, juka nukap jintiamu atiniaiti neamtikiatin nuya tuakma penker amajsatin. Juka núkap itiurchatnum enkeamu achatniuiti.

Kakarmajai achikia jukitniuka surimkiamuiti.

Akánu 162.- Suntar áinia auka ayatik ákik umuchman iisartiniaiti nuyá ii nunke ayamrukartiniaiti umitiai tana nunisank ii nunke emtikiatniunam yaimkiartiniaiti.

Suntarka iwiarnarartin ainiawai itiu anearar pujusartiniait nuna najánatin utsumamujai métek. Ii nunké ákik núkapjai yaintiniaiti, pénker iwiarnarar takurmasar unuimiarar ii nunke ayamruktinian enentai ejekarat tusa.

Akánu 163.- Pushú suntarka pénker tuakmaiti misuram aents áinia nunanu, ipiattairtin, iwiarnaru, nánkamantu arantumat, unuimiararu, nukanukap neka, nii takatrinkia aentsu pénker ayamruktiniaiti, máshiniunam pénker ati tusa ankant niniuri ana aintsank takakmantsat tusa ii nunken aents imitmakma aink tusa iisartiniaiti.

Pushú suntar áinia nuka aents arantuktinia niniu ayamruktinia unuimiatra áiniawai, arantunaikiat tusa, wekatus jintiartin, kishmaktinian, maniamu aink tusa iistinian, aents tsankurnairar pénker matsamsatniun.

Nii takatri amiktasa tuakmanum takauri irunna aujai tsaninkiar atukar takata jukitniuiti pénker takat junakit tusa.

TÉSAK AINTIÚK

Másh Wajarchatin

Akánu 164.- Warinksha itiurchat maniamu ii nunkenin, núkap, nuyá itiurchat iwiarachmin núkap ajaki weakuinkia ii nunke úuntri aneartarum wekasairap tusa surimkiamu atiniaiti tura takauri ainiaka takatri tsurinhamnia ainiawai anearma tsawantinkia.

Aneartin tsawantka utsúmamu iyawai nekás nuyá wárik atiniaiti, másh ii nunkenia, enentaimramnia. Nú aneartin awajtiurmaka jeasank atiniaiti tura enentaimramnia atiniaiti nunkenink, urutma tsawantait nújai métek, wari najánatta nusha atiniaiti, iniu seturma nuyá umitiai tana nújai métek najánamu nuyá yajaya umitiai áinia nújai takakmantsatniuiti.

Akánu 165.- Aneartin tsawantinkia ii nunke úuntrinkia ayatik takakmamu setumtikratniuiti tura aents pujúinia emesmakma aink tusa iistiniaiti, nuyá warinksha itiurkachma wekasat tusa nuyá yaksha chichamu iruntratiniaiti, wekasartiniaiti, estermasha ankant atiniaiti nuyá chikich amitiai tana nunisank atiniaiti.

li nunke úuntrinkia anearma tsawant akuinkia juna najánatniuiti:

1. Emkaka ákik jutain juktiniaiti.
2. Tsuamatainiam nuyá unuimiatainiam ákik enketamunka takaschatniuiti antsu chikich áinia nuyájai aneartin tsawantnaka umuchkiatniuiti.
3. li nunke nirinkia, pujakmarinkia tuinksha jukimniaiti

anearma tsawant akuinkia.

4. Chichama etserin áinia nunaka pénker iisartiniaiti chicham nankamancha pénker etserkarat tusa nuyá ii nunke pénker iisma ati tusa.
5. Máshi ii nunke tentakar iistiniaiti warinksha imitmamu aink tusa.
6. Suntar nuyá pushú suntar áinia nuna untsukartiniaiti ii nunke wainkiarat tusa nuyá aintsank takakmau áinia ausha pénker iisartiniaiti.
7. Jintia nuyá nanam wekatai áinia ausha epenramu atiniaiti nuyá aintsank chikich nunkanam nankamataisha epénnitniuiti.
8. Muchítniakat nuyá wekas jukmakma ati tusa untsukartiniaiti utsumnakuinkia nuyá wekantsaink timia atiniaiti nuyá aminkiamtai urantiniaiti.

Akánu 166.- li nunke úuntrinkia anearma awajtiurman úunt iruntain ujakartiniaiti, nakuentrin nuyá yaja iruntramu áinia nunasha awajtiurmaka aintiuk nawe yarush tsawant nankasmatai. Nankámamu imianaitkiuinkia úunt iruntai awajtiurman tsurinkminiaiti tú tsawantinkisha nakuentri tama nuna ántitsuk.

Anearma awajtiurmaka ujuk nawe tsawant atiniaiti, tura nuna núkap ajaki imitmamu weakuinkia ataksha patatsank najánamniaiti awajtiurma najanatniun meniaitiu nawe ekekma atiniaiti. Tura ii nunke úuntri awakeki yamaram umpuarma iyachkuinkia umpuarma yaunchuyanka nankamawai imiancha ajawai.

Yajuach anearma jikmia nuka amukatniuiti ii nunké úuntri juink amuwawai tama awajtiurtiniaiti nusha etserkamu atiniaiti ititurak nankamantsa nuna.

Anearma tsawant awajtiurmanumka takakmauri áinia nuka pénker iisartiniaiti nii takakmamurin warinksha nankamasaink tusa.

AKANKÁMU AINTIÚK

Umitiai Najántairi nuyá Tarimiat Aentsu Umimtiktairi

TÉSAK CHIKÍCHIK

Umitiai takatri juarma

Akánu 167.- Pénker matsamsatin iyamuka aents ii nunke pujúinia pachinkiar jukiartiniaiti nusha umitiai najánamua nújai métek, nuyá chichama nakuen áinia nú pachinkiamujai.

Akánu 168.- Chicham nakuetai juamuka najánatniun umimtikiatin ainiawai nuna umiak juna najánatniuiti:

1. Chichama nakuenka ankant atiniaiti juink ii nunkenkisha tura yaja chikich nunkanmash. Máshi emesmakma ju umiktinium akuinkia ya najanacha nuna umitiainiam tana aintsank umimtikiatatwai.
2. Chichama nakuenka ankant takakmastiniaiti tura akiksha enketamu atiniaiti ninki utsumamujai métek umuchkat tusa.
3. Chikichkimas tuakma áinia nuna niniunak takainiak Chichama nakuen najántairiya nuna

enkemtuachminiaiti chikichkimas nii umiktintri takakainiawai umitai umpuarma nújai métek.

4. Aents chicham juramuka akikchajai atiniaiti, umitiaijai métek tesaramu ártiniaiti.
5. Másh tesaramunam, chicham juramu nuyá itiu júa nusha másh nekamu atiniaiti umitiainiam tana nukete.
6. Másh chicham juramuka tura chikich takat nájánmasha aya chichasmajaink atiniaiti najánatin nuyá umiktintri tana nújai métek.

Akánu 169.- Chicham juramu tamaka aents umitmaku chicham jurukir nii asutniamniashit, umitmakuashit tusa iirma nuwaiti, nuka warinkish akiknumkesh nuyá chikich umitmatainmaksha najánatniuiti. Nuyá aintsank chikichkí nekapsamujaink umirkamu achatniuiti.

Akánu 170.- Chicham nakuetaianiam enkemmak mashiniunu atiniaiti, métekrak, tesaramu, timian niniuri susamu, tsurinkiamu nuyá aents pujuinia pachinkiamu atiniaiti.

Nuna takauri ánia nuka iisma yainkma atiniaiti. Nuyá nekas imian ujukamu atiniaiti tuke tsawant unuimiaki nekaki wénakui nuyá aintsank takakmamurisha iirnaki wetiniaiti, nui pénker takakmaki weti tamajai.

TÉSAK JÍMIAR

Tarimiat aentsu umimiktairi

Akánu 171.- Tarimiat aents iruntramu ánia nuka nii itiu

chichama iwiartumarartata nuna ejerartiniaiti, yaunchu najantairiya nújai métek niniuri itiurampait ainis nii nunke jeamujai métek nekaska nuinkia núan pachikiartin ainiawai. Úuntri áinia nuka nii iruntrar itiur chichama iwiartumarartata nuna ejeturartiniaiti turasha umitiai tana nuna iniankakchartiniaiti nuyá aentsu imiantri yaja nunkanmash nekamua nuna.

li nukenka itiur tarimiat aents chichama iwiartumarartata nuna anturak amirkatniuiti aintsank máshiniunu tuakar takakmainia nusha. Nú juamusha umitiai tana nujai iisma atiniaiti. Chicham iwaratniunmanka tarimiat aents nuyá chicham júamu tana nújai tsaninkiar yainiaikiar ejerartin ainiawai.

TÉSAK MENAINT

Umitiai Takatrí Juarmari

Akánu 172.- Chichama nakuen áinia nuka umitiai aarma ana aujai métek takakmasartiniaiti nuyá yajaya umitiai áinia nújai aents niniuri ayamruktinia nunisank.

Chicham nakuetañiam takakmauri áinia nuka unuimiarmari awas yá awakma nú takakmasartin ainiawai nuyá takatrí pénker jukitin áiniawai.

Chichaman nakuen ainiaka nii nájanmarin pénker istiniaiti, warinksha nankamakuinkia suamu atiniaiti tumak umitiai emesmakma juakminiaiti.

Akánu 173.- li nunke úunt takakmainia imiancha akuinkia suritkiamu atiniaiti tura takatrin nuyáñchuka chicham jurusma atiniaiti.

Akánu 174.- Chicham anakuetaíniam takakmainiaka
chikich chicham iwiartai áinia nui takakmaschatniuiti,
antsu úunt unuimiataínmanka takakmasminiaiti.

Yajauchi takatan juana nuyá aentsu niniuri emesmatna nuka asutiamu atiniaiti umitiaijai métek.

Chicham nakuetañiam takakmainiaka anaimiatai juamu
tuakma áinia nuna umuchkiacharmin ainiawai tura
aintsank anamkatsa pachinkiachminiati nuyá aintsank
chichamruktiniati, Arutam chichamnumsha aintsank.

Akánu 175.- Nuwach, aishmankach, natsa áinia nusha amirkatniunam pachitkia ainiawai máshiniu niniuri arantukma arat tusa. Tura uchi warinkish imitmakuish itiur asutniatniuit nunasha máshi umitiai tana nunisank umirkatniuiti.

Akánu 176.- Chicham nakuetaínam takakmauri áinia nuka unuimiarmari awas imian akui ayu timiajai takakmasartin áinia nuyá aintsank másh iismajai nusha nui takakmasartincha núa aishmank métek pachinkiamu atiniaiti.

Antsu nuna p nkerash takakmasarat tamaka nuniska
enkemachartin ainiawai ayatik ninkia iniakmamtiksamu
chichasrik nuy  aarar tura nuna ya imia p nker jiki nu
takakmastin ayu timia atiniaiti.

TÉSAK AINTIÚK
Iruntra nuyá takakmatairi

Akánu 177.- Amimtiktai takaurinkia takat nekas timiatrus
jua nuwaiti nuyá takakmaurinkia ankant ainiawai turasha

pénker iisma atiniaiti. Umitiai másh najatkattawai, nii najánatniun, umiktrin tura máshi iwiartuk pénker eséturtiniaiti.

Akánu 178.- Takamuri ayamkartin iruntramuka máshiniu umitiai yamaram takakajnia nújai métek, tura juna amikiartiniaiti:

1. Chicham iwiartai niirin akantukma.
2. Uchich tesamunam chicham iwiartai akantukma.
3. Umitiai chichaman nakuen áinia umitiai tana nújai métek.
4. Tsankurnairatin tama iwiartin.

Chicham iwiaramu aarar ujútankia nekaska ii nunke úuntrin achitkiawai, másh takakmamuri iirsamujai umitiai takaurijiai.

Umitiainiu takaurinkia anujtai áinia nunis takata takakui, chichaman ajintin áinia nusha umitiai tana nújai métek.

Máshiniu ayamrinkia nuyá takakmamun iinrinkia chichama jutairi takakmauri ainiawai.

Nii iruntratniunka umitiai tana nújai métek uminkiattawai másh pénker junakit tusa.

TÉSAK EWÉJ

Amitiai Iwiarin Tuakma

Akánu 179.- Najántai iyamun iin iruntramuka ni takamauri amimtikartiniaiti tumak junis ainiawai usumtai aents pachitkiainiawai ujuk uwi takakmasartiniaiti tura awakeasrik anaikiamu achatniuiti aishmankjai núa métek ainiawai. Chichamrin nuamtak iruntrar nú iruntramu úuntri iniaikiatniuiti nuyá patatkarincha aintsan, menaintiu uwi jeamujai métek.

Nuna takata juuniaka uwijjai métek nii takamasmarin úunt iruntainiam etserkartiniaiti, nui takakmasmarin tunaiyartin ainiawai.

Akánu 180.- Nuna atuarinkia juna umikiartin ainiawai:

1. Ekuaturnumia atiniaiti tura niniu imiantri ankanta takaku atiniaiti.
2. Unuimiarmarinkia menaintiunam ejeka atiniaiti tura chicham iwiartaí amuku atiniaiti, tura nii unuimiarmarisha nekáramu atiniaiti.
3. Takat takusmanumsha pénker jintia takakmasu atiniaiti turasha warinma takamastata nújai métek nawe uwi takakmasu atiniaiti.

Tura nuna atuintri aniaiyakrikia untsunkamujai tura iniakmamajai awakmaku atiniaiti máshiniu nekamujai. Ujuk atuin iniaikiamu atiniaiti, umuchkatniunam akiknum tura chikich takat juamunam.

Akánu 181.- Umitiainiam tana nuna iniankas nui

takakmainiaka juna amikiartiniaiti:

1. Ejerartiniaiti, takakmasartiniati chichama jusar yamaram itiur chicham iwiaratniun ejekatniuiti.
2. Nekar nuyá ayu titiniaiti urutma akikia utsumna nú, tura ninki tuakarua nunaka atsawai.
3. Jatén áinia jurtiniaiti anairatsar nuyá chikich umitiainiu takakmainia nusha aintsank, iirsatniusha, iwiaktincha tura asutniatniusha aintsank atiniaiti. Másh takat juamuka nekamtikiamu aents tuakma ai atiniaiti.
4. Takakmastin iwiartainiu emtikiatin nuyá nuna unuimiattaisha urátar aents unuiniakartiniaiti.
5. Máshiniu takat júamu paant ati tusar chichamrukartiniati.

Warinksha ayu titiniaitkiuinki ewej áinia nu ayu tiartin ainiawai tura antsu másh pujuiniakuinkia tsenken iruntratniuitki chicham núkap iwiaratniuiukuinkia.

TÉSAK UJÚK Amitiainiu nekasri

Akánu 182.- Chichmarutai niniuri juni iruntra atiniaiti máshikia ejeturaruka jimiará nawe chikichik atiniaiti nuka pujusar takat najanawartinian takusartiniaiti, usumtai uwi ni takatri pujusartiniaiti, tura awakeki anaikiamu achatniuiti menaintiu uwijjai métek anaikiamu atiniaiti.

Nui takakmainiaka nii úuntri anaikiartiniaiti nú anairamu áinia nuke junair ii nunke úuntri tamajai métek, menaintiu uwi naamak pujustiniaiti.

Tura aintsank chikichcha unuimiakaru áinia nusha jukma ártiniaiti úuntri najánna aintsank.

Nú tuakmaka másh nunka iiniu iyamu atiniaiti tura nirinkia Quito atiniaiti.

Akánu 183.- Chichamrin úuntri ajastasa wakeraka umitiainiam tana nuna umiak nuyá junasha umiktiniaiti:

1. Ecuador nunkanmaya nuyá itiurchata takakcha ankant atiniati.
2. Unuimiarmarinkia menaintiunam ejeka atiniaiti pénker ii nunke nekamuri nusha chichaman iwiaratniu unuimiatra atiniaiti.
3. Takat jukimiurinha pénker iniakmamsa atiniaiti, unuikiarturmanumsha aintsank nawe uwi takakmasu.

Nuna úuntri anainiakka untsumkar unuimiarmari irsar awakmamtikiamu atiniaiti, nuka aishmankjai núa yamaikia méteketji tama asantai.

Akánu 184.- Umitianiam tana nunasha iniankas ju takata najanawartin ainiawai:

1. Itiur takat jukitniuit nuyá chicham iwiaratniuit nuna nekatniuiti umitiajjai métek.
2. Pénker takat jukitniuiti amitiainiam takat junaki wea anis.
3. Pénker nekatniuiti takakmau warí enentaijjaiya ankant sunastinaait.

4. Yamaram enentai amitiai itiur junaktiata nuna najánatniuiti.

Akánu 185.- Chichama iwiarin niriya chikichnum nú chichamnak menaintiu iniankakmiaka nuka takata júa tasmarinti tumakui ankant ujúk nawe tsawant susamu atiniaiti. Nú tsawant susamunam warinkish tachakuinkia nakak chikich úuntri ni itiurchatri enketamu atiniaiti.

Nuna iwiarniuka anaitiukma atiniaiti junairmajai chichama jukitniuka. Nuna chichama yapajiatsa wakeraka etserin iniaitiukma nú paant Najána etserkattawai itiura yapajkiमित nuna tura nú awajirmaka nú iruntairinin iwiaramu atiniaiti.

Akánu 186.- Chikichkimas nunka tesamu áiniana nui takatka junaktiniaiti chicham iwiartai nuka untsuri tuakar unuimiakaruk takakmasartiniaiti nuyá ankant úunt unuimiatainmash takaknaka najánamnia ainiawai. Ayatik nú chichamnak iisartiniaiti takakmuri áinia nuka tura chikich chichanum enkemacharmin ainiawai.

Nunaka niiri takakma imiajin aents chikichik akantsamunam takakmasarti titiniaiti aents tuakmajai métek.

Tura chikich uchich iruntruamu áinia aisha chikichik nuna chichama iwiarniuri atiniaiti, nuamtak aentsna, uchinu nuyá úuntna unuimiatra atiniaiti nusha aents urutma áinia nú utsumamujai métek.

Tura aents tuakma ana ai sépu uraimiu akuinkia chikichik aents iwiarniuri utsumnawai enkeamun iwiarin.

Akánu 187.- Umitiai najántairin takakmainiaka ni takatri

pujúsartiniaiti takata juiniakka, tura antsu uyumamu akuinkia iwiarturma atiniaiti; takatri nekaprusma atiniaiti nuka najánniuri wárik najánamujai nuka umirnakmatai juarnaktiniaiti, tura aents imianchaitkiunkia umuchkamu atiniaiti.

Akánu 188.- Máshiniu ii antiakma ayamramujainkia suntar nuyá pushú suntar ánia au nekaska ayamrukchamtainkia tusa asutiamu artiniaiti. Tura penke amikcharmatainkia nii itiur asutiai ánia nújai asutniatin ainiawai.

Métekrak nunisank takakmamuri akuinkia amitiai umpuarma nújai métek takakmantsattui.

TÉSAK TSENKEN

Arantunaitiai chichamrin

Akánu 189.- Tsankuratniu chichamrin métekrak awakekiartatui nusha máshiniu métekrakea anin iismajai aintsank itiurchat aentsna, iruntramunu nuyá tuakmanuashit nújai métek amitiai tana nújai métek atiniaiti. Tura tarimiat aents niniu umimtiktaijankiuinkia sepún mash eneachtiniaiti.

Tsankurnairatniu chichamrin ánia nuka itiur tsankurnairartata nuna eaktiniaiti, aujnaisatniun, métek iwiara ikiuktinian nuyá chikich itiur irutkamunam umin ánia nújai métek umitiai ana nújai métek. Tura chichama atuin atukmaka achamniaiti.

Nuna tsankurnaitiainiam takakmainia nuka ni pujutairinin pujusar takakmastin ainiawai, arantukma, aneasma, yainkma irutkamunam. Irutkamunam iniaikiamu atiniaiti,

penker jukimiujai iwiarniun emtikiania nui. Nuinkia chicham iwiartainiak amukuka achatniuiti.

TESAK YARUSH

Chicham nuyá itiurchat iwiartunairtin

Akánu 190.- Kakarmajai iwiaratin yainiawai, iwiarturtin nuyá chikich pénker iwiarturtin ainia nusha chicham akui. Nú takat juamuka umitiaijjai métek junaktiniaiti tuma asa ayamrukma atiniaiti.

Takat suámunmanka pénker amimtikiamu atiniaiti, chichama iwiarin ainia tamajai métek.

TÉSAK USÚMTAI

Máshiniu Ayámrin

Akánu 191.- Mashiniu ayamrin takakmamuka amimtiktai takatan juawai nuka máshiniu nájanmajai métek aentsu ayamrin ainiawai, akiknumkesh tura niniuri takurmakmanumkesh tura aintsank takatan chikichan achikchamnia ainiawai nunaka ayu tichamuiti tumaitkiush aentsu niniuri ayamrak takata jukitin ainiawai.

Ayamkartin ainia auka takata imiatrus nuyá pénker jukitniuiti, warik, pénker, ánránk, chicham iwiarturtinnium mash aentsnum nankama nui.

Máshiniu ayamrutaikia akankachminiaiti nuyá ninki takakmastiniaiti akíknum nuyá takat juamunam, tura takatan juinia nuka aents núkap unuimiakarujai takakmasartiniaiti, takakmatairin, ayamrunkat tusa.

Akánu 192.- Ayamrutainia takakmastaj tauka juna amiktiniaiti:

1. Ecuador numia atiniati nuyá imiantri pénker takaku.
2. Unuimiarmari menaintiunam amukma takaku tura ayamrutainiu neka atiniaiti unuimiarmasha ii nunke nekamu tura takakmastinia neka.
3. Pénker takakmasu, chicham iwiartainium emesmatsuk nawe uwi takakmasu atiniaiti.

Másh ayamrutai tamaka ni takatrin takakmastiniati ujúk uwi tura ataksha anaikiamu achatniuiti uwijiai métek takakmasmari etserkatniuiti úunt iruntainiam.

Akánu 193.- Chicham iwiartainiu neka, ayamrutainiu, nekamuri unuimiarma atiniaiti, tura takat juamunmanka ayamruktin enentai atiniaiti turasha itiur takata jukiaruit nújai métek, tumainiak takatrinkia tuke irsamuiti.

Tura chíkich núu takata juinia nusha takatrí pénker írsamu ártiniaiti pénker takata jukiarat tusar nuka máshiu ayanmrutainiam takakmainia nui.

TÉSAK NAWÉ

Másh Takat Júamu iin

Akánu 194.- li nunken takat juamu apapes iinkia ankant iruntramu ainiawai chicham iwiartai áinia nújai métek, ninki akankachmin, nuink tuak takakmasma atatui, ankant takata jukittiawai, akiknum nuyá kuit umuchmanum. Másh iinia nuka úuntri nankamakuiti nuyá aintsank emtakeawai,

pénker umimtikiatniuiti itiur umitiaijai métek.

Akánu 195.- Umimtikniuka jintiattawai, aents ujakmajai, etserkamujai nuyá jintias nekapin nuyá asutia sepúnam enkeatin; nui takata najatkunka máshiniu nekamujai najanatniuiti ankant susamujai nuyá emesmakmasha yainkma atiniaiti. Nekás pénker juaktatsa yá emésmakuit nunaka tímiatrusank umimtikiatniuiti asutniat tusa.

Takatrí umiktajtsa umimtikniuka iwiarnar najánatniuiti itiura wekatus jintias najánatta nuna, tsuak nekáskeashit tusa, nuyá chíkich enentaimsa najánamuncha, nuinkia chikichik aents misuram nuyá pushú suntar pachinkiatniuiti, wekatus nekatniun nuyá aintsank umitiaijai métek umimtikiatniuiti.

Akánu 196.- Umimtikniuka juna umiktiniaiti:

1. Ecuador numia nuyá chicham juamunam imiantri takaku atiniaiti.
2. Unuimiarmarinkia menaintiunam ejeka turasha ayamrin áinia nuna unuimiatra nusha ii nunke unuimiarma nekámu atiniaiti.
3. Pénker takakmasu tura nekasa nuna anujratniu takaktsui ayamkartutai takakmauri nawe uwi takakmasu atiniaiti.

Umimtikin ainiaka ni takatrinkia ujuk uwi takakmastiniaiti tura awainki anaikiamu achatniuiti; úunt tuakmanum nii takakmasmari uwijiai métek etserkatniuiti: nú anaiyamuka umitiai itiur anaikiatniuit nújai métek umik anaikiatniuiti

Akánu 197.- Umimtiktai tamanka pénker emtikiatniuiti

nuna unuimiatra asa tura umimtiktai tana aintsank.

Tura aintsank nui takákmaka tuke unuimiatnum émki wetiniaiti, tura aintsank takakmaurisha nekapmamtiksamu atiniaiti másh takamuri áinia nusha, tura warinksha wárik takatcha aintsank.

TÉSAK NAWÉ CHIKÍCHIK

Aents waintiai akantramuri

Akánu 198.- Yaimin áinia nuka chichamrin áinia nuni imiatik aents amakma áinia nunaka yainkiertiniaiti nuyá chikich asutiatniuncha, nusha iwiarkusha émamkes itiur umitiai nunisank najánatin ainiawai turasha misuram aents ii nunke pujuinia nusha pachinkiamu ainiawai.

Umitiai chichamramuka nekása nuna chichamruktiniaiti, pénker esétramujai, patatsank nájanmajai, takurmakmajai pénker nuyá shiir ejetukmajai.

TÉSAK NAWÉ JÍMIAR

Nekáamu Yaimin

Akánu 199.- Anujtai chichamramuka máshiniu ainiawai. Chíkich nunka tesaramu áinia ai anujtáinkia núkap iruntiniaiti aents matsatainia nújai métek nusha anujtai chichamrin itiur tesar iniainia nújai métek. Nuna takakmauri áinia nuka másh takakmainia akikma artiniaiti tura aents nui tainiaka pénker iisma, akíkmaktincha aintsank niriya ejeramu atiniaiti. Nui ákik juukmaka ii nunké akikrí ikiutainiam enkeamu atiniaiti umitiai tana nújai métek.

Akánu 200.- Najántai iwiartin, anujtin áinia nuka pénker enentaijjai ii nunkenun enketin ainiawai; anujtai chichamrin áinia nú anaikiamu ártiniaiti nusha unuimiarmari paant amajas awakma nújai máshi iin áiniana nú iisma atiniaiti. Unuimiarmari menaintiunam umpumaru atiniaiti chicham iwiartainiam ii nunken nekamu nuyá menaintiu uwi takakmasu atiniaiti. Anujin áinia nuka nii takakmamurinkia ujúk uwi takakmasartiniaiti tura ataksha chikichki awakeki anaikiamu artinian. Nuyá umitiainiun tana nújai métek umiachkuinkia ankasma atiniaiti.

TÉSAK NAWÉ MENAINT

Sépu máshiniunu iwiarnatai

Akánu 201.- Sepúnam enketai máshiniuiti ya aents amitmakaru áinia nunanu, pénker iwiarnarat tama asamtai, nuyá aintsank aents imitmaku nii pénker iisma ati tura ayamrutnakat tamajai mantámnawaink tusa.

Nuka aents warinia imitmakuit nújai métek atiniaiti tura nui enkema atak najanachtinia pénker enentai enkea jiniawai, aentsun arantin atin enentaijjai nuyá ankant juawai.

Akánu 202.- Nuna juamunka aents ame iista timia atiniaiti nunaka enentai jukimiua nújai métek amik najánatniuiti, tura aintsank nii chichamruktiniaiti nui máshiniu najánatin tana nújai métek umimtikiatniuiti.

Sépu aents imitmaku enketainia nuka tuakmanum emtikiainia nú umuchkiartiniaiti, umitiai umpuarma tana nújai métek.

Aintsank nuna chichamruiniaka úunt emtikia nui áchitkia

ártiniaiti nuyá unuimiatra áinia nuka umitiai tana nújai métek uminkiatstawai. Ii nunké úuntri nuyá pátatkarí ii nunke chichamruinia nuna ame iista tinia apujsatniuiti. Nuna chichamruktinniaka aents nekas nekan, enentaimniun nuyá chichakratniun anaikiatniuiti.

Akánu 203.- Takat juamuka junis junaktiatui:

1. Aya aents imitmaku asutiamu ainia nuke sepunmaka enkemawartiniaiti nusha imitmakmajai métek tsawantrisha tesaramu ártiniaiti, nuka sepúnam pujuartiniaiti.

Yamaik nuyá núkap tsawant enketaiya nuink enkeamu ártiniaiti, tuma asa nuka nekamu atiniaiti aents enketainkia, suntar nuyá pushu suntar matsamtai áinia nuka imitmaku enkeshtainti aents misuram ainianuka.

2. Sépu nuyá úunt sépu amanum enkema pujuiniasha nánkamas enkemsaraink tusar unuimiertinia susartiniaiti, imiatik áinian nekawarat tusa, nuka aents imitmaku akusha kuntuts enentaimias pujusaink tusa waras nakurus warinkish najánu pujut tusa.
3. Aents imitmakun umiktinian najánatin áinia, aents imiatik najánamu aink tusar pénker iisartiniaiti tura nekása nuna najatawartin ainiawai.
4. Sepúnmanka nekas imiana nuna esétar takamastiniaiti, aentsun niniurin warinkish najánamu aink tusar ayamruktiniaiti utsumamu iirsatniuiti.
5. Ii nunkenka aentscha nuna pénker nekawarat tusa nuyá akikrinkisha takurmasarat tusa nájanui.

AKANKÁMU EWÉJ
Pénker Takámunu Iyámu

TÉSAK CHIKÍCHIK
Niniuri nuyá takatrí

Akánu 204.- Aents tuakmaka iniamnuiti, nekamunam takakmanna nuinkia pénker amuchkarma atiniaiti nuyá pachinkiar ajatniunam.

Paant nájanman nuyá aents matsatmanun iya juamuka itiurak másh yaimia áinia nui takakmania nuna takata pénker najánat tusa iistatui, máshiniunu takat juamusha pénker emnaki wenat tusa, nuyá másh enentai júamunam aents pachinkiatniuiti tura aintsank másh métekrak waitmaktai tama awai, umitiaijai métek kasarnaitsuk shiir pujusarat tusa.

Nuna iistin tamaka paant nájanma nuyá aents pachinkiarat tama juamu ana nú iisma atiniaiti, nuka másh takakmainia apapesartin ainiawai.

Akánu 205.- takat júamu pénker takata jukiarat etserak nuyá aents tuakmanum takakmasarat tusa juiniaka nii turamunmanka pénker jukiartiniaiti nuka ewej uwi matsamsartarui, nusha chichamrin áinia nú tuke iisma ártiniaiti. Nuna amiatsna nuka asutiamu, takatrin ajapamu tura chikich anaikiamu atiniaiti. Tura anaintiai chichamrinkia penké antar anaikiachminiaiti.

Nuna úuntri nankamakuka Ecuadornumian núa nuyá aishmank akusha chicham kara atiamunam pachitkia atiniaiti nuyá unuimiarmarisha iirsamu aents pénker iisma tura aintsank ikratsatniu néka.

Akánu 206.- Aents iisartin imitmamu ii nunke aink tusa wainkiartin ániaka nii tuaka takakmastinia eakartiniaiti tura nui ninki tuakar úuntri anaikiartiniaiti chikichik uwijjai métek nuna úuntrinkia chichama juakmatra atiniaiti. Nuna umiktintri umimtikiatniurinkia amitiai tama ana nunisank atinia i turak juna amikiartiniaiti:

1. Itiura takakmamunam paant amajsatniuit nuna enentai jurusartiniaiti, nuyá takakmainia iirsartiniait, takatr etserki wetiniaiti, aents itiur pachinkiertiniait, wari suritkiamua ártiniait nuyá kasamma aink tusa enentai jurusartiniaiti.
2. Takauri ánia nuna pénker takakmasarat tusa chichamrukartiniaiti tsaninkiar, turasha nii kanak takamurin emestutsuk.
3. Takakmamunam kasamma núkap aink tusar kishmaktinian iwiarnartiniaiti.
4. Chicham nuna umitiai ánia nui umitiai najánamun awasartiniaiti tishipias iis ayu tiarat tusa turasha niniu najánatnua nújai métek.
5. Aintsank tuak amitiain kara atir umpuin ánia nui nii takakmasmarin awasartiniaiti tura amikmarin utsumnakuinkia.

TÉSAK JÍMIAR

Máshiniunu Iistin Tuakma nuyá Pachíniu

Akánu 207.- Tuakma aents másh pachiniainia tura aintsank nii pujámuri iirma, chichamrukartatui tura

iisartatui aents máshiniu pachinkiarat tusa chicham juamunam, tura aents matsatma iistinian, nuyá aintsank máshiniu itiur matsamsatniuit nuna chichamruktiniaiti nuyá úunt anaitiai áinia nuna anaiyamunam pachinkiartiniaiti umitiaijai métek, tura nuna tuakmari anaitiutainkia umitiai tana aintsank najánatniuiti nuyá nii takatrin umikiartiniaiti.

Juni tuakartiniaiti, tsenken chicharin ártiniaiti núa nuyá aishmank nuyá nuna atuarisha aintsank tsenken atiniaiti. Nuna juamunka ninki tuakar úuntrinkia anaikiartiniaiti nuna nekas chichamrin paant atiniaiti nuka nii takakmastintri tesaramu ajapen atiniaiti.

Nuna tsenken takauri nuyá tsenken patatkari iniaiyamunmanka aents tuakma pachiniak anaikiartiniaiti, nú anaiyamuka anaitiai chicharin áinia nú yukimiu atiniaiti, nuka unuimiarmari iirsatsar untsumkamu atiniaiti nuna awakmaku áinia nuke, nuyá aintsank atsa tamasha umitiai tana nújai métek atiniaiti.

Akánu 208.- Aents chichama nuyá takat júamu iisartinkia ju takata najánawartiniaiti umitai tana nújai métek:

1. Aents pachinkiarat tusar paant amajma, máshiniuiti imiatkin irunna nuka timia nuyá aents itiur unuiniaktiniait, pénkerin, paant najánatniun nuyá kasamma aink tusa chichamruktiniaiti.
2. Takakmau áinia nuna takatri etsertumakarat tusa nuyá máshiniunu takainia nusha nuyá aents matsatainiasha takakmainia pénker wainkiarat tusa chichama jusartiniaiti.
3. Chikich takauri áiniancha seawartin áiniawai nii

enentaimmijai pachinkiarat nuyá chichaman emkatniun apujsat tusar.

4. Warinksha chicham emesmakma etserkamu akuinkia nuna wekatus ichipias nekatín áiniawai aentsun emesmakui tura aintsank kasamma akui.
5. Imiatkin nekas pénger nekamu akuinkia etserma najátamu nuyá amintikiamu atí tiartiniaiti.
6. Nii wekatus chicham nekamu junisauyi tusa ayamruktiniaiti, tura nekas pénger nekamuitkiuinkia nuna imitmaku ejeturta timiaka máshiniu ya amitmakuit nunaka iwiarturtiniaiti tura takakmarisha jurukmia atiniaiti.
7. Aents ayamruktinia iistiniaiti kasamkai kasarkamu akuinkia.
8. Takakmauri máshiniunu áinia nuna seawartiniaiti etserkarat itiur takat juna tura warinsha itiur itiurchat nankasma nuna wekas émamkes nekamij tusa. Tura aents nui takakmainiaka pénger yaimkiartin áiniawai tura nuna turachuka asutiamu atiniaiti umitiaijja métek.
9. Takat jukitin iwiarnatratin, paant takakmasarat tusar iistin nuyá aintsank aents anaiyamusha pénger ati tusa iisartiniaiti.
10. Másh iwiartin takat jukitniun aentsu iniaikiatniuiti nuyá kutanka úuntri ii úuntri jú achaintiash timian nuyá aintsank imian najánachai taman iisartin áiniawai.
11. Tuakma ayamrin áinian anaikiatniuiti, máshiniun

ayamrinian, ii nunken iintrin, ákik umuchma iisartinian nuyá chikich anaiyamun nii jeamujai métek.

12. Anaimiatai chichamrin ániancha anaikiartiniaiti nuyá aintsank iwiarin ániancha takatri amikiarmatai umimtikartiniaiti.

Akánu 209.- Pachinma nuyá aents takakmamu iyamu amimtikniuka aents tuakma iwiarkatniuiti anairatniun nú takatan pénker jukiarat tusa, awakmaktin takat juamunam pachinkiatniun untsumma najánatniuiti, másh nekámu atiniaiti úuntri anaiyamusha nuyá aintsank aents namkatsa wakera awakmanuman imiancha nekapkunka imian junakchai tusa aar awasminiaiti.

Nuna aents úuntri anaiyamun junaitra ánia nuka nuamtak tuakar úuntri anaikiartiniaiti nuyá nuka takat júamu tuakma ánia tura aents tuakaru ánia nuna chikichkimias atukartin ániawai, nuka jú ati timia tura unuimiarmarin pénker umikiaru ánia nú ártiniaiti umitiaijai métek. Anaikiar ajapruamu tura atsá tamaka máshiniu nekámu atiniaiti.

Akánu 210.- Takat juamu emtikiatin anaitiai ana nuinkia aents imian iniakmasua nuna nuyá unuimiarmari iiras ayu jú ati tusa anaikiatniuiti tura anaitiai chichamruinia nui etserkatniuiti nii anaikiamu ekentsat tusa.

Aents unuimiakaru ánia anaikiatniuitkiuinkia nekas jukitniuri tura nii atuamurin anaikiatniuiti nuka ya imia núkap jusa nújai métek, atuarinkia nii emkari tamsamtai akintiuktiniaiti itiur juakuit nújai métek.

Tura takakmauri ánia nuka anaikiamu achatniuiti turutskesha untsummanum pachinkiarchatin ániawai aya

yamarmak pachinkiertiniaiti. Aishman nuyá núa métek áiniawai tumak pachinmanumka maimtek pachinkiertiniaiti aents aran pujuiniasha.

TÉSAK MENAINT

Kuit Umuchkiamu Iin

Akánu 211.- Ákik umuchma chichamrinkia, takat amamkesa akik chichamna iistin ainiawai, nuka máshiniunu yaimmianum takakmainiana áinia nusha iisartiniait nuke akanturma atiniaiti.

Akánu 212.- Ákik umuchma wekatus isartinkia jú takatan najánawartin áiniawai umitiajai tamajai métek:

1. Ákik pénker takat júamunam umuchnakat tusa, nuink tura aintsank chikich tuakma takat juamu nuyá ii nunke ákik susamu umuchna nui aintsank tuakma ninki ana nuka ákik ii nunkeya umuchinia nújai métek.
2. Takat akikna pénker juiniatsna nuka itiur amitmaka nújai métek asutiamu ártiniaiti ya amitmaka nunak, chichamrin áinia nú nekawarma turasha takatri emestukma achatniuiti.
3. Imiancha akuinkia umitiai tana nújai métek umimtikiartiniaiti.
4. Aintsank niirin takakma áiniana nuna juni takat jukitniuiti tusa jintintiwartiniaiti.

TÉSAK AINTIUK Kuit Chichaman Émtuku

Akánu 213.- Nekaska nantujen pénker waitmatai umuchin áinia nuka takat jukitin tura júamu pénker iistin áiniawai ákik umuchma áinia nui nuyá takat máshiniunu tura ninki takainia áinia nuna turasha aya aentsu yainianak. Nuna takata juuniaka amitiaijai métek iis takakmasartiniaiti.

Nuna emtikiatniuka núa turutskesh aishmank atiniaiti. Ya jú takata jukitsa wakera nuka aarar seamma umiktiniaiti nújai iirsa anaikiamu atiniaiti.

Nuna úuntrinkia aents pachinma nuyá takat júamu iin áiniana nú iruntar anaikiamu atiniaiti unuimiarmari awasarmatai nuyá aintsank Ecuadora úuntri jú achaintiash timiajai, ajapruamu nuyá aintsank unuimiarmari iirsamu atiniaiti nuyá pachiniu imiancha nekapkunka aar awastiniaiti yajauch anainiaka awakeki iintsati tusa.

TÉSAK EWÉJ Máshiniu Ayámrin

Akánu 214.- Máshiniu ayamkartinia auka, máshiniunu imiatkin ainiajai neka ni pujámurinia pénker iistiniaiti, másh nunkanam nekamu atiniaiti, niniunkesh takakmasminiaiti, akiknum nuyá takat júamuncha kanaki takakmastiniaiti. Ni takat juamuka akanturma atatui nuyá tuakma irunna nui takauri nuyá yaja nunkanmash pujuartatui.

Akánu 215.- Tuakma ayamrinkia ni takatrinkia aents ayamruktiniaiti nuyá aents Ecuadornum pujuinia nú iistiniaiti arant pujuinia nuna. Ni takatrinkia jú ainiawai

umiktin tana nújai métek:

1. Ayamruktin, najánatin seammiakai métek, nuyá ayamruk jiktin, nuyá ujakma atinian, máshiniunu takastin, imiancha akui chichamruktin, takat máshiniunu nuyá niniunak takastin.
2. Kakarmajai umimtikiatin nuyá wari aentsu niniuri ayamruktiniaiti, nekas imitmakai titiniaiti, nuyá úuntri asutiawartiniaiti imitmákmajai métek.
3. Wekatusar nuyá iwiaratniuiti, imitmamu, nuyá pénker ati tusa, tura amintikin iwiartin áinia nuiti.
4. Muchitruktiniaiti chichaman iwiartin, aentsu niniuri emestukma, asutiamu, nuyá waitkiasma aink tusa.

Akánu 216.- Ayamrin tuakar pujúiniamu úuntri atinkia chikich seamma umikiar enkemawartatui, nuna turachkunka úuntri ajaschamniaiti, enentainiam núkap katsuaru atiniaiti, tura aintsank takakmamusha umitiai tana nunisank atiniaiti

AKANKÁMU UJÚK

Anaitiai Chichamramu

Akánu 217.- Anaitiai chichamramu nuka takat najankar umintikiatniuiti, nuka anaiyakur ajaprua ii úuntri anaikiatin.

Iniaitiai tuakma atiniaiti, nuyá weatkarisha atiniaiti, mai iruntramuka Quito niirin takatka junaktiatui, kuitnium, takat juamu, takatmauri takustiniaiti, nii chichamrisha ankant atiniaiti.

Ni enentai juamujai tura ankant nuyá iniashi iitsuk takakmanka jurkamu atiniaiti.

TÉSAK CHIKÍCHIK

Anaitiai Chichamramu Tuakma

Akánu 218.- Anaitiai tuarkaruka ewej aents pachinkiertiniaiti, nuke ujúk uwi pujusartiniaiti takakmaurinkia, nuka memaint uwi jeamtai ataksha apujsatniuiti, nuyá aintsank ewej atuintri atiniaiti, awakeki apujsamu atiniaiti.

Nuna uutrinkia tuakar iniaikiamu ainian anaikiartiniaiti nuyá anaikiamu menaintiu uwi pujustiniaiti.

Nuna untrinkia itiu anaikiatniuit tusa iwiarnatramu pénker jukitniuiti umitiai tama timiatrusan najanatniuiti.

Nui pachinkiatsa wakerakka, ankant nuyá Ecuadornum pachinkia atiniaiti.

Akánu 219.- Anaitiai tuarkamuka umitiai tama nújai métek takata jukittiawai, turasha junash najánatniuiti:

1. Iwiarnartin, chichamruktin, wainkiatin, pénker enentaimtustin paant najánar anaimiatiai juamu, anaikiatniun untsumkatniuiti, ajapruamu nekapmartinian, awakmakaru iniakmastiniam, nuyá awakmaku ekentsatniun.
2. Tuakma irunma nui anaitiai chichamrukta tusa anairatniuiti.

3. Etserma, akik ajapruamu nuyá anamratsa wakera nuna pénker iisartiniaiti.
4. Paant ati tusa najanatniuiti, pénker anairatniuiti, nuyá umitiain umintikiatniuiti.
5. Itiur anaiyamu atata nuna umitiain najána nekantikiatniuiti, pénker iniaitiai junakit tusa.
6. Umitiaín niniun timiatrus jukitniuiti.
7. Pénker irur takatmastiniaiti tura akikri eatkatniuiti utsumamujai métek.
8. Anaimiatai junaitramu ana nujai takustiniaiti tura nuna untrincha anujak takustiniaiti tura anamkatniun naari jurtiniaiti.
9. Umitiai umikiat tusa iistiniaiti, tura umitiairin iwiarki yapajiki wetiniaiti.
10. Iniyamu ákik ajapramu pénker junakit tusa iistatui.
11. Warinksha imiancha akuinkia iwiaratniuiti tura aintsank asutiatniuitkuinkia asutiamu atiniaiti imitmakaruka.
12. Ii nunken nuyá yaja anaiyamuncha pénker takusartiniaiti, aents pachintiai najanainia nunis.
13. Aniaitiai itiur jukutniuit nuna unuimiatrarat tusa unuimiatai najánatniuiti.

TÉSAK JÍMIAR

Anaitiainiu másh chichamrin

Akánu 220.- Anaitia tuamun iwiartin anaiyamunmanka ewej aents atiniaiti nuka ujúk uwi takakmastiniaiti, tura aintsank menaint uwi akankar iniaikiamu tura atuintrisha aintsank atiniaiti.

Úuntrinkia menaintiu uwi anaikiamu atiniaiti, nuka ataksha atatui nunisank.

Nuna úuntri ajastaska másh unuimiarmari iwiar amiktinia nuna ejeturu atiniaiti, tura umpumaru atiniaiti turasha chicham iwiartai unuimiatra.

Akánu 221.- Anaiyamu iwiartinkia umitiainia ana nunasha amiak junash najanatniuiti:

1. Ákik iwiasmakma anaiyamunam umuchkamun, pénker junakniushit tusa iistiniaiti nuyá pénkerash anaiyamu juna nuna.
2. Akikia imian umuchkacharuitkuinkia, asutiatniuiti, iniankak chichaman nuyá anujraruitkuinkia.
3. Akikri ju irunma umuchkatniun najatatniuiti.

Nuna aminiachkuinkia nekaska tuakma nuna nankamantu warit amintinkiatniuiti.

TÉSAK MENAINT

Máshiniunu amitiai chicham júamu

Akánu 222.- Anaitiai chichamrutai juamunmanka nuyá nuna pénker junakit tusa íiniaka, nii takattrin imiatik emesmamu najanainiaka asutiamu ártiniaiiti umitiaijai métek. Nuyá chichaman umitiain najánin ainiaka anaikiachmin ainiawai nui aents apujsatniun.

Akánu 223.- Anaimiatan chichamruiniaka aents tuakma naarin iin áinia tuke iisma atiniaiiti; tuakmari arantukma tura aents namratin áinia pénker iisar susamu atiniaiiti nuyá tuke takatri iirsamu ártiniaiiti.

Takat júamu tura tuak irunar najánmari paant amajsamu atiniaiiti máshiniu nekámu arat tamajai.

Akánu 224.- Anaimiatai chichamrin tura nuna emtuktin ainiaka, aents tuakar pachinkiertinia chichamruinia nuyá aents tuakma iin áinia núwaiti, pénker aents enentai ejeturun nuyá unuimiarmari iis ti emtakua nuna anaikiartiniaiiti, pachinkiamujai tura imian anainiakchamtaish chichamrukma atiniaiiti nuinkia núajai nuyá aishmank métek pachinkiertiniaiiti umitiaijai métek.

AKANKÁMU TSENKEN

Máshiniu takákmatai

TÉSAK CHIKÍCHIK

Máshiniu tuakma

Akánu 225.- Máshiniunu takatai juiti:

1. Úuntri karan atir ayu tinia, amitiain awajtin, anaimiata chichamrin, paant amajin takatan nuyá tuakman iistinian chichamrin.
2. Chikich nuamtak tuakar takatan juinia.
3. Umitiaijai métek takat jukitin tusar tuakma najánamu áinia, nuyá ii nunken ákik umuchtai júamua nuwaiti.
4. Aents amitiai tana nújai métek pachikma úunt namkaru ainiajai takat jukiartiniaiti.

Akánu 226.- li nunken takakmauri, nii iruntramuri, takakmamuri, takakmauka, nui aents pachiniainiaka umitiai tana nújai métek takakmasartiniaiti. Umitiai tana nújai takakmainiak niniurinha ayamrumakiar weartiniaiti.

TÉSAK JÍMIAR

Máshiniu takakmamu

Akánu 227.- Takakmatai máshiniu juamuka, másh aents ii nunken pujúinia yainktiniaiti, pénker takastinia enentaijiai, máshiniu pachinkiamujai núa nuyá aishmank, aents pachinkiamujai, aujnaisamujai, iwiarnarmajai, paant najanamujai nuyá nekapmamsa iismajai.

Akánu 228.- Takatainiam pachinkiatin, emkatin, nuyá emki wetinkia pachinkiar iniakmamsar nuyá awakmaku nuwaiti, takat susamu atinkia umitiai tana nújai métek, antsu namtai áinia nuinkia chikich anaitiai ainiawai nuka anaikiar nuyá ataksha imian takachkuinkia wárik jikir chikich enkeamniaiti. Nunaka aya úunt ya anaikia nuke yapajiamniaiti.

TÉSAK MENAINT

Núa nuyá aishmank máshiniu takatai

Akánu 229.- Máshiniunu takauri ainiaka ni unuimiarmajai métek takata juinia nuwaiti nuka máshiniunu yainktin tama takat jutai tuakma áinia nui.

Takakmau áinia nuna imiantri ainiawai tuma asa akankachminiaiti, turutskesha jurukchamnia.

Tuma asamtai nú takakmau áinia akiktin tura takat susatniunu anaitiukma ainiawai, nuka itiur takakmaki wea nújai akikrishá waki, pénkermaki, arantukma ajaki, nukape takakma nuyá nunisank takata úunt ajas iniaisatniuiti akikri pénger iirsamujai.

Takakmau núa nuyá aishmank ainiaka, takat chichamrutai juamunam pachitkia ártiniaiti.

Takakmau akikrinkia nekasenk nuyá métek akikma atiniaiti ni wari takatna júa nújai métek, nuyá unuimiarmajai nekamurijiai nuyá takat esetra júamujai métek.

Akánu 230.- Takat júamunam jú najánashtiniaiti umitiainiam tana nuna iniankasank:

1. Nuninniak takatan achikchamniaiti, antsu úunt

unuimiatainmanka takakmasminiaiti tsawant pénker tesamu jeasank akuinkia.

2. Nuamtak aentsuk takatnum enkemachminiaiti.

3. Takat suritma achatniuiti aents urukuit nú iirsar.

Akánu 231.- Máshiniunu takau ainiaka másh awasartatui enkemmanum nuyá amuamunam warinkish juna takakjai akikian nuyá chikich waitmatai tusa umitiai tana timiatrusank, nuyá aintsank akikia nantuje urutma takakea nunasha; ya nuna amiatsu nuka takata achikchamniaiti, tura suntar áinia auka takatnum enkemainiak nuyá jiniainiak awasartiniaiti.

Ákik umuchma mejentrus iin áinia nú pénker iisartatui amimtikiamu ati tamajai, nuna juarmanum tura amiaku najámtikiacharuka itiurchatnum enkemkartatui.

Núkap emesmakma akuinkia aents nunis ának seattawai iwiar amikmatai takat suamu achiktiniaiti.

Akánu 232.- Takat jukitniun emtikiatniun jukicharmin ainiawai, amimtikiatniunam takakmainiaka, nuna pénker junakit tusa iisar chichamruinia asa.

Takakmau núa nuyá aishmank ainiaka niniu itiurchat jiniakuinkia tee ajastiniaiti nú chichamri nankamai.

Akánu 233.- Takakmau nii takatri najánamun iirsatniunam ewemeatsui másh iirsamu atiniaiti tumak nii warinia najánait nunaka timiatrus etserkatniuiti tura nuyá imian najanachka umiktiniaiti asutiamu akuisha.

Máshi takauri áinia nuka asutiamu atiniaiti, kasamkamtai, yajauchi najánamtai, tura najánatniun emesmakmatai. Chicham juramunmanka aents imitmaku atsakuisha chichamka jurunkitniuiti, tui tuinksha eakma atiniaiti. Tura aintsank pénker nekanat tusa imiancha akuisha juarnaktiniaiti.

Akánu 234.- Ii tuakmarinkia takakmau ainiaka unuiniaki weartiniaiti, unuimiataijiai, natsa unuimiataijiai, úunt unuimiataijiai nuyá aintsank nekaki weti tamajai; juyajaink nuyá yajayajai achiniaitiar nusha ii nunke takata juinia au nekamujai.

TÉSAK AINTIUK

Amitiainiu Juamu Chichamrin

Akánu 235.- Takakmamu itiai máshiniunu tusar najánamuiti, nuyá aintsank esetar iwiarniuiti, akikrincha ankant takakui, nuna juaka iintri chikichik nuka aintiuk uwi takastiniaiti.

Akánu 236.- Tuakma pachinma nuyá aents matsatma iin, takat júamu iiniaka anaikiatniuiti, nuka ii nunke úuntri ju ati timiajai. Nuka unuimiaru ártiniaiti, tura untsummanum pachinkiatniuiti, tura awakmakua nuwaiti ekemsatniuka tura anaiyamunam imiancha akuinkia papi awantsamujai awakeki iisma atiniaiti.

Akánu 237.- Umitiai tana nunasha iniankas takakmamu iinkia juna najanatniuiti:

1. Umitiai chichama juruktiniaiti.

2. Takauri juamu irunna nuna atuktiniaiti.
3. Pénker takata jukiarat tusa chicharkartin, jintiatin takat júamu áinia nuna tura umimtikartiniaiti umitai tana aintsank.
4. Umitai tana nújai métek apapes takat pénker junakit tusa iistiniaiti, aintsank takatcha pénker susamu ati tusa máshiniu takakmainia nuna.

TESÁMU V

Úunt Nunka Nunké Iruntramu

AKANKÁMU CHIKÍCHIK

Másh juarmari

Akánu 238.- Iruntramu nii nunkenin tuakar iruntraru áinia auka karan atirartiniaiti nuyá takata nii jeamujai métek takakmasartiniaiti, akiknasha nii utsumamujai métek umuchkiartiniaiti, yaimkiatin enentaijai takasartiniaiti, máshiniunu nunkejai métek, máshiniu pachikiar. Turasha ii nunkeya kanak nisha najánashtiniaiti.

Uchich tuakma áinia au nii pujamurin ankant kanakiar takatan jukiartiniaiti, nuyá aintsank úunt tuakma áinia, niirin tuakma áinia nuyá aintsank nunka tesarar tuakma áinia nui takatan pujamurin iisar pénker jukiartiniaiti.

Akánu 239.- Umitiaijai métek kanakar iruntraru áinia nuka takakmasartiniaiti, tura itiur yainkma atiniait nusha másh enentai jurusma atiniati nii nunké tui tepaka nújai métek emkarat tusa.

Akánu 240.- Másh kanakar iruntraru nunka tesaramu, akankamu uchich iruntramu, úunt iruntramu áinia nuka ninki enentai jusar awajtiurar takata jukiartiniaiti nii nunken itiur atiniait nuna enentaimsar.

Tura uchich tuakma ainiaka umitiairi najátamun nuna amikiartiniaiti.

Akánu 241.- Iwiarnarmaka nunka pénker jukitin junawai nuyá nii takatri jukitin tesarmanu ainiawai.

AKANKÁMU JÍMIAR

Nunké iruntramu

Akánu 242.- li nunkenka tesaramu atiniaiti, úunt tesamu, tesamu nuyá uchich tesararma atiniaiti. Juka pujámuri, ikiamri nuyá aents matsatainia tuakma kanakchamu ati tamajai nuyá aintsank tuakusha kanakmin ainiawai.

Úut nunkanam tuakma nuyá atentra nunkanam, tarimiat aents tuak nunke tesamuka nunka pénker iisma atiniaiti timia nunis.

Akánu 243.- Jimiar nuyá núkap tuakma, tuakma nuyá uchich tuakma tsaninkiar úunt najánamniaiti, nuka nekas warinksha waitmaktinniumsha yupichukich ákik akantukmasha ati tusa nuyá tuakar tsaninkiar chicham jimiartamu ati tamajai. Tura ni itiur iruntratniuit, tura takata itiur jukitniuit nunaka umitiai umpuarma nújai métek jukitniuiti.

Akánu 244.- Jimiar nuyá núkap tuakma antiniaiya nuink pújaku nuyá nunké jimiará nawe nupanti nekapak takaku kanakar tuakmin ainiawai nuyá aintsank aentscha tuakmarinkia ewej washimramu jea máshiniu pujájnía nújai atiniaiti tuakartatui umitiai tana nújai métek. Tumak chikich tuakmajaish tsaninkmin ainiawai, nuyá aintsank tarimiat aentscha tsaninkiarmin ainiawai anturnainiaka nuyáanchuka nú entsanmank pujúiniaka. li nunkenka ákikia susartiniaiti nii jeamujai núumtak tsaninkiar tuakunka.

Akánu 245.- Tuaktin juarkitniuka nunka kanakar iruntrarú áiniana nú juarkitin ainiawai, eamruktinniaka iwiarnatar awasar ejetukartiniaiti, nuyá aintsank tuak itiur

takakmastata nunash najátamu atiniaiti.

Umitiai najánamu awastin áinia nuka iwiara awasman washim jimiara nawe tsawantan takakainiawai iis ayu tiartinian, nuna tsawant tesamua nui aimkiachmatainkia ayu timia júawai. Iwiara awasma atsa timia atatkunka tuakma menaint akankamu aents takakmainia ayu tiarma atiniaiti.

Nuyá ayu tunakuisha nekas iwiaramu umpuin áinia nuisha awasma atiniaiti takat pai juarnakti timia ati tamajai. Nuka ayu timia papikia aintiuk nawe ewej tsawantnum jinkitniuiti, nui jinkichkia ayu timia juawai.

Nuna umpuar amikmatai nekaska yamaikia untsunka ayu tama ajapruamu atiniaiti, nui nekas núkap ayu tuiniakuinkia takat juarkitniuiti.

Nuna amik ejeturmaitkiunkia ataksha untsunka atiniaiti ya emtikartata nuna úuntri anaikiatniun nui amuawai tuakma ejeturmaka nuka chikich aintiuk nawe ewej tsawant ankant susamuiti.

Akánu 246.- Umitiari nuyá takat jukitniuri ayu timiaitkiunkia tuakma yamaram najánamuka nújai takakmastatui, nuyá aintsank itiur irka atata, tarach ukujtiurmari, nampersamurisha másh najátamu atatu nuyá pujakmarisha awai. Nuyá aintsank ataksha amitiari iwiarki weakrikia utsumamujai métek najánar awajtiumaki wetiniaiti.

Akánu 247.- Tuakma nuyá núkap tuakma tsaniakainia núkap aents tuakuitkiunkia, kanakar chikich tuamu úunt najánawartatui (metropolitano).

Tura nú tuakma áinia tsaninkiar úunt tuakma najánatsa wakeruiniasha nunisank chikich wari iwiarnarma umikiaruit nuna umikiartatui. Nui takakmainia tuakar itiur eamrukartiniait nunaka najanawartiniaiti nuyá itiur amiktiniait, takat júamunma nunasha másh najatkar iwiarar awasartiniaiti.

Úunt tuakma (metropolitano) takatan tsaninkiertatui nui uchich tuakma nii nunken matsatainia nújai.

Úunt tuakma (metropolitano) umitiairi nájatmaka chikich tuatai amikiar najánawarua nújai métek jukiartiniaiti.

Akánu 248.- Irutkamu, tuakma, kawenma, úunt tuakma, matsatkamu, núkap kawenma nuyá úunt matsatkamu áinia auka nekamu ainiawai. umitiai tana nújai métek iwiarturma atatui, nuka úunt matsatkamu áiniana nui pachíamu ártatui nuyá iwiarnarar máshiniunu yayamu.

Akánu 249.- Tuakma nunka tesarnaikiamujai métek tepakmanum aintiuk nawe pujúiniaka akiknumsha tura warinksha nisha akantukar suamu ártatui, nusha tamajai métek umimtikiakur, másh irunu pénker iisar ayamrukma atatui. Nuyá umitiai tana nú pénker emesmakma aink tusa íistatui.

Akánu 250.- Kampuntin nunkanam nunka tepakua auka ii nunke pénkeri ana aun ayamriniaiti. Tuma asamtai másh enetka nunken iruntramu najátatniuiti, nuinkia máshiniu tuarka iwiarnatramu atatui umitiai tana nújai métek, aents pénker pujústinnia, akiknum, ikiam ana nuyajai nuyá nii turutairi áinia nújai métek, nunke pénker iwiarturma atiniaiti máshiniu tarimiat shir matsamsatniu amiak.

AKANKÁMU MENAINT

Naamka nii nunkénink takakmastin tesármajai métek

Akánu 251.- Nunka tesaramujai métek jeana anis nii úuntri tuarak (gobernador) anaikiartatui, ajapruamujai anaikiamu atatui. Tura nuyá chichakratin ainiaka arant nuyá ayamas pujúinia ajapruawartatui, tura aintiuk uwi takakmastin anaikiamu atattui, nusha tuakma jeajai métek anaikiamu atiniaiti, anaikiamu ninki tuakar úuntrinkia núankesh nuyá aishmanknaksha anaikiartatui.

Nunka nisha ankant tesamunam chichamruiniaka másh aentsri ituir pachínkiartata tusa amiktinia najátawartiniaiti.

Akánu 252.- Chikichkimas tuakma áinia ai chichamrin anaikiamu atiniaiti (consejo provincial), ajapruamujai yair tuakma, uchich tuakma úuntri áinia nú iruntrar umitiai áinia nújai métek.

Nuna úuntri nuú nuyá aishmank anaikiamuka chichamruk emtikiattawai, anaiyamunmanka tasmatai ajapruatniuiti, tura pujúshtatkunka páatkari ikiuktiniaiti nii tsanink namka áinia nuna.

Akánu 253.- Matsatkamu ainiaka nii úuntrin anaikiartiniaiti, nuka úuntri nuyá pachintuiniatia atiniaiti, tura pachiniainiaka tuakar patatkari anaikiartiniaiti. Nuna úuntri anaikiamuka chichamruk emtikiatniuiti, anaiyamunmanka tsamatai ajapruatniuiti, tura takatrin pujúshtatkunka patatkari ikiuktiniaiti.

Akánu 254.- Chikich tuakma (distrito metropolitano) úuntri anairamu ártiniaiti ajapruamujai, tura úuntri emtikiuka ajapramunmanka tasmatai susatniuiti. Nú tuakmaka

kanak irunar nii enentaimmijai takatan jukiartiniaiti tura akiknash umuchkartiniaiti.

Akánu 255.- Tuakma ainiaka, nii tukma anairamu takusartiniaiti, takakmastiniaiti, tura ya imia ajapruamuit nú úuntri atiniaiti. Nú takat jukitniuka amitiainiam ejeturma ana nújai métek takatan jukiartiniaiti.

Akánu 256.- Nunka tentakma emtikiaiiniaka nuyá chikich tuakma juiniaka nuka úuntri tuakmanum pachitkia ártiniaiti aninramunam iisarat tusa nuka Ecuadora Úuntri untsukmajai pachinkartiniaiti.

Akánu 257.- Iruntai tesaramunam tarimiat aents nuyá mukusa aents nuyá chikich ainiasha nii pujámuri nuyá tuakmarijai métek tesawar iruntrartin áiniawai, nuka nunke ninki tesawar yaksha pachischamu amitiai nuyá ninki ejeramu áinia nújai métek takatan jukiartiniaiti, nuka aents pujámu nuyá najántairi irunna nuna paant najána aintsank pachintiuk takatan jukitniuiti nuyá aintsank máshiniu imiantri arantamu tana nújai métek.

Irutkamu tuak nuyá matsatkamu tuakma áinia nuka tarimiat aents núkap tuakma pujuiniakuinkia niisha arantukar tarimiat niniunak tuaktin ankant susamuiti nuka tesarmawar ankant takakmasarat tusa nusha tuaktin juarkitsarkia aents tuakaru áinia nuka menaint jeak washimramu tana nújai métek utsuamu atiniaiti nú atsakuinkia najánachminiaiti. Jimiar tarimiat tesar iruntramakuinkia pénker chichasar tsaninkiar yamaram najanawarminiaiti. Amitiai najánamu nú tesawar ninkia tuaktinia juarainia nuka nújai métek amikiar juarkartiniaiti.

Akánu 258.- Atentra nunkaka ni tuakma emtikiuka ankant atiniaiti arant puja asa. Takat jukitniuka pénker iwiarnatramu atiniaiti amitiainiam ii nunke nuyá warinksha irunu itiur wainkiatniuti nújai métek jukitniuiti nuyá tarimiat pujústin tana nunisank umitiai tana nújai métek.

Nú takat juamunmaka Ecuadora Úuntri pachinkia atiniaiti turuutskesha atuari nuyá uchich tuatai irunna nuyásha pachinkiatniuiti atentra nunkanam irunar matsatainia nú, nuyá umitiai ya pachinkiatrata timia tana nújai métek.

Nú úunt iruntramua nuka iwiarnatrtiniaiti takat jukitniun, imian irunu umuchkiatniun. Nuyá úuntri nekaska aentsun anaikiatniuiti ya émamkes iis chichamruktata nuna.

Pénker atentra nunka tesamu akit tamajai aents arantia tarua nú emkar wakettsuk junakit tusa iisartiniaiti, núkap aents weankarat tusa tuma asamtai aminkiatniun taman umpuarartiniaiti pujamurijai métek.

Nui aents itiurkesh jeawaru pujúinia nuka máshi nui atentra nunkanam warinsha irunna nunaka pénker iis nuyá takastiniaiti aintsank ikiam nuyá nunké irunun wainkiatniuiti.

Akánu 259.- Ikiam nunka tepakmanum imiatkin irunna nuyá warinsha pujúinia nú pénker iintsat tusa tuakma nui áinia pénker iwiarnatrar nuyá amitiaijai najátawar takakmasartiniaiti turuiniak ii nunke nuyá warinksha irunun paant amajartatui.

AKANKÁMU AINTIÚK

Tesármajai métek iniakmámma

Akánu 260.- Máshi takat júamunam nuyá aintsank warinksha emkatin junaki weamunmanka warinksha yaimmia akuinkia pénker junaktiniaiti ii nunke pénker junakit tamajai nuka wari warinsha iruntai ana nújai métek.

Akánu 261.- li nunkenka juna najánatniuiti:

1. Nunka ayamruktin, pujámu iistin nuyá pénker matsamsatniun.
2. Chikich nunka pujúiniajai aujnais pujústinian.
3. Aentsri naarin anujratniun, arantia tarun nuyá aents juya yaja wearu naari peratniun.
4. M'áshiniunu iwiarnatratniun.
5. Ákik chichama jukitniun, ákik apujtai chichamruktin, arantia itiamun iistinian, ákik juramu iistinian, ákik chicham jusatin, arantiajai ákik sunaitiam jukitin, tumashmamu chichamruktin.
6. Unuimiatan, tsuamatain, pénker aents matsamsatniun nuyá jea takustinian chichamruktiniaiti.
7. Kampunniunam irunun iistinian nuyá nunka warinksha irunniun.
8. Nunka emesmamun irunna nuna is yaimkiatniuiti.
9. Arantia umitiai najanamu irunna nújai métek takat jukitniun.

10. Ujanaitiai nuyá chicham etsertai, arantia ujanaitiai áinian nuyá nanam iniatai áinia nuna chichamruktiniaiti.
11. Tsuramtartin áinia nuna, yawin, mukusa yawin, kurin, pachim irunu nuyá arak awena aratniun chichamruktiniaiti.
12. Nii nunke takakmatai irunna nuna pénker jukitniun chichamruktiniaiti.

Akánu 262.- Ninki nunka tesawar takata juinia nuka umitai tana nújai métek najanawartin ainiawai.

1. Iwiarnar nuyá chichamruktiniaiti nii nunke pénker tesamu ati tusa, nuka máshi itiur takakmainia nújai métek, irutkamu, matsatkamu nuyá úunt tuakma áinia nújai métek.
2. Entsa irunusha pénker arantukma ati tusa iwiartukiniaiti umitai tana nújai métek.
3. Iwiarnartin nuyá kankem wekatai nii nunkenin ana nuna pénker jukitniuiti.
4. Jintiancha nii nunke tepakma nui iwiaratniuiti.
5. Iruntramu najánma akuinkia akinma taman susatniuiti tura nii nunken tuakma iruna nunaka pénker takakmamu ati tusa iistiniaiti.
6. Wekas nekamu nekatniuiti, yamaram enentai akiatniuiti nuyá imiatkin takatai ejemak ainiancha chichamruktiniaiti nii nunkenin takat pénker jukimiu ati tusa.

7. Arak chichaman nii nunken emtikiatniuiti.
8. Yurumak pénke ati tusa nii nunken chichamruktiniaiti.
9. Nii takatri najanatniujai métek arantiajaish takakmastiniaiti.

Takat jukitniua nújai métek nii nunkénink amitiain najánatniuiti.

Akáu 263.-Apu nunka tesamunam takamainiaka amitiain tana nújai amiak jú takata najánatniuiti.

1. Iwiarnatar nii nunken tesaramu ejer máshi takatan juinia nújai métek jukitniuiti.
2. Iwiarnar nii nunken jintia iwiarkatniuiti nuyá tuakmanum ayamach pujuiniamunmanka najánachtiniaiti.
3. Nunken tesawar takakmainiajai takat jukitniun enentai jimiartuktiniaiti, máshi entsa nuyá uchich entsa áinia nú pénker wainkiatniun.
4. Kampunniuri irunna nuna chichamruktiniaiti pénker iisma ati tusa.
5. Iwiarnar warinsha nunka jujuraink arak jiniawaink tusa entsa ukatkatniun chichamruktiniaiti.
6. Waaka apampamu chichama jurus takakmastiniaiti.
7. Arak najánatniun chichamruktiniaiti.
8. Nii najánatniun amiak arantia yaimmiajaish takakmastiniaiti.

Ní takatrí amiak nunké tesamua nui umitiain najánatniuiti.

Akánu 264.- Irutkamu tuak umitiai tana nújai métek jú takata najanawartiniaiti.

1. Iwiarnar nuyá nii nunken tesar iwiaratniuiti tura takat júamuka chikich tuakma juinia nújai métek atiniaiti.
2. Nii nunken takat pénker jukimiu ati tusa wainkiatniuiti.
3. Tuakma irunna nui jintia wekataan pénker iwiaratniuiti.
4. Entsa, utsamak ukuptain, tsuat utsatai, ikiam shir ati taman nuyá chikich takatan umitiai tana nújai métek najánatniuiti.
5. Amitiai takat najánatin, ákik tesarma nuna najánatniuiti.
6. Kankem wekatoi tura warinksha muchitmia ana nuna pénker jukimiu ati tusa chichamruktiniaiti.
7. Tsuamatai, unuimiatai, jea najankatniun irunniua nuna másh susatniuiti, nuyá umitiai tana nújai métek, nakuncha chichamruktiniaiti.
8. Nii nunke itiu jea nuyá takat jukitin ejeramu atiniaiti, nuna najánatniuiti.
9. Imiatkin irunna nuna pénker umuchkiamu ati tusa pénker jurar anujramu nuyá nekamu atiniaiti.
10. kampunniunam nuyá entsa tampétri irunu nuyá aintsank pénker iisma ati tusa chichamruktiniaiti, aintsank umitiai tana nújai métek najánatniuiti.

11. Aents entsa, nayants áinia nuna pénker iisar nuyá nisha warinkish najánawarat tusa chichamruktiniaiti.
12. Entsa, kuri, kaya, naikim, nuwe irunainian pénker takakmasma ati tusa chichamruktiniaiti.
13. Keamunam nuyá warinkish akui yaintiniaiti nuyá ikiamnash kishmaktiniaiti, aintsank kampunniunmasha keakui.
14. Nii najanmari amiak, arantiajaish chichas warinkish waitmakminiaiti.

Ni takatrí jukitniua nuna amiak, nii nunkénink umitiai najánatniuiti.

Akánu 265.- Nunka iwiarturmarin niniu amitiairinkia Ecuadora Úuntri nuyá irutkamu nunka tuakma pachintiukma atiniaiti.

Akánu 266.- Úunt tuakar kanakar takata juiniaka irutkamu tuakma takatan juinia nunisank atiniaiti, nuyá chikich tuakma ainia nunis turasha amitiai nújai métek.

Ni penkerin takat juamunam amitiai áinia najánawar takatan pénker jukiartiniaiti.

Akánu 267.- Irutkamu áinia auka jú takatan najánawartiniaiti umitiai tama nújai métek.

1. Ni nunkenink pénker tesarma ejek chikich úunt tuakma ayam áinia nújai takatan imiatrus jukiartiniaiti.
2. Iwiarnar, ni tuakmarin utsumamu áinian, jea nuyá

chikich áinia chichamruktatui, nuyá akikriniash másh pachintiukar tesaramu atiniaiti uwijai métek.

3. Iwiarnatar chikich tuakma áinia aujai ni nunkeyan jintia chichamruktiniaiti.
4. Irutkamunam arakmakarat tusa chichamruktiniaiti, nuya kampunniunam irunna nusha penker iisma ati tusa.
5. Chichamruktiniaiti chichama ututniak nuyá iistiniaiti yaimmia chikich tuakma ainia susamu pénker iisma ati tusa.
6. Irutkamu najanainiamun, tura chikich irutkamu áinia ausha pénker tuakar takasarat tusa chichamruktiniaiti.
7. Arantia yaimmia ati tusa chichamruktiniaiti.
8. Takat susamu áinia pénker amikiarat tusa iistiniaiti.

Ni nunkenink takatan itiur umiki weartiniait nuna najánatniuiti.

Akánu 268.- Amitiai najanamua nújai métek tuakma áinia takata juinia nu iirsamu atatui emesmakma nuyá yajauchi ákik umuchkamu aink tusa, tura aintsank itiurchat akuinkia pachiniak jeamujai métek yaimkiatniuiti.

Akánu 269.- Nirin takat juamun amamkes iisartin tuakar najanamu atiniaiti, nuka jú takatan najánawartiniaiti.

1. Tuakma ainia takatan umikiartiniaiti tsawan tesaramu áinia nuna iirsartiniaiti, tamsain tusa, takakmainiaka

pénker jukiartiniaiti, nujainchuka jú tuakma wárik
iruntratniuiti pachiniak.

2. Takat jukitin akantukma áinia nuna amitiiaijai métek
iirsartiniaiti.
3. Arantak takatan kanakar tuakaru juinia nuna
uminiawash tusa iisartiniaiti iwiarnar takata juinia nújai
métek.
4. Takat juamuka juni umuchkatniuiti tusa, arantiak
namkaru jintintiawartiniaiti.
5. Takat juamu, kanakar tuakaru áinia nui itiurchat
umuchma akuinkia tui takainia nui wenak iisar jintiawar
itiurchatash iwiarnartiniaiti, nu itiurchataitkiunkia aarma
amiktin tama nújai amintikin áinia nui jukiartiniaiti.

AKANKÁMU EWÉJ

Kuitnia aujmatma

Akánu 270.- Ninki tuakaru áinia nuka ninki akiknaka
aakar najanainiawai, tura aintsank ii nunke akikri áinia
au tesaramu atiniaiti, nusha akikkia métekrak akantukma
atiniaiti.

Akánu 271.- Kanakar tuaku áinia nuka ákik akantura
suamunam pachinkiertiniaiti máshi tesasar susatniu métek
susamu atiniaiti, tumak tumashmakma kuitiaitkuinkia
nisha tumashin jimiartawai.

Akik uwijiai métek akantuka suamuka, wárik tura métekrak
susamu atiniaiti, nuka ákik enketai chikichik máshiniuna

ana nui enketamu atiniaiti, chikichkimiar ni akikri jutainiam enketamu ártiniaiti.

Akánu 272.- Ninki tuakaru akikia achik sukartamaka pénker iirsamu atiniaiti tuma asa umitai tama nújai métek umuchkartiniati, nuyá jú enentaijai.

1. Aents tuakmajai métek.
2. Aents tuakar pujúinia utsumamujai métek.
3. Ákik susamun pénker umuchkiar emkiar wenakui yainmia nújai ákik suki weamu atiniaiti.

Akánu 273.- Ákik umuchkiartin timiatus enkema atsakuinkia tuak takata juinia umuchkiartiniati, nuyá aintsank ákik atsakuinkia enketamu achatniuiti.

Aintsank tuaka takakmamunam utsumamu itiur ejeratniuit nunaka chichaman iwiarin junaitramu tana nui Ecuadora Úuntri akupkamujai ejeramu atiniati.

Antsu warik júamu, nuyá chikich wárik utsumamu akuinkia akik susarma atatui.

Akánu 274.- Ninki tuakar takakmainia nunken yawi, mukusa yawi tura chikich imiatkin akuinkia, suramunu ákik akantukar susamu atatui, umitai tana nújai métek.

TESÁMU VI

Émkatniunu Tesárma

AKANKÁMU CHIKÍCHIK

Máshiniu juarmari

Akánu 275.- Takat máshi tuakar júamu, máshiniunu emesmatsuk ákik tesaramujai métek, enentaimmijai, najántaijiai nuyá kampuntin tepakmajai métek, pénker tarimiat aents pujústín tamajai jea atiniaiti.

Niniu amimtikkiar jukitniu nújai métek ii nunke máshiniu yainkiata takatan jukittiwai másh métekrak takurmasarat tusa, nuka iwiarnatmanum pachikiartin ainiawai.

Tarimiat pujustinkia, aents irutkamu, tarimiat aents pujúinia nú niniuri amirmajai warasar pujusarat tamaiti arantunaikiar, pachinaikiar enentai yapajtunaiyawar.

Akánu 276.- Emkatniun chichamruiniaka jú enentai ejerartiniaiti:

1. Pujamunam emkarat tamajai, nuyá pampararat umitiai tana nújai métek.
2. Yamaram ákik chicham jukitin, nekasenk, máshiniunu, arakna, tsankamkamu, máshiniunu tama, nuyá takatmash pénker waitmakar takakmasarat tama atiniati.
3. Pachinkiarat aents nuyá niniuri pénker, iirsamu, métek áarat warinmaksha pachinkiarat tamaiti.
4. Ii nunke irunu emenkakchatai, pénker, tsuatmachma,

takatcha máshi susamu, nuyá entsa irunusha pénker wainkiamu áarat tamaiti.

5. Ii nunke iistin, nuyá yamaram nunka tesaramu áinia nui pachisma ati tama, nuyá aintsank arantunaikiar manitsuk matsamsatai tamaiti, máshi nunkanam.
6. Nunka máshiniunu tesarnaiyamu ati, nui akiksha pénker enkemkui takat jukimi tamaiti.
7. Ayamrukar yainktiniaiti pujútai, najántai, ii turutairi irunna nú, ataksha timiatrusank ati tamá nunisank.

Akánu 277.- Tarimiat aents pujústin tamaka nekaska ii nunke takatrinti:

1. Aentsu imiantri iirsatin, máshiniunu, nuyá ii nuken irunu.
2. Umuchkatin, iwiarnartin nuyá eseturtin emkatin chichamramu.
3. Máshiniu enentai júamu enkeatin nuyá amimtikiar nuyá amiachkui asutiatin.
4. Imiatkin najánatin, jea jemratin nuyá máshiniu uyumak najánkatin.
5. Ákik chicham emtikiatin tuakma ejekatniua nújai umitia métek atiniaiti utsumamu chichamramujai.
6. Enentaimmia nuyá nekamu yamai enentai áinia nusha emtikiatniuiti, yaunchu najántai, nekawarma nuyá irutkamu nii pujámunam wari najántai iruna nújai

métek, nuka másh tuakma áinia nuwaiti.

Akánu 278.- Aents pénker matsamsatin tamaka nuyá tuaku matsatainia nunaka jú ainiawai:

1. Tuke másh enentai júamu áinia ai pachinkiertiniaiti, takat iwiarnatmanum másh nunka tuakma emtikiatniunam nuyá aintsank nú iwiarnatramu itiur umuchkattaj nusha najánamu atiniaiti tuakmajai métek.
2. Najánar, yapajiar nuyá yaimkiar takakmasar yurumatin matsatma aintsank kampuntin arantukar.

AKANKÁMU JÍMIAR

Emkatniunu másh irunturar iwiarnarma

Akánu 279.- Takat iwiarnattai tuakma ana nuka máshiniu pachik takatan iwiarnatratniuiti emkatin enentaijai. Nuka imrinink tuakartatui nuinkia másh Ecuadora Úuntri takat júamunam pachiniainiana weatkari, atuintri nú pachinkiertatui, aents pachinma juinia, nuka iruntram takauri atiniaiti nuiti muchitruktinkia. Juna takatrinkia itiur umuchnaktata nuna chichamruk esetiniaiti, nuyá máshiniu iwiarnatramun ayu pénkeraiti tiniuiti nuka Ecuador Úuntri emtuktiniaiti.

Nuyá kanakar nii nunkenink tuakaru áinia nusha aya úuntri áinia nuke pachinkiertiniaiti takat iwiarnatmanumka nuyá amitiai tana nújai métek atiniaiti.

Nuna chichamrin ainiaka máshi nekamu nuyá pachinkiar anaikiamu atiniaiti, enentai takusartiniaiti takat pénker jukir

ii nunke emtikiatniun.

Akánu 280.- Emkatin máshiniunu iwiarnatramuka nújai emkatin nuyá takat jukitin timiaiti, nújai takat nuyá máshi itiur émki weartataj nuna etserui, nuyá aintsak akiksha itiur akantramu atiniait nuna juawai, nuka ii nunke úuntrijai nuyá kanakar iruntrarú áinia nújai tsaninkiar emkatniun iwiartiniiaiti. Nii tamaka nekaskete timia atiniaiti tura takatrinkia iirsamu atiniaiti.

AKANKÁMU MENAINT

Yurumkanam yaimtai

Akánu 281.- Yurumak chichamramuka imianaiti nui enentai awai aents tuakmanum, tuma asa ii nunke takatrinti máshiniu , aents yaintinian , irutkamun, tarimiat aents pujúinia nui, máshi pénger yurumkan takusarat tusa, nii itiur pujú áinia nuyá warinia yu áinia nújai métek tuke susamu atiniaiti.

Nuka ii nunke takatriyaiti:

1. Arak emtikiatin, yurumak najánatin, namak ishichik nuyá núkap apampartin irutkamunam tura uchich surin atin ákik waitmaktasar.
2. Ákik enentai irutkamunam enkeatin, tura ákik jusar ii nunke susamujai takat emtikiatin nuyá namakan apampar surin áinia au, ii waitmamu iinink yurumatin suramu ati tusa yaja sumatsuk.
3. Itiur arakmatain tura nunka emesmatsuk kuit wainkiatin enentai suamu nuyá tanku áinia au apampartin.

4. Nunka máshi takustin tama, entsasha nuyá chikich ii nunke irunna nusha.
5. Ishichik nuyá núkap arakma apampar surin áinia nú ákik akantukar yainkiartin nuyá itiur apamparartata nusha aintsank chichamrukma atiniaiti.
6. Nuyá aintsank yaunchu arakmatai, apampatai, tanku waintiai áinia nú enentaimtikrartiniati nuyá aintsank araksha yapajiawar arakmaki wetin enentai susatniuiti.
7. Yutai tanku apamparma pénker tsakatmakma ártiniati, nuyá sunkurmakcha timiattrusa wainkiamu yuamnia arat tamaiti.
8. Nuyá núkap emkatin nekaki wetiniaiti, yamai yamaram enentaijia métek wetiniaiti yurumak pénker istin tamajai.
9. Pénker warinksha shiram ati tusar chicham jurukmia nuyá émamkesar nekamu atiniaiti, yaja pénker warinksha wainkia surutmaktin tusar.
10. Surin áinia nú tuakar iruntrar arakan nuyá tanku apampamu emtikarat tura surutmakarat tusar iwiarturtiniati arant ayamas pujúiniasha máshiniu métekrak suruktiniant iisma atiniaiti.
11. Nuyá takat júamu métek, pénker jurukmia atiniaiti yurumak chichamramunmaka nuyá yurumkajai ya imian takakma nuka etsertukma atiniaiti.
12. Aents, metsanjainksha, amáajainksha, nuyá nunka yumpunmajainksha waitiainiakuinkia yurumkajai, tsuakjai, entsataijiai yainkma ártiniati. Nuyá arantia

yurumkajai yaimmia áinia auka ii yurumkari emestsui
tuma asamtai yuamu atiniaiti.

13. Aents yurumka nankamasun, meserun yuawaink
tusa iirsamu atiniaiti iniashi emesin asamtai.
14. Imiatkin áinia nú tura yurumak isma sunaisamu atiniaiti
ii arakri nuyá apampamuri paant amajkur, surin áinia
ausha nuyásha aminiaiti.

Akánu 282.- li nunke nekaska nunka pujámu pénker iisma
ati tusa chichamrucktui nuka máshiniu nunka pujáinia
nunaiti. Nunka wainkiatin tusa ákik tesaramu amitiai tana
nújai métek atiniaiti nuka aentsu nunke pujúinia nuna
pénker iirsamu atiniaiti.

Nunka úunta nerenniuri atsutniuiti tura aintsank entsa
nuyá jitkiamurin yaksha nerenniumatin atsawai.

li nunke entsa iistinian nuyá warinma imianait nunaka
iistiniaiti, nuka arak ukatmanumsha nekaska entsa imiantri
tana nújai métek nekaska kampunniunam nuyá pujámu
pénker wainkiur.

AKANKÁMU AINTIUK

Kuitnium yaimtai

TÉSAK CHIKÍCHIK

Kuit tesarar nuyá chichamruktin

Akánu 283.- Ákik chichamramuka máshiniuiti nuyá
tsankamkamu; aentska ajaperinti nuyá nii najánui;
máshiniu tuakmanu métekraknakete, nuyá ii nunkenu,

surutai áinia nuka ii pujámujai métek, asantai arakmatin nuyásha aratniun imianu suawai tarimiat pujústin enentai ejeak.

Ákik chichamramuka pachiniui ákik máshiniu itiur umuchkattaj nújai métek, nuinkia máshiniu, kanakar pujúinianu, nuyá yanaksha ii nunké pujúinianuka, aintsank umitiai tana nújai métek. Umitiai tana nújai métek ákik umuchmaka takakmantsattui nuyá aintsank tuakaru matsatka nuyá irutkamu áinia nusha pachikma ártiniaiiti.

Akánu 284.- Ákik chichamramuka juna enentai ejeawai:

1. Ákik enkemu pénker akantratniun nuyá warinmaksha awemamua nuwaiti.
2. Máshi nunkanam arak enentai atiniaiiti nuyá arakma ipiampamu, aintsarik arakmamusha yamaram enentaijiai pachiamu atiniaiiti, nuyá aintsank ii arakrishá másh nunkanam nekamu paant juaktiniaiiti, ii nunken pénker juaktiniaiiti.
3. Ii yurumkari pénker iwiaratniuitji ayashin iwiarin asantai.
4. Nuyá aintsarik núrانت ipiampamu atiniaiiti pénker najátamujai, nunka tesamu nuyá aents niniuri najántaiya nú arantukar.
5. Ii nunken métekrak emtikma atiniaiiti, nuyá tesamu áinia nújaisha pachinma, kampunniunam, nuyá aents tuak pujúiniamunam, akíknun, pujámunam nuyá najántainiam.

6. Takat waitmaktinniam emtikiui, takat waitmaktin tama umitiai tana nújai métek.
7. Ákik tamsachtiniaiti ii nunken tuma asamtai ákik wainkiatin núkap chichamrukma atiniaiti tsawant nekapek.
8. Surutai áinia aisha pénker waitmakma nuyá paant najánamu atiniaiti pénker yapajiamusha atin tamajai.
9. Máshiniu yurumkartin arat tusar utsukma atiniaiti, nuyá pujámunam tana nusha arantukmajai.

TÉSAK JÍMIAR

Kuitnia chichamramu

Akánu 285.- Takat ákik chichamna júamu jú enentai akantramu takakui:

1. Takat júamu ákik akantukma, umuchma nuyá imiatkin sumarmaiti.
2. Ákik enkemtainiam enkemamtai métek akantratniun, juamuka métek atiniaiti.
3. Ákik wainkiatniua nunaka máshiniu wakerukma atiniaiti nuyá utsumamujai timiatrusank.

Akánu 286.- Ákik másh tuakma akanturma áinia nuka, pénker paant najánar umuchkiamu atiniaiti itiur umuchkatniuit nújai métek nuyá ákik tuke tamsachu atiniaiti.

Ákik umuchkiamuka enkema nújai métek atiniaiti. Aintsank unuimiatnum, tsuamatnum nuyá nekasenk umuchkiamu atiniaiti, tura taamsamtaish seammia nújai ejekamu atiniaiti.

Akánu 287.- Ákik tesaramu áinia nunak umuchkiartin ainiawai tura chikichnumia akienkema umuchkiachminiaiti ayatik ninki tuakar akikia umuchinia nuke umuchkiamniaiti nuka umitiai aarma nújai métek.

Akánu 288.- Máshiniunu imiatkin sumanna nuka pénker atiniaiti, másh nekamu, imian, nuyá aents wakerukmin. Nuka juyank ii nunkéyank sumakma atiniaiti antsu arantia yaimmia ainiaka warinchuiti nuyá aintsank chíkich juyank uchich nuyá úunt surutai takakainia nuyánka sumakminiaiti.

TÉSAK MENAINT

Máshiniu tumashmamu

Akánu 289.- Kuit tumashmamuka máshiniuiti másh nunka tesarma nuna nuka iwiarnarmajai umuchkiatniuiti tumak úunt umuchkatniunuka nuna chichamrin áinia timian atiniaiti nuyá kuit umuchtai umpuarma nújai métek junaktiniaiti. Ii nunkenka ákik umuchnaktinian aentsu pachia najánatniuiti nú akikia iisarat tusar.

Akánu 290.- Kuit tumashmamuka juna amiktiniaiti:

1. Kuit takakma tameakui arantia nunkajai ákik tumashmaktiniaiti.
2. Tumashmamu ii nunken, ii imiantrin, tarimiat pujústinian ii nunken emesmachkuinkia najánatniuiti.

3. Tumash kuit ikiamsamujainkia nekaska warinksha iwiarnatramu nuke takat jukitniuiti nuyá jeamratin turutskesha akikmaktin jeamujai métek. Nuyá tumashmaki weminiaiti pénker ii eakur nunke emkamnia akuinkia.
4. Kuit ikiammaka namkaru nuyá chikich enentainiua nuchaiti máshiniu timiaiti.
5. Kuit ikiamsamu imiancha juakminiaiti nuna unuimiatin unuimiatrar nekwarmatainkia. Tura nekanamtainkia ataksha awakeki seamma atiniaiti.
6. Kuit imiancha ya umuchkia nuka takakmamuri nuyá amitiajai iisma atiniaiti.
7. Kuit tumashmaka ikiamsamun yaksha nerentin ajaschamniaiti.
8. Kuit tumashmaka ikiamsamu umuchkatniunka umitai tana nújai métek ii nunke úuntri umuchkatniuiti.
9. Ii nunke úuntri iistiniaiti kanakar iruntrarú áinia nusha kuit tumashmaka ikiamsa takakmasminiashit nuna.

Akánu 291.- Umitai umpuarma tana nújai métek kuit umuchkatniun chichamruiniaka takata jukiartiniaiti nukechuiti, pujamusha nuyá tuakmasha máshiniu tumash akikmankatin asamtai nuyá aintsank tuink ákik amuchnakat nújai métek. Nú tuakmaka ákik umuchma iisartiniaiti, nuka máshiniunu tumashmamun, awakeamun, nuyá umuchkiamunam warinksha waitmanun nuyá aintsank ataksha tumashmamun.

TÉSAK AINTIÚK

Máshiniu Kuit Enkémma

Akánu 292.- Kuit ii nunke takakmaka nekaska enkemu nuyá umuchma chichamrawai, nuyá aintsank ákik máshiniunu umuchma nuna iistiniaiti, nusha antsu ninki akikia umuchinia ainkia enkemeatsui.

Akánu 293.- Kuit Ecudornu ana auka nekaska takat jukitin iwiarnatramu ana nújai métek atiniaiti. Tuakar iruntrarú áinia auka chikichik tuakuru áinia nújai métek akantrurma ártatui nekaska máshiniu takat jukitin timia najánamu ana nújai métek warinsha takat júamu tsurintsuk.

Ankant kanakiar takata juinia auka ákik chichamramu máshiniu júiniana nunisank jukiartiniaiti nuyá nisha tumashmainiawai ii nunkén ákik umítiai tana nújai métek atiniaiti.

Akánu 294.- Ecuadorá úuntrinkia uwi nekapek ákik urutmak umuchnakat urutmak utsumna nuna najánatniuiti nuyá aintsank aintiuk nantu jeajai akantratniuiti. Kará atin áinia iistiniaiti uwijiai métek ákik tesámu nuyá aintiuk nantunam akantramua nú amitiai tana imiatrusank ati tusa nii ayu titiniaiti turutskesha iwiaramu áti tusa seamtiniaiti.

Akánu 295.- Ecuadorá úuntrinkia kará atin áinia nui ákik itiur umuchnaktata nunaka uwijia métek nuyá aintiuk nantu tesarman awastiniaiti nekaska usumtai nawe tsawant takakui nú awastinian uwi juarmanumia juarki. Nunaka tuakma ayu titiatui turutskesha iwarata timiniaiti chikichki jianaitkiamujaink. Antsu ni warinkish tachakuinkia tsawant nakamasmatainkia ayu timia ainas juawai. Antsu warinksha iwaratin akuinkia wárik iwaratniuiti máshiniu utuakmajai.

Antsu iruntai tuakma iwiarata takuinkia Ecuadora úuntrinkia nawe tsawan tesaramujai ataksha iwiaratniuiti, tura ataksha akupkattui, nuyá aintsank tuakmasha nawe tsawantjai ayu tinia umpuartiniaiti chikichki jianaitkiamujaink, menaintiunam akantukmaiti. Nuyanchuka wárik ákik umuchkiamu atatui najánamua nujaink nuka Ecuadora úuntri najánatniuiti.

Yamaram Ecuadora úuntri enkemkunka yaunchu ákik tesaramua nujaink juarkitniuiti. Warinksha ákik patatnak umuchnaktiniaitkiuinkia tuakma nekamu atiniaiti umitiai tana nunisank.

Másh ákik umuchnaktin nájanmaka ukma achatniuiti máshi etserkamu nuyá nekamu atiniaiti itirkesha, chicham nekatainmanksha.

Akánu 296.- Ecuadora úuntri ujúk nantu jeamtai Kará atin áinia nui ákik umuchkamu etserkatniuiti. Aintsank nunka tesaramun umuchinia ausha nii ya iisma áinia nui ujúk nantutin etserkartiniaiti. Umitiaijai métek asutimiau ártatui ya imian akikia umuchkiara nuka.

Akánu 297.- Kuit máshiniunu enkaemu nuka, umuchkiamuri ejetukma nuyá tui jeawait nusha nekaramu atiniaiti tsawant tesaramujai métek emkatin iwiarnatramu tana nújai métek atiniaiti.

Tuakmanum yá ákikia imiancha umuchkiaka umitiai tana nújai métek etsertumtikiamu atiniaiti, tura aintsank ákik umuchmanka aents nii nunké pujúinian ujakartiniaiti.

Akánu 298.- Ákik ataksha awakeki enketamu atiniait, unuimiatai, tsuamatai, úunt unuimiatai, nekamu

eaktinnium, nekamunu, yamaram enentainiu nuyá umitiai tana nújai, nuka akikia utsumamujai métek. Nuyá chíkich ákik antrar enkeatniuka surimkiamuiti.

Akánu 299.- Kuit Ecuador tamaka nekaska kuitia nantuje ikiutai Banco Central nui takustiniaiti nui akantukma atin uratmiash atiniaiti.

Banco Central chikich tuaku áinia nunasha ákik enketatniun niniun akantukartiniaiti, uratiartiniaiti nuyá chikich uraimnia áinia nuna.

Kuitia nantuje máshiniua nui tuakaru áinia nuka akiknaka umuchkiartiniaiti, umitiai tana nunisank. Tura umitiai nekasenk najátkartiniaiti itiur akikia umuchkiartata nunaka. Tura suritkiamuiti kuit umuchkiatin úuntri ayu tachamujainkia, ayu timiajai umuchkiatniuiti.

TÉSAK EWÉJ

Kuit Júamunu

Akánu 300.- Ákik akikmamu jú áinia nuka máshiniunu paant, apampar, pénker umuchak, paant najána, pénker juuk takakmastiniaiti. Nakak akíknaka umuchkartatui.

Ákik juamuka máshiniu utsumkaria nú enéntaijai umuchnaktiniaiti ni takatrí warínmaksha emtikiarat tusar.

Akánu 301.- Úuntri enentai jusamujai nuyá amitiai chicham juamunam tana nújai asutiamujai, iwiarartniuiti, iniankaktiniaiti nuyá akinrincha akantuktiniaiti. Ákik enketai akantukma najánatatniuiti umitiai tana nújai métek.

TÉSAK UJÚK

Kuit chichamramu, yapajitiai, ikiámtai nuyá kuitjai yaimtai

Akánu 302.- Kuit chicham jurusma, ikiamtai, yapajitiai nuyá kuit juamu chichamka juní jeamu takakui:

1. Ákikmamu pénker enektin utsumamujai métek ii nunken ákik chichamna pénker chichamrukma ati tamajai.
2. Máshiniu akikmatai akanturtin pénker ákik amuchkiamu junakit tamajai.
3. Ákik umuchkiachma ampiniarmatainkia utsumamu iisar iwiarar umuchka atiniaiti ii nunkenkia.
4. Ákik enkema nuyá umuchkiamu juamu pénker iwiarturar jukitin takakma nuyá ákik wainmajai ii nunken núkap ákik iwiasmaka umuchkiamu ati tamajai, amitiai tama timiatusrik akiksha umuchniakat tama atiniaiti.

Akánu 303.- Kuit chicham, ikiamma, yapajitiai iwiartamuka nekaska Ecuadora úuntri enentai ejek umuchkiatniuiti, tura aintsank akikia nantuje nújai takakmastiniaiti. Amitiai itiur umuchnaktata nunasha ejerattawai, tura ákik ii nunkenka itiurchatchajai umuchnaktiniaiti ii akikrinkia.

Ákik chicham ejeturmaka akíkia kutankrí máshiniunu tamána nújai métek junaktiniaiti.

Kuitia yantuje níriya (Banco Central) nuwaiti nekaska ákik mashiniunu umuchkiatniuka, nú takakmastinkia, ákik umuchkiatniuka umitiai tana nújai métek takakmastiniaiti.

TÉSAK TSENKEN

Surutai enéntai jurúisma

Akánu 304.- Surutai enentai jusamuka juna amiawai:

1. Takakmastin, emtikiatin, nuyá enentai enketatin itiur ii nunkenin warinksha surutmakar ákik wainkiatniuit nuna, máshi tarimiat pujústin iwiarnatramua aintsank.
2. Tesaratin, chichamruktin nuyá takastin ákik chichamramunam máshi nunka juinia aintsank ii nunkencha ati tusa.
3. Arak emtikiatin nuyá máshi nunkanmash ii arakri paant amajsatin.
4. Ii yurumkarin nuyá inink tsuaramtartincha emtikiamu ati tamaiti métekrak takustin tamajai.
5. Ákik metekrakna ati tusa chichamruktinaiiti tura suramusha nekasenk ati tusa.
6. Suramunam chikichkiniu iisma nuyáanchuka yanaksha iisma aink surutmataisha máshiniu ati tusa iisma atiniaiti nuyá surutainmasha nutiksank.

Akánu 305.- Akíkmaktin patasrik nuyá itiur umuchnaktiniait nunaka Ecuadora uuntri timia atiniaiti.

Akánu 306.- Ecuadora úuntri chichamruktatui nunka nuyá yawirisha pénker jusamu ati tusa, nujainti aents ii nunke matsatainiasha ákik iwiarkamu takatcha pénker susamu ártin, nuyá aintsank takakmau, imiatkinjai áinia ausha yainkma arat tu enentaijjai.

li nunké matsatainia nuna pénker takarsamu arat tawai tura takat pénker iwiarnatramu junachkuinkia chichamrukma atiniaiti.

Akánu 307.- li nunke takat aents misumran nuyá nekasna suamuka máshiniu warinmaksha waitmachu atiniaiti, aentsu núkap unuimiarmajainkia pachitsuk susamniaiti.

TÉSAK YARUSH

Kuitnia najátamu

Akánu 308.- Chichamka máshiniunu timiaiti, nuyá takakmasarminiaiti nusha úuntri ayu timiajai amitiai tana nunisank; ákik enkear pénker waitmaktinjai nuyá utsumamu ana nújai métek najánatniuiti ii nunke emtikiatniujai. Ákik waitmamuka arakmar apamparar ii nunken suramujai wainniawai iinin irunna nu pénker iismajai.

Akiknanka ii nunke chichamruktatui nuyá másh susamu, ikiasma, ati tusa, antsu ákik achitin, kasamkatin, atankitin atsa timiaiti.

Ákik máshiniu pénker jukitin, ankant tuakar takakmainia aunuka pénker takata jukiarti timiaiti, turasha ii nunken pachitkiatsu tuma asamtai imiatik akuisha yainchatniuiti, ninki takatrinkia pénker juakmij tusar, tura antsu ákik pénkercha umuchnakaink tusa iirsamu atiniaiti, ninki turutskesh máshiniunu takainia nui.

Akánu 309.- Ákik ii nunke chichamramuka, máshiniu niniuk, nuyá takamtsuk pujúinianu, antrarik suamuka máshiniu akikri chichamrajnia nunaiti. Tuma asa chikichikimias ni amiktinri takusartiniaiti, tuma asa pénker

iisma nuyá paant takakmamurisha atiniaiti. Juka tuakma ankant atiniaiti nuna takatri juiniak iistiniam, takat júamu asutiamu atiniaiti ni takat juamurijai métek.

Akánu 310.- Ákik chicham juamuka, ikiaunkatin enentai jukitniuiiti, pénker máshiniu, nuyá métekrak sunastin. Ákik ikiammaka núkap arak, apampamu, nuyá nui kuit jikmia ati tu enentaijiai junaktiniaiti, iwiarnatra nájanmajai.

Akánu 311.- Kuit chichamramu irunna auka, tuakar akikiar ikiurmasar, ikiamsar nuyá irutkamunam tuakar juiniaka nisha yainkma artiniaiti, nuka máshiniu yaimniaktin enentaijiai juinia asamtai.

Akánu 312.- Akik juamu nuya chichamrin ainia auka timiatrus nakak pachiniatsui, chikich akinia umuchinia nuinkia.

Chicham etsertai achiakainiaka kuit chichamnumka pachinkiachmin ainiawai nuka suritkiamuiti.

Ninki takat juamurin imiaschamniaiti, tura chikich uchich tuakar takat juamu irunna nusha aintsank.

AKANKÁMU EWÉJ

Tuakma juamuri, yaimmia nuya mashiniu surin

Akánu 313.- li nunke takat akik chichamna juamun iistiniai, ii pujamuri penker iistinia nújai métek junakit tusa tura ákik umuchmasha paant nuyá pénker iisma ati tusa.

Tura akik umuchman iin áinia nuka, máshiniu pujámunam ákik shir umuchkiaru tamsachu ati tusa máshiniuini

iistiniaiti.

Kampunniuna irunu, tsuramtartin, wekatai, nunka irunu nuka pénker arantukar iisma atiniaiti.

Akánu 314.- li nunke takatriyaiti aents máshi entsa takusarat tusa, nuyá arak ukatain tsuramtaitinian, Chicham etsertain, jintia wekatain jea jeamratniun, nuyá nanam wekatain jeen nuya chikich amitia tana nujai metek.

li nunkenka máshiniu yainkma nunaka ni amiktinrinti, máshiniu, métekrak, pénker esetramujai, máshiniunu, enkemrut, iwiartut, tuke nuyá imian atiniarti nuyá aintsank akikri iwiaktinniash apujsatniuiti.

Akánu 315.- li nunkenka takat emtuktiniam najánkatniuiti, takakmauri núkap atinian ii nunken irunun juktimian, máshiniu imiatkin ainian, nuyá chikich ákik chichamna.

Nuyá máshiniunu takakmauri ánia nuka umitai tana nújai métek takat jukimiu atiniaiti, máshiniunu.

Tura takat juamu akikian itiairarka ni utsumamu irunna nuna ataksha iwiarnatar jukitniuiti akikia awakekchatniuiti, nuyá nuna akikia umuchkacharka ataksha ákikia nantuje awakeki enkeamu atiniaiti.

Amitiai tana nú nekaska itiur takata jukiartatui, ii nunke ákik umuchkatniuka máshiniu ejeturmaiti.

Akánu 316.- li nunkenka imiatkin iruna nui nuyá máshiniu timia áiniana nui takata jukiartiniaiti, nui akupkamuka arantuktatui tsawant akanturma tura aintsank umitai tana nunisank.

li nunkenka, ankant ancha atuktatui ákik máshiniunum umítiai tana nunisank.

Akánu 317.- Ikiamnum imiatkin ataksha atsapaichmin, nuyá chikich áinia auka máshiniu ii nunkenuiti nuna takareak ni itiur jukitniuit nunak máshi aents matsatainuanu atiniaiti.

Akánu 318.- Entsaka ii nunkenuiti tuma asa máshiniuiti, kampunniun iwiarin asa tura aentsu iwiakmarin yaimin asa tuma asamtai nerenumatin surimkiamuiti.

Entsanu aujmatkunka, ninki najánastiniaiti, máshiniu pachinkiamujai emtikiatniuiti.

li nunkenka muchitruk pénker iistiniaiti tura aents pujúiniasha aintsank nuna iiniaka aents nekamu atiniaiti nuyá irutkamunmaya. li nunkenka irutkamunam itiur entsa waintiain nuna neka pénker nújai métek wetiniaiti nuyá aintsank chikich tuaku áinia aujaisha tsaninkiatniuiti.

li nunkenka éntsa úuntri anaikiamun takata suratniuiti, éntsa emesmatsuk warinksha itiurtsuk itiur éntsa wainkiatniuit nui enentai apujatniuit nuyá umítiai umpuarma tana nújai métek takakmatiniaiti.

AKANKÁMU UJÚK

Takat nuyá arakmar ipiampatai

TÉSAK CHIKÍCHIK

Arakma ipiampatai nuyá chichamramu

Akánu 319.- Kuit najánatin, wainkiatin, tuakma najátatniuiti, irutkamunmash, tuakma, akikia wainin niniunak tura máshiniu, nuyá nuatak aentsuk tuak ákik waitmaktinniash najánamniaiti.

li nunke chichamruktatui aents pénker matsamsarat niniuri emésmatsuk, aintsank máshiniu shir warasar pachinkiarat tusa.

Akánu 320.- Wari wariksha tuakma atiniaiti ákik wainkiataj takurkia tuma asamtai paant amajas takatan jukiartiniaiti máshiniu.

Takat warinkish apampamuka pénker enentaimsar arantukar, eseturar najánamu atiniaiti.

TÉSAK JÍMIAR

Takurmakma niniuri

Akánu 321.- li nunké niniuriniak takainia nunasha pénker iireawai, irutkamuncha aintsank, tuakmancha, nuyá chikich túatai áinia nunasha turasha nunke irunna nuna pénker iisarat tawai.

Akánu 322.- Aentsu enetaimtairincha nuyá nekamurincha arantawai amitiai tana timiatrusank máshiniu ati tusa, nuka yamaiya enentai emki wea nújai métek enentaimsamu

najánamu atiniaiti nuyá aintsank nekamuka yaunchu ii úuntri nekatai armia nusha yamai nekaki weartiniaiti tuma asantai paant amajsattaji. Tura warinkish waitmakma takakainia nuka máshiniunu ainiawai yaksha jukichminiaiti.

Akánu 323.- Máshiniu takat iwiarnatra jukitsa enentai ejemuka ii pujámuri ikiamri pénker wainkiatin enentai atiniaiti máshiniu tamajai, tura aintsank ii nunkenka máshi warinkish imiatkin áinia auncha susatniuiti, nuyá warinkish waitmakma takakainia nuka máshiniunu ainiawai yaksha jukichminiaiti, turawaraink tusa atsa timiaiti.

Akánu 324.- li nunkenka pénker iistatui niniuri métekrak arantukma ati tamajai nuyá aintsank nuatnaikiarusha tsaninkiar nii enentaimmia anturnaikiar takatnash emtikiartiniaiti.

TÉSÁK MENAINT

Takatairi nuyá waitmatairi

Akánu 325.- li nunke pénker iistatui takat pénker jukimiu ati tusa. Wari warinkish takatan paant amajsatniuiti, ankant takakmastiniash, nii yuatniunak turutskesh máshiniunu tamajai nuyá takakmau ainianusha, nui takakmau núa nuyá aishmank ainiasha pénker enentaimtusma atiniaiti.

Akánu 326.- Takata imiantrinkia junis amirkamu atiniaiti:

1. li nunken takat waitmaktinia emtikiattawai nuyá takat takurmakcha yaksha achattui nuyá tii takata takakush achamniaiti niniunak enentaimias.
2. Takat waitmaktinkia aentsu timiatri, nuna amirchaka timianchaiti.

3. Enentai jusámu umitiainia ana nuna amimtikiatin yainiawai takat waitmaktinnium tura aents takakmau áiniana nú ayamrukma atiniaiti.
4. Takkamasma timiatrusrik akikma atiniaiti.
5. Máshi aents nii takatri najána atiniaiti pénker, waitmakmin, iniashi iirsamu, waitkiamu imiastintri tura warinkish kishmaktinnium.
6. Máshi aents warinmaksha nuakka ankant susamujai ayamratniuiti nuyá ataksha waketki takatri enkematniuiti umitiai tana nunisank.
7. Takakmau aents áinia nuka nii utsumamujai metek tuak takakmastiniaiti yaksha chichamujai. Juka uchi, úunt, apu tuakma áinia nú nuyá ni wakeramunam pachinkiamnia áiniawai nuyá aintsank jinkimniaiti, aintsank ii nunken takakmauri áinia ausha tuakminiaiti.
8. Takakmau tuakma ii nunkenka emtikiuka yainktiniaiti pénker iruntramu jukiarat tusa amitiai tana nújai métek nuyá aintsank másh etsera nekamu atiniaiti máshiniu pachinkiar takata jukiarat tusa.
9. Ii nunken takat juamuka chikichik tuakma chichamruktiniaiti.
10. Takat juamunam itiurchat akuinkia pénker aujnaisar chichamka iwiaramu atiniaiti.
11. Nuyá takat juamu iwiarturma atiniaiti atsakuinkia nusha chichama iwiarin áinia nekamujai.

12. Itiurchat másh nekamuitkiunkia iruntra chichamka iwiaratniuiti tura chicham jurusmash atiniaiti.
13. Takat aents suamusha másh nekamu atiniaiti tura umitiai tana nújai métek susamu atiniaiti.
14. Takakmau imiantrisha pénker nekaramu atiniaiti tura wajararmataisha anturkamu atiniaiti, tura nuna úuntrisha atukma ártiniaiti. Takakmau ainiaka wajararminiaiti umitiai tana nújai métek.
15. Wajarchamnia ainiawai tsuamatainiam, kampunniun iin, unuimiatnum, chicham iwiartainiam, kean ikiajnau, aentsu wainin, chinchipnium takakmainia, entsanam, yawiniam, najántainiam, ewekamtainiam, chicham ujanaitiainiam nuka suritkiamuiti umitiai tana nújai métek.
16. Máshiniunu takakmattairi áinia nuka ákik susamu ainiaka nuyá takakmaurisha nekamu áinia auka umitiai najátamu ana nuna amikiartiniaiti, nui pachitkiainiachuka takau áinia nu umitiaijjai métek takata jukiartiniaiti.

Akánu 327.- Nuamtak takakmau áinia takat juamuka métekrakna nakak atiniaiti.

Suritkiamuiti surinia nuna surinri akintia nuyá nuna surintri niniunak tura máshiniunu takamunam, tura takat tsawant akantsamujai métek takainia ausha, nuka aents tuakma itiurchat amaju achatniuiti. Nuna amitsuk ninki nerena kuitrintin ajastasa wakerakuunkia amitiai aarma ana nújai métek asutiamu atiniaiti.

Akánu 328.- Akikmamuka nekasenk atiniaiti, pénger akikri takakmau utsumainia nújai métek, tura atankimiu achatniuiti antsu uchi wainmaitkiunkia nuka jurukmiaiti.

li nunkenka akitiai takakmaunu áinia nunaka uwijiai nekapek iistiniaiti, máshiniunu nuyá utsukmajai.

Akitiainkia tsawant tesaramujai métek atiniaiti tura ementukma achatniuiti, antsu nerentin utsukmaitkiunkia najánamniaiti amitiai tana nújai métek.

Takakmamtikiu takakmainia tumashia, nuka tii arántukmaiti chikich tumashi iniankas, ikiamsamu tumashia nunásh iniankasank.

Takat iniayamu akikrinkia, takakmak iwiasmataiya nuwaiti akíknum turutskesh warijainkish. Antsu takákматаi naari takat wekasa najánamuka akikchamuiti aintsank iniankasrik akíkkia.

Nisha takakmainiaka máshi akíkma ártiniaiti umitia tana nújai métek. Nu ákik pachintiuktinniaka amitia tesatniuiti kampunniunam irunu juamunam. li nunke takat najánmanum akíkia tii juakka akikmakchattui iniankaska. Takat waitrua najánamuitkiunkia umitiai tamajai asutiamu átatui.

Akánu 329.- Natsa aishmank nuyá nua áinia auka takatnum enetaimrartiniaiti nuyá aintsank nii imiastinnian takasartiniaiti. Tuma asamtai jui tana nújai métek yainkiartiniaiti.

Pénker takat junakit tusa, aents tarimiat aents nuyá chikich ii nunke pujuinia au takatri penker jurukmia atiniaiti nuyá

takat susartiniaiti nii jeamujai métek.

Takata ni enentaimsank máshiniu pénkeri áminian nuka ii nunke pénker shir enentaimtusa paant amajtusma atiniaiti. Tura nú takat najánamu atankichminiaiti nuka surimkiamuiti.

Takat susatsa wakerakrikia, nii urukuri irsar, wariri nuyá aintsank unuimiarmari iirsar susatniuiti aentsun imian ujukaink tusar.

li nunkenka aents takakmau nuyá takat sutai júa ti pénker ati tusa atuktiniaiti pénker jukimiu ati tusa. li nunkenka takakmau ainia nú arantukma jui nuyá yaja nunkanmash tusa iistiniaiti, tumak yaja achimramu áinia nui wekas chichamruktiniaiti.

Akánu 330.- Aents iniashnum imiancha ajasaru áinia ausha takatnaka nuyá akikrincha métek waitmakartiniaiti. Tuma asa takata juinia nú chikichkiamas ankatan susartin ainiawai takakmasarat tusa. Suritniawai ákik nunkach jurusar akiktinia nuyá ni jeachma takakmamtiksatín.

Akánu 331.- Núash métekrak takatnash waitmakar takakmasartiniaiti, unuimiartiniaiti, akiknash métek achiktiniaiti, nuyá aintsank ninkish takatan najánamniaiti. Aintsank nú metekcha aink tusa pénker intsatniuiti.

Aintsank suritniawai núa imiant iisma aink tusa nuyá takatnumsha imiant amájsamu achantniuiti.

Akánu 332.- Takakmas warinkish suruiniana nusha pénker iisma atiniaiti, antsu suritniawai yurumak aentsu emesmakminia au aratniun, aintsank núa ajamtin uchiram

áinia au ti waitkiaschatniuiti, tuma asa uchi umuntsuka akantan takakui, nuyá takususha, yajutmarusha, ankant takustinian nú wainkiatin tsawant tesaramua aintsank.

Aintsank surimkiamuiti, núa takusu takatri tachkui ajapatin tura aintsank nekamunmaya nuyá jui tana nújai métek amianuka.

Akánu 333.- Timiatrusa iirsamu atiniaiti aents niniunak jeen pujámurin yuatniu takata takakmas ara nusha ecuadora úuntri imian amajsatniuiti.

Aents ni utsumamujai métek iniashi iistinia taka nunaka ii nunke paant amajsatniuiti, aintsank másh takat juamu uchi wainkiatin nuyá aintsank núa jenink niniunu taka nunasha.

Amitiai tana nújai métek aents takakmainiana niniunak jeen pujús yuatniun nunash ii nunkenka iistiniaiti.

TÉSAK AINTIÚK

Arakma takakmatai máshiniu

Akánu 334.- li nunkenka arakmau áinia aunka pénker takatri iirsatniuiti nuka jujai métek:

1. Imiatkin araknum nuyá warinksha takurmastinnium aink tusa iwiarturtiniaiti nuyá aintsank pénker najánmanka paant ujukatniuiti.
2. Máshiniu yayamusha métekrak ati tusa kanar kanar takainia aunka iwiartur máshiniu najánawartiniaiti.
3. Yaunchuya arakmatai aents nekainia nunaka nekara

paant amajsatniuiti, yamaiya arakmatainiam nú enentai enkeatin tusa.

4. Másh nunkanam arak chichamnaka enkeatniuiti nekaska yurumkanam nuyá aentsu iniashi iwiaratniunam pénker emtiki wetai tusa.
5. Máshiniu timia ainiancha pénker iistiniaiti tura ákik ikiamas takakmastinniasha aintsank.

TÉSAK EWÉJ

Kuit yapajmia nuyá métek surutmatai

Akánu 335.- li nunkenka émamkes iistatui ákik yapajniaiyamu nuyá warinksha sunaiyamu pénker ati tusa. Tura antsu warinkish máshiniunu taman yajauchi júa nunaka asutiatniuiti umitiai tana nújai métek.

Arakma súramu áiniana nuna kuitrinkia ii nunké pénker akikri apujtur susatniuiti, chikichkia iniankak suramu aink tusa, tura aintsank takat najánashtinia nunis junakin tusa.

Akánu 336.- Surutmamu pénker junakit tusa ii nunke iistiniaiti, aintsank suramusha pénker ati tusa.

Surutai áinia nunash paant arat tusa ii nunkenka iistatui nuyá aintsank surutai ainiasha pénker arat tusa métekrak warinksha waitmakma ati tamajai umitiai tana aintsank.

Akánu 337.- Warinksha enkear surutai, matsasar surutai áinia aunka najánkatniuiti ii nunke nekaska aents utsumainiana nújai métek, tura suramusha máshi nunkanam jea paant juaku ati tamajai.

TÉSAK UJÚK

Kuit ikiusar umuchma

Akánu 338.- li nunkenka surutai tsawantrinha tesarattawai pénker suramu junakit tusa pachimramu aink tusa, nuyá aintsank aents arant wenancha wakеткиar tarinniash nunisank nuka surak wekainia nunaiti.

Akánu 339.- li nunkenka ákik ininink tura yaja nunkanmaya umuchma nuna iistiniaiti nuyá aintsank itiur umuchnaktiniait nunasha iistatui. Warinksha arakmamusha máshiniu ejeratsar tuma asa pénker ártiniaiti nuyá aintsank yamaiya arakmataijiai aujai junaktiniaiti.

Arantia ákik tana auka ii nunke ákik ana nuna patatkarinti, nuka pénker umitiai tana aintsank umuchnaktiniaiti tura iwiarnarma tana nújai métek nuyá aintsank tesamuna tuakaru áinia nusha akantukma ainiawai

Ákik umuchmaka ii nunke arantukar nuyá umitia tana nújai métek pénker jukitniuiti, nuka máshiniu takat júamu iwiarnatramu tana nújai atiniaiti ákik umuchmaka.

TESÁMU VII

Pénker Matsamsatniunu chichamramu

AKANKÁMU CHIKÍCHIK

Métekrak pachinma

Akánu 340.- Máshiniu aentsna iirsatin juamuka ii nunken emtai jusamuiti, amiktin, takat jukitin iwiarturmaiti tura aintsank umitiainmash tawai tuma asamtai aentsu niniuri pénker iirsamu atiniaiti.

Takat juamuka máshi iwiarnatramunam takat jukitin ana nújai métek takakmastiniaiti enentai jusamu uminkiat tusa, nusha pénker, shir iisma nuyá yaimin pachintiamu atiniaiti.

Nú takat aents yaitiai juamuka juiyaiti, unuimiatnum, tsuamatnum, wainkiatniunam, entsanam, iniashi irsatniunam, nakunum, pujámurin, jeen, turutairin, ujanaitiainiam, ankant pujústinnium, nekatainiam, matsatmanum, emesmakma aink tusa iistinnium nuyá wekasatniurin.

Akánu 341.- li nunkenka máshiniu pénker iintsat tusa chichamruktiniaiti umitiainiam tana aintsank, yaksha kajerkamu, katsekamu, ajapamu aink tusa nusha iniashi urukuit nú írsachmajai.

Máshiniu intsatin tamaka niriya tuakar juarkimiu enentai atiniaiti, umitia tana nújai métek. Nekaska itiur nú takatcha jukitniuit nuna unuimiatraru chichamrukartiniaiti.

Máshi ii nunken uchi niniuri arantukar itiur iistiniait nuna chichamrukartiniaiti, nú enentainkia máshi jeatniuiti uchich tuakmanumia juarki irutkamu, matsatkamu áinia nui.

Akánu 342.- li nunkeka unuimiatai ainianka akiknaka métekrak akantur susatin ainiawai, wárik, tuke tesamu nekapek pénker unuimiat junakit tusa.

TÉSAK CHIKÍCHIK

Unuimiatna

Akánu 343.- Unuimiata chichamramuka máshiniunu yainkma ati tamaiti uchi pénker nekawar paant ajarar nii nunken takatnash waitmakarat timiajai nekas niniuri turutairi áinia nunasha nekawartiniaiti. Unuimiatka aentsnaka unuimiata ajaperinti tawai, tuma asa ni jeamujaink pénker warasmajai takat junaktiniaiti.

Unuimiatai chichamramuka máshiniu turutai pujámu aents áinia auncha irua atiniaiti, chicham, pujámu nuyá pachim áinia nújai métek, irutkamu áiniana nú arantukma atiniaiti, tarimiat aents áinia nusha aintsank.

Akánu 344.- Unuimiatai juamuka pénker tesaramu atiniaiti, uchichinmaya juarki, uuntmaku unuimiatai, natsa unuimiatai nuyá úunt unuimiatiniam pachikma atiniaiti.

Unuimiatai chichamramuka niniuriniak chichamrukma atiniaiti, tura nunka tesarmajai métek akanturar aniaiturma unuimiata chichamrukartin.

Akánu 345.- Unuimiatainkia máshiniu asa máshiniu, arutma chichamrinnia nuyá ninki najánainia ártiniaiti.

Nú unuimiatai áinia nuinkia ákikchajai uchi unuimiakartiniatiniarti, tura aintsank uchi enentaimtairisha iwiartuktiniaiti nuya másh métekrak aents matsatainiamujai

métek yainkma atiniaiti.

Akánu 346.- Unuikiartin áinia nú takat júamuri itiurak neka asar takainia tusar nekapsa iirsatin tusa takat jukitin uratmia atiniaiti.

Akánu 347.- li nunke umiktintri:

1. Unuimiat máshiniunu, tura warinmaksha másh susamu ati jeanam, warinksha másh susatniuiti.
2. Unuimiatai ainiasha máshiniunu paant jukimiu ati tusa iistiniaiti. Unuimiatai ainiaka máshiniu uchi pachiniak unuimiartiniaiti.
3. Unuimiat iwiarturma umitiajjai métek nuyá ankant unuimiatai áinia aun emtikiatniuiti.
4. Unuimiatai áinia nuka aentsun máshiniu unuiniakarat tusa iistiniaiti, nijirmatainiuncha nuyá ii pujámu pénger iistinniash nuyá wari iniu imiantri áinia nunash jintiawartin ainiawai tusa iistiniaiti.
5. Uchi enentaimmiari, nii urukuit nú arantukar unuimiat junakit tusa iistiniaiti.
6. Uchi unuimiar itiurchat amakma aink, asutiamu, nijirmatnum itiurchat wainkiain tusa iistiniaiti.
7. Unuimiarcha, aujcha, aichu áinia nusha máshi nekawarat tusa chichamruktiniaiti.
8. Máshiniu yamaram unuimiatainiam enentai júamu irunna nusha nuyá takakmatai, ejémak nuyá iisar unuimiatai másh unuimiatainiam ati tusa

chichamruktiniaiti.

9. Tarimiat aentsu unuimiatairi auncha yaintatui nii chichamejaink tura apach chichamjai unuimiat junakit tusa, turasha unuimiata narin chichamruinia nú takarsamu artiniaiti nusha tarimiat aents irutkamunam pujúinia nú arantukmajai.
10. Tarimiat aentsu chichame unuimiatai iwiartukma áinia nui pachikma atiniaiti chikichki chichamkesha.
11. 11. Unuikiartin, unuimiau, apawach unuimiat juamunam másh pachinkiarat tusa iistiniaiti.
12. Másh nunka tesarma áinia nui unuimiat máshi susamu árat tusa iistiniaiti.

Akánu 348.- Máshiniu unuimiatainkia ákikchajai atiniaiti ii nunke akiknaka másh susattawai. Ákik suamuka aents tuakmajai métek atiniaiti nuyá tui pujúinia nuyá chikich ana aintsank métekrak yainkma.

Nuasaru unimiatain, nuyá Arutma enentaimtin unuimiata uraiwiar nuyá imiatkin najántai juinia auncha akiknaka tesaratniuiti, métekrak yainkma árat tusa umitai tana nújai métek. Máshiniunu unuimiat tana nui takainiaka niniunak enentaimias takaschartiniaiti.

Warinksha emesnaki weakuinkia yá takata emtikia nú imiancha júamuri irsa asutiamu atatui.

Akánu 349.- li nunkenka másh unuimiatai áinia nui unuikiartin takakmainia iistiniaiti, máshi unuimiatai akanturma áinia nui, unuimiartinnium, iwiarnartinnium,

nuyá uchi unuimiartin iwiarnatratniunam, akiktinnium, nuka itiur emki wea nújai métek susamu atiniaiti. Umitiai umpuarma unuimiamu emtikiamunka iirsatniuiti, nuyá takatri nekapmamsar iirsatniun. Nuyá aintsank unuikiartin itiur taka susatniuit nunasha.

Akánu 350.- Úunt unuimiatai júamuka máshiniu unuimiakarat tamaiti, aents pénker nuyá néka atin tusar. Nuka nekamuka másh nunkanam paant amajsar chikicha jintinkiatin timiaiti.

Akánu 351.- Úunt unuimiatainkia máshiniu atiniaiti tura iwiarnatra takakmatai júamu warinkish iwiarnatratniuiti, tumak nisha takatri júamu iirsatniuka akantramu atiniaiti. Nuka máshiniunu, métekrak unuimiakartin tama, pénker, enentai yamaram najánkatin enentaimsa atiniaiti.

Akánu 352.- Úunt unuimiatainkia, arakna, unuimiatainiu, nampetna nuyá nakumtainiu pénker nekamu paant amajsamu ártiniaiti nuyá takatrisha iirsamu

Úunt unuimiatainkia máshiniu nuyá niniuk akusha niniunak waitmaktinkia achatniuiti.

Akánu 353.- Úunt unuimiatinkia juni takakmastatui:

1. Takat iwiarnartin tura apappes takatri irsatin nuka ii nunke úuntri anaikiarma nuyá takat susamujai takakmasartiniaiti.
2. Nuyá aintsank takat jukitin unuimiartinnia chichamrin atiniaiti unuimiat tesarmajai métek tumak nuna juiniasha pénker ejeturma ártiniaiti.

Akánu 354.- Úunt unuimiatai máshiniunu tura niniuk ainiaka umitai najátamujai uraimiu atiniaiti, nusha émamkes wekatus iin nekas nuka uranminiaiti timiajai.

Máshiniu úunt unuimiatai nankamas núkap nekatai áinia nú urantinniaka máshiniu iwiarnatar takainia nú ayu timia atiniaiti tura nuna iista tiri apujsamu.

Yamaran uramu nuyá chikich unuimiatma uramuka aents matsatainia warinma unuimiartasa wakeruinia nú utsumamujai métek uraimiu atiniaiti.

Tura aintsank wekatus iistin nuyá iwiarnatar emtikin ninki urain asa ataksha aintsank wekas imianchari iis epentiniaiti nuyá aintsank úuntrincha jikminiaiti umitai tana nújai métek.

Akánu 355.- Úunt unuimiatai uraimiu áinia nunaka ankant suiniawai nii takatri akikri jukiartinniaka turasha umitai tana nújai métek takatka junaktiniaiti.

Nusha unuimiat juamuka máshiniu tsankamkamu atiniaiti. Nuna ankant susamua nuka máshiniu unuimiat iwiarnamusha jintiamusha ni iwiarnarmajaink junakti timiaiti, máshiniu áinia nújai métek.

Ni takat júamu jenka yaksha enkemtuachminiaiti, antsu aents ankanta jeyaitkiunkia iwiarturma atiniaiti, tura pénker takat junakit timiaka nuna chichamruinia nuna takatrinti. Tura imiatkin akuinkia úunt chichama iwiarin pachintiuk iwiaratniuiti.

li nunké úuntrinkia akiakia apújsatniuiti, máshiniu timiatrus iwiaratniuiti unuikiartinnian.

Akánu 356.- Úunt unuimiatai menaintiu tesamunam ejetniuka akikchajainti.

Úunt unuimiatai máshiniunam enkema unuimiartinkia nekapsamu nuyá aents pénker unuimia nú enkematniuiti nusha umitai ejeturma atiniaiti. Antra unuimiamuka unuimia áinia núna enentai juawai nii pénker unuimiarartiniaiti.

Unuimiata ankant nuyá máshiniu akusha másh métekrak yainkma atiniaiti nunisank unuimiatnaka jukiartin ainiawai nuyá akirinkia ankant nii enentaijjaink unuimiata urain áinia nuka nisha akirinkia takusartiniaiti ejeramun.

Ninki takakmainia akikri unuimiau seawartinkia tura yayamusha nii itur takama nújai métek atiniaiti.

Akánu 357.- Úunt unuimiatai chichamramu áinia nunaka ii nunke juiniana nú emtikartiniaiti tura akiknasha enketawártiniaiti. Úunt unuimiatai ii nunken irunna nuka takata jukiartiniaiti unuimiatai uraiyar aents unuimiakarat tusa, tura nekámu áinia aun eakartinia akikia ajapruawartin ainiawai, unuimiararat tusa akikia susartiniati, yainkiartiniaitji, tura aintsank umpumartin menaint tesamunam jeatniuka akikchajainti. Nú ákik suamuka itiur takata juinia nújai métek atiniaiti.

Umitai tana nuka pénker takat junakit tusa esetar iistatui nuyá aintsank taka júamuri akik umuchma iintsatniuiti máshi úunt unuimiatai uraimiu áinia nuka.

TÉSAK JÍMIAR

Tsuamatna

Akánu 358.- Tsuamatai juamuka máshiniu aents matsatainia iniashi iirsatniuiti, máshiniunu tura chikichkimsamu nuyá niniuri najánainia aintsank. Nuka emtikiattawai máshiniunu yankesh nankatsuk yankesh ankatsuk nuyá najántairi áinia nuna iiras jukitniuiti.

Akánu 359.- Tsuak chichamna juamuka takat juruktinnia najátkamuiti, enentai jusamu ana timiatrusank máshi tsuamatainiu nuyá aintsank tesarmajai métek akanturmaiti nuyá aintsank máshiniu pachinmaiti nuyá aets matsatainia takakmamurisha iirsamu atiniaiti.

Akánu 360.- Enentai jusamua nújai métek tsuamatai chichamramuka junaktiniaiti, máshiniunu , aents tuakma, irutkamunam, matsatkamunam pénker iisma ati tusa, tuma asamtai yaunchu tsuamatai nuyá yamaiya tsuak pénker jukimiu ati tusa iistiniaiti.

Tsuamatainkia máshiniu nunkanam achitra atiniaiti, tuma asamtai nunka tesarmajai métek takat junaktiniaiti pénker nekamujai.

Akánu 361.- Tsuamatai chichamramuka niiriniak takat jukimiu atiniaiti, tura tsuakna chichamruktiniaiti, nuyá aintsank itiur junaktiata nunasha iwiartuktiniaiti nuyá aintsank tesarmanum takat júamuncha iistiniaiti.

Akánu 362.- Tsuakna chichamramuka máshiniunu, tura ninki tuakma ártiniaiti turasha máshiniu weanak tsuamarart tama. Tsuak chichamramuka timiatrusa ejekamu atiniaiti, tura aintsank máshiniu pénkeraiti timia.

Tsuamatai máshiniunu tura ii nunke chichamrukma áinia nuka aents yaintin timiaiti tuma asa antrank tsuamatai atiniati, máshiniunu, tsuak, tsuamartin, imiastin áinia auka antrankete.

Akánu 363.- li nunkenka juna amiktiniaiti:

1. Chichama juruktiniaiti aentsu iniashi pénker iirsamu, tsuarma, ayamtikramu núumtak aentsuk tuak pujúinia nújai métek takakmamunam nuyá irutkamunam.
2. Tsuamatai paant amajsatin, pénker jukitin nuyá aintsank máshiniu ejeratin.
3. Tsuamatai jukitin tuakmar júamu áinia nuna iistiniaiti, aents unuimiatka takakmasarat tusa, jeesha pénker najátamu ati tusa nuyá tsuaksha nákap ati tusa.
4. Yaunchuya tsuamatai pénker enentaimtus emtikiatniuiti arantuk nuyá nekamu nekaskete tinia.
5. Unuimiatkari takatnum ikiusar umitiai tana nuna ejetuktatui.
6. Nijirmatai pénker jukimiu ati sunkurmakarain tusa iistiniaiti, pampatainiam nuyá núa iwiakmari irsatnium, ajaprukmanum, takusmanum nuyá urum takus imiastinnium.
7. Pénker tsuakjai aents tsuarma atinian, tsuak suramusha penker iisma ati tusa, tura akikrisha pénker nekaramu atiniaiti.
8. Tsuakna takakmainia nunaka umuchratniuiti.

Akánu 364.- iniankakar nájanma, umartinnium, tsank mukunatniuka máshiniu itiurchatrinti. Tuma asamtai ii nunkenka nú iniankakma aink tusa émamkes amitiari ejetur takakmastiniaiti, nuyá aintsank surin áinia nusha máshiniu iwiartukma atiniaiti pénker junakit tusa. Asutiamush achattawai umitai tana nújai métek.

li nunkenka tsank nuyá awarin umutai áinia aun pénker iistiniaiti iniankakma aink tusa.

Akánu 365.-Tsuamatai tuakar júamu nuinkia aents jáa tamatai tsuartinia nakitrachartin áiniawai. Nuna aminiachkuinkia umitai tana nújai métek asutiamu ártiniaiti.

Akánu 366.- Tsuamatainiuka ákik núkap, pénker nuyá wárik enketamu atiniaiti. Tura nú kuit enketmaka aents tuakaru nuyá pamparma tana nújai métek enketatniuiti tsuamatai chichamramunam.

Tsuamati júamu nunaka ii nunke akiknaka enketatniuiti nuka máshiniunu tura kanakar najánawaru áinia nunasha nusha niniunak enentaimias takakmatsna nuna, pénke esetramujai takata jukitniuiti. Takat juamuka iisma atiniaiti pénker takakmantsat tusa.

TÉSAK MENAINT

Máshi pénker itiai

Akánu 367.- Máshiniunu aents istin takat juamuka ankant nisha takata jukichminiaiti tuma asa máshiniunuiti. Tuma asamtai máshiniunu tura nunka akanturma áinia aintsank junaktiatui.

Máshiniu métekrak takat jukimiu ati tusa takat júamu, máshiniunu métekrakna takat jukimiu atiniaiti.

Akánu 368.- Aents yainktin tama júamuka, máshiniu nui achimkiaru, takakmainia áinia nújai métek yaimkiatniuiti, tuma asamtai pénker takat jukimiu atiniaiti. Tuma nú takat jukimiu atinkia pénker esetar émamkesar takat jukimiu atiniaiti.

Akánu 369.- Aents wainkiatin yainktin tusa tuakmaka sunkurnum, uchi takusmanum, yajutmarmanum, takatnum imiancha pujámunam, iniaash nuakmanum, úuntach ajasmanum, jakamunam umitiai tana nújai métek yainktiniaiti. Tura takusmanum nuyá sunkurnumka máshiniu tui takat juna nui yainkma atiniaiti.

Yaimkiata tama juamuka máshiu jeaktiniaiti takakmau áinia nuna. Tura jea nuyá uchin wainin áinia nuka ákik enketamu atiniaiti ii nunke. Umitiai jú takat jukitniunka iwiarturtatui.

Yamaram kuit ikiamsatniuka núkap ákik enketamu atiniaiti.

Akánu 370.- Aents niniuri pénker iirsatin tama juamuka (IESS) tuakma ankantaiti nuka umitiai arma nújai takakmastiniaiti, nii pachinkiaru áinia nújai takakmastiniaiti.

Súntar nuyá pushú suntar áinia nuka niisha nii tuakma takusartiniaiti máshiniu achitramujai jukiartiniaiti nii takatrijjai.

Akánu 371.- Aentsu niniuri irsatniunam takakmainiaka aents ákik apujeamu ana nujaink enentaimtusma ákikma ártiniaiti, juink nuyá arant pujúinia aents áinia nuna.

Ákik máshiniu yainktin tamanum uwijjai métek enketamu atiniaiti máshiniu ákik chichamramunam enentaimtusma atatui tura wárik enketamu.

Ákik enketeamuka nuyá ákik ikiamuka warinmaksha suritkiamu atankimiu achatniuiti, antsu uchi akiamunam iniankatainia nucha umítiai tana nújai métek tura warinmaksha akikmaktin ankant atiniaiti.

Akánu 372.- Máshiniu yainktin tama ákik enketeamuka máshiniu atiniaiti, ni takakmastintri nuyá yaimkiatniuri. Chikich tuakma áinia nuka jú takat júamunka warinkish iischartin áiniawai tura enkemtuachtin áiniawai.

Ákik máshiniu enketamu ainiaka akantukma atiniaiti akikia nantujeni. Ni takatrinkia pénker warawarat nuyá pénker eseturma atinaíiti.

Akánu 373.- Aents iistin tama juinia IESS máshiniu iistin timiaiti ni pujámuri iirtsuk tui tuinksha pujúinia nuna, takakmau takakmachu nuyá takauri áinia nunanu. Nuka tsuamatnum, nuakmanum, nuyá takakmaschamia ajajnia nui, úuntach ajamunam nuyá jakamunam.

Takat máshiniu nuyá niniunak júinia nusha máshiniu pachinkiamu atiniaiti tura akikjai yainkma ártiniaiti.

Akánu 374.- li nunkenka ukunmash ii iwiakma pénker iistin tusar takat júamua ai máshiniu pachikma atiniaiti arant pujúiniasha iisma atiniaiti. Tura nú iyámuka aents ákik apujma ana nujai yainkma atiniaiti.

TÉSAK AINTIÚK

Pujámuri nuyá jee

Akánu 375.- li nunke, máshiniu akantramu áinia nui, pujutain pénker iistiniaiti jeasha pénker najánkamu ati tusa nuka jú ainiawai:

1. Jea pénker jeamkamu ati tusa enentai jusa máshiniu pénker iisma ati tusa tura máshi wekatoi áinia ausha pénker najátkamu ati tusa.
2. Warinksha najánkamu nuyá jea jeamramu áinia auncha anujar takustiniaiti.
3. Najánattui, iwiarattui nuyá iistatui emki weawash enentai jusámua nuna máshiniu ati timia nunisank jeat tusa nuyá aents pujúinia nújai métek atiniaiti.
4. Jea jeamtai iwiaratin, ajamtaincha susattui, kapunniun nuyá pénker iisma ati tusa chichamruktatui.
5. Máshiniunu jea jemaratin tusa iwiarnatar takakmastatui, ákik máshiniu timia tesaramu ana nui akikian imian takurkacha áinia nú yainktin timiajai nuyá núa ninki pujúinianu.
6. Entsan, kémkan nuyá tsuamatai pénker takusarat tusa iistiniaiti.
7. Jea ikiamas pujúinia ausha pénker jeamujai métek ikiamas nuyá akikmak pujúsarat tusa iirsatniuiti.
8. Nayantsa kanusrin kaatmatak máshiniu enkema iirasma ati tawai nuyá entsa tura atumiank áinia aisha turasha pénker iismajai.

li nunkenka emtikiattawai iwiarnatratniun, esetratniun, iistinian, ákik susatniun nuyá jea itiur jeamkatniuit nuna chichamruktiniaiti.

Akánu 376.- Jea pujámu imian najanatsa, pujútairin nuyá ikiam pujámuri pénker iistinian, yair tuakma áinia nú nerentin ajasartiniaiti, iisartiniaiti tura atak pénker atintri iirsartiniaiti úmitiai tana nunisank. Nuyá nunká irunna ausha nerenniumachtiniaiti tura aintsank tuakmanum pénker ati tusa isartiniaiti.

TÉSAK EWÉJ

Najántairi

Akánu 377.- Yuanchu najántai nirin takamuka takat juamurinkia yaunchuya máshiniu emtikiatin timiaiti máshiniu warinksha najántai áinia nuna. Nunaka nekas najántai áinia nuna imiantri emtikiui.

Akánu 378.- li nunke tuakmaka máshiniu tuakma áinia nuka ni akikri susamu atiniaiti máshiniunu nuyá aents yá nii enentaijiaink nui pachinkiaru áinia nuna.

Tuakma yaunchu najántai chichamrin áinia nuka ákik enketamu ártiniaiti turasha itiur nuna umuchkiara nunaka pénker etserkartiniaiti.

Takat júamunka ii nunke emtikiainiana nú umuchkiatniunka emtikiartatui tura takakmaurinkia ayatik atuin atiniaiti.

Akánu 379.- Juwaiti antinchamnia nuyá antinmin ainiawai ii najántairi, ukunma nui aents niniuri paant iruntramu aujmattsamu aarma, ii nuke ayanrukma atiniaiti:

1. Chicham, itiur chichatain, yaunchuya chichatai tura warinksha najántai, nampermatai nuyá chikich imian áinia najántaisha nuyá arakmatainiusha.
2. Tuakmanum nii wariri iniakmamu, nuyá úunt kaya jea najánkamu, aents matsatkamunam paant áinia enentaimtusma nakumrar iniakmainiamu úunt jintia iwiarkarma, kampuntin shir irka irunainia nuka tarimiat aents matsatkamu, yaunchunia ímianri enentaimtusar najánkarma, nii yaunchu pujúsarma juararu wainkiamu métek junaki wetiniaiti.
3. Aákma, imiatkin, júkma, ateárma, aujtai utuákma nunisank yaúnychuya ikiutai, yaúnychu tuntuitiai, ukunch juákaru, nunká tépakmanum, aents tuákma atiniaiti.
4. Námpet najánkamu, tii enentaimsar nekámu nuyá takakmatairi patátma.

Yaunchu najántai iniu irunna nuka yaáksha takasma achatniuiti, tura emeskachma achatniuiti. Nunaka ii nunké pénker juúk nuyá wainiak paánt amajsatniuiti, umitiai tana nújai métek.

Akánu 380.- Juka íf nunké takatrinti:

1. lístin, takat júamujai métek, iniakmammajai, íírmajai, ayamramujai, anuasmarijiai, ayajtamujai, paantmajmajai, níniuri emtikmajai, yaunchuyari iniakmammajai, takattairijiai, yaunchuya takutairijiai, chichamejai, máshiniu tuámu paant amajeamujai, máshiniu iruajai najantairijiai métek takakui Ecuador nunka.

2. Yaunchuya najáteakur paant amajsatin warinmaksha áárar, peérar nakumrar máshiniu nekawarat.
3. Tesarmanum pénker akánturma ati tusar iistin, najánawaru áinia nusha pénker enentaimtusma áarat tamaiti, ankant ankant ni turutairi najánawarat.
4. Nii najántairi kajinmattsuk najánawarat tusar unuiniaktiniaiti, níí uwiri takakainiajai métek nekaska nuách nuyá uchi natsa áinia nújai.
5. Najántairi nekáwarat tusar yainktin.
6. Aents niniu najánainia nusha enentaimtusma akikma ártiniaiti nuka chichaman iniankain áinia nú tura chikich tuakmaksha nuna paant amajainia.
7. Máshiniu paant amajsamu ati tusa yainkma ártiniaiti.
8. Ákik jeásank tesarkamu atiniaiti, pénker najántai áinia nú emtikiamu ati.

TÉSAK UJÚK

Muchítra nakurutai nuyá ankant takutai

Akánu 381.- Íí nunké ayamruk, chichamruktatui, nuyá tsaninkiat nakú emtikiattawai, iniash umushtan nuyá ayamratniun, iniash iwiaratin asamtai, shir enentaimtikkiartin asamtai; nakún núkap chichamruktatui pénkerna, tuakmanum, iruntramunam, nakurin ainiancha yainkiartatui ii nunken pachinkiarat tusa nuyá níí imincha iniashi takakush pachinkiarat tusa.

li nunken níí warirí írunu nuyá takakmastin jean, nakurutai najankatniun ákik iwiasmaktatui nusha pénger ákik iirsamu atatui nuyá takakmamusha etserkamu atiniaiti, nuyá ákik suramusha métek susamu atiniaiti.

Akánu 382.- Nakú tuárkaruka níki iruntraru yainkma ati tusa, jeéncha, nakurataincha takusartiniaiti, nánkamas nakurutai áinia nusha najánamu atiniaiti umitiai umpuarma nújai métek.

Akánu 383.- Aentsu níí imiantri irainiawai ankántu tesaramuri irunna nújai wará warat iniashi iwiarat tawai.

TÉSAK TSENKEN

Chicháma etsérin

Akánu 384.- chicham etsertai chichaman etsérkatniun emtikiartatui nuyá chichaktinian surítkiachma, nunisank aents pachinma emtikiattawai.

Chicham etsertaínkia máshiniu takatai atiniaiti, nuní asamtai máshi pachínkiartiniaíti ii nunke itiur takakmastiniat nunaka máshi iwiarturtiniaíti, umitiai umpurma tana nújai métek.

TÉSAK YARUSH

Nekatainiu, takakmatainiu, yamáram nuyá yaunchuya nekátai

Akánu 385.- Máshiniu nekatai takat juámu, yámaram enentai, yaúnychuya nekatai, kampuntin írunu arántamu iwiakmanu, najántai, iniu imiantri jú enentai atatui:

1. Paant najánar, iwiaikiar ii nekatai nuyá yámaram enentai áinia emtikiat tawai.
2. Yaunchu najántai nekátaí émtikiat tawai.
3. Takát jutai yámaram chicham máshiniu nekámu atiniaíti, aentsú émtikin, pénker tarimiat matsamsatin enentai atiniaíti.

Akánu 386.- Takat enentaímmia áchitramu júamuka atiniaíti, nunká úuntri ajámu, warirí túmak takattri júiniana nuí pachikma atiniaíti, úunt unuimiatai najánkamu irunainia, nuyá enemtaisar eáktin, máshiniu nuyá nísha irunainia, yámaram takát enentai nekáttsa najánatniuiti, nuyá yaunchuniásha emtikiáttsar.

Lí nunké nekatin entikmanka máshiniu emtikiatniuiti, iwiarnatra júamu takát ana nújai métek, máshi pachintiukmajai.

Akánu 387.- Lí nunké nii umíktintri:

1. Yupichu yainkiar susartin, máshiniu pachiniak íí nunké emtikiatin.
2. Chicham emtikiatin júamu, wekáasar nekátin júamu, yaunchuya ikiakaárar emtikiatin tarimiat matsamsatin enentaijiai.
3. Antinchamu atinian etsérak, pénker ejéturar jukimiu atíniaiti, umiktinian aárma ana nújai métek.
4. Aents atúktinian pachiniak enentai aárat tura paant amajsat tusa chichamrukma atatui.

5. Yámaram enentai nekámu chichamra nusha, nújai métek enentaimtusma atatui.

Akánu 388.- Íí nunké ayámruktatui, máshi aents, untsúri nuyá kampunniun emesmakui nunka meseak, iwiasmaktiniaiti métek utsumamujai, émtikiatin enentai júamu, yaúnychuya paant amájsatniun ákik pachínkiar awákmakar takakmastiniaiti, nújaink júkitniuiti achia nuka paant najána etsérak takákmastiniaiti.

TÉSAK USÚMTAI

Nunka emésmakui yáimmia

Akánu 389.- Íí nunké aentsu ayámrawai, máshiniu nuyá kampunniunam warinksha emésmakma aínktsa, tura warinksha akuinkia, iwiaratniun, ákik susatniun iwiartuktinian júawai.

Níírin aents emesmamunam yainktin máshiniu atiniaitia, umitiai tana aintsank nii takatrin juní jukiartiniaiti:

1. Emesmakmin íí nunkén aán íistiniaiti.
2. Máshiniu étser nekamtikiatniuiti nunká emésmak itiurchat amajkartukiarain tusar.
3. Meserchamnia máshi pachintiukarat tusa untsumkatniuiti, tuákar pénker takáta júkiarat tusar.
4. Aentsu matsátun yaíntinian íistiniaiti, máshiniu takat júamu.

5. Atunaikiartiniaiti nunka emesmamu itiurchat áinia kishmartinian, tura itiur iwiartuktiniait nuna warikmas iístiniaiti.
6. Máshi tuákar atunaikiar takáta jukitniuiti.
7. Takát juámu umuchkiaru, nú akíkian núkap akántuktiniaiti, nuyá arántiajai achímiar takákmastiniaiti.

Akánu 390.- Nunka emeskamu ayamruktin juámu iísma atiniaiti, takatri pénker junakit tusa takakmastintri nákak jukimiu métek ati.

TÉSAK NÁWE

Aents tuákma nuyá wekátairi

Akánu 391.- li nunké tentakma iístiniaiti, níí aentsrin nunken pénker pujarat tusar iístin nuyá iísha pujarnink arántuk iístin ainiawai.

Akánu 392.- lí nunké aentsu níniuri arántuktiniaiti, ankant wekasatniun, tuinksha wetinia takusarat tusa, tuma asamtai ii nunken iwiartuk takakmastiniaiti tura arantiajaisha tsanínk pénker jukitniuiti.

TÉSAK NAWÉ CHIKÍCHIK

Aents wainma

Akánu 393.- lí nunké atuktiniaiti aents níniuri pénker wainmaati tusa, tura arántukma atí tamajai pénker pujúarat tama, tura kajernaikiamu, maniamu, itiurchat pujámu atsut

tamajai nuna ístinkia nui pujús takakmastincha másh yainkma atiniaiti.

TÉSAK NAWÉ JÍMIAR

Wekataíniu

Akánu 394.- Aents wekataíniamu jú áinia: nanam, kankém, nayants, entsa, íi nunké shíir atúk írsamu atiniaiti, aents wekátai áiniaka akikri iwiartukma atiniaíti, nuyá nui pujús takakmastincha másh yainkma atiniaiti.

AKANKÁMU JÍMIAR

Kampúnniunam pachim iwiaru, iwiakchash irunín

TÉSAK CHIKÍCHIK

Kampúntin nuyá pujámuri

Akánu 395.- li kampunniuri iistinri umitiai umpuarma juní awai:

1. li nunkén kampuntin írunu pénker íisma ati tusa iistiniaiti, nui pujúinia ísarat, yamáram najánkí wétai tamajai, nuyá yamai atatna nuna ísár emtikiartatui.
2. lí kampunniuri pénker íintsatsa chichamrukma atatuí, nunkanam enentai pénker jurúsmajai takát júkitin.
3. Aents pachinkiat tusa, irutkamu nuyá tarimiat aentscha niniurijjai ikianiawar métek wainkiarat chichamruktiniaiti, ii nunke takata iwiarnatar júana nújai.

4. Warinksha umíktin tama ana nui ii kampunniuri pujámu pénker iisma atin tamajai najátatniuíti.

Akánu 396.- Ii kampunniuri emesmamu akuinkia umítiai pénker ejeturar, wárik iwiarar yainkma atiniaiti. Aentsank kampuntin emesmamu aminuitkuinkia, chicham paant achaink, ii nunke wárik iwíaramu atiniaiti.

Kampuntin emesmamu wárik chichamrukchamuitkuinkia, káram chichamjai asutiamush aminiaiti, aintsank kampuntin surinkiamu emesmakmaitkuinkia, aents nii irutkamuri pujúinia kuitjai yainkma atiniaiti.

Warinksha íí ikiamriya, júamu, súramu núkap akuinkia, kampuntin emesmakajj tusar eákar iwíáramu umintikiakur túke íisma atiniaiti.

Kampuntin emesmakmanum kákaram chichamjai asutiamu atatui.

Akánu 397.- Warínksha íí nunké emésamamu akuinkia, íí nunké wárik kuítia iwíasmak chichamruktiniaiti, nuyá yá emesma nusha káram chichamjai asutiamu atiniaiti, tuma asamtai íí nunkénka ashi juna umíktiniaiti:

1. Aents yakesh jui akinia, untsúri tuák matsatainia najánamnia ániawai, úmíktinian tura níí umintikin ániamunmash, ayámkartin seámeamu etsernaktiniaiti emesnakchamujai. Tura úmitnakma nekamtainkia iwíartakur ejeturma atiniaiti.
2. Imiatkinjai kampuntin emesnakma aink tusar íistiniaiti, tura itiur íí kampunniuri íistataj nú nekátniuiti.

3. Warinksha sunaktin, tsupíktin, júkitin akuinkia iwiarturna atiniaiti, tseás itiurchat irunú asamtai.
4. Íí kampunniurinkia antínchamu asamtai, itiur junáktiata núna ii nunké iwiaratniuiti.
5. Nuna fírsar, nírin másh ejékamu ayámruktin atiniaiti, tuma asamtai másh itiur jukitia nuna najánamu atiniaiti.

Akáu 398.- Warinksha íí nunkén emesmakminkia, másh inítrusar takat jukímiu atiniaiti, nuka ii nunke chichamruinia anítrusartiniaiti, tuma asamtai umiktin tana nújai métek atiniaiti.

Írutkamu chicham ejéramun, íí nunké nuyá arantía nunkásh umiktiniaiti.

Írutkamunam takát chicham júna imiancha íismaitkuinkia, aents irunar kákaram umítiai tana nújai, métek umikma atatui.

Akáu 399.- Kampuntin pénker íístinian íí nunké emtikiattawai, tuma asamtai nírijai másh takát shir kampuntin waínkiatin jukímiu atiniaiti.

TÉSÁK JÍMIAR

Kampúnniunam írunu

Akáu 400.- Máshiniu páchim irunna núf pénker fírsar tusar, ii nunké chichamrukma atiniaiti.

Núu takátka máshiniuiti, kampunniunam írunu árak chichamrukma atiniaiti, warinkish ii nunken ipiampartin írunu.

Akánu 401.- Íí nunké timiaiti ankant arákash, yuránk írunu tsapachu áinia atiniaiti. Nunka máshí nekému atiniaiti nuyá chichama awájtin áinia aúsha ejéramu átin máshi íí nunkeniaitkiunkia takat émtikiatniuka iisma atatui, antsu suritkiamuiti árak aentsu emésmakmin arátniuka.

Akánu 402.- Warínkish chíkich takat ii nunké najánataj tuiniaka suritkiamuiti, máshi takat juámuka nekámu átin asamtai.

Akánu 403.- Ii nunké pénker chíkich chicham jimiarkatin najánmanka jimiartukchattawai, aentsu niniuri nuyá matsatkamu emesmakmin áinia auka ii kampunniuri áinia nunasha máshiniunu itit amakminian tawai.

TÉSAK MENAINT

Kampunniunam nuyá paantin pénker wainma

Akánu 404.- Ii nunké máshí tentakma, pújakma, núí írunaínia, entsa, kampunniuuúnam, numi, nuyá yajásma áiniá nuka nekás niniurínti, yáaksha atanchamniaíti, nérennumachminiaíti, tuma asamtai nuna pénker wainkiatniuiti emesmakma ainktsa. Nunaka umitiai umpurma tana nuna amimtikiuk nuní takakmastiniaíti umitia tana nújai métek jeáwai.

Akánu 405.- Kampuntin ámanum máshí imiátkin írunu ame chichamruktá tiri tuákma najánatma nuka pénker takata jukitin, shir wainkiatniuitji, ninki tuak takakmasartiniaiti turasha ii nunké tuakma nú írsamujai, aintsank akiknash akantuk susatniuiti pénker íisatsa máshí irutkamunam, matsatkamunam nuyá Tarimiat aents pujuiniamunam.

Umitiai tana nújai métek arantia aents irar áinia auka nunká sumak nerentniumatin jeatsui, tura kampunniunam warinksha irunun ninua anis iis nerentin ajaschamniaiti umitiai umpuarma tana nú umimtikiatniuiti.

Akánu 406.- li nunké finink írunna nuna pénker iistiniaiti émamkesar esetrar takat jukímiu atitsa warínksha emesmakma aínk tamajai máshi nayantsanam aseaku kayánaint weáru warinksha irunna nusha aintsankete.

Akánu 407.- Takakmaschatin timiáiti núnka ankant ikiukmianum aents yajaniá, nékashtai enkemá takatan najánachminiaiti, turutskesha imiatkin, yawi, kuri irunna nunasha ashichminiaiti. Áyatik Ecuadora úuntri timiájaink jusamnia aíniaiwai, nuyá íi nunkén ákik utsumamujai surukma aminiaíti, nuyá úunt tuakma nekámujai ayu timiajai.

TÉSAK AINTIÚK

Kampunniunam írúnin

Akánu 408.- Íí nunken yawi nuyá warinkish jusar atak timiatrusrik najánachmin áinia au yaksha enkemtuá jusachminiaíti, núnisank surimkiachminiaíti, nerentin ajaschamniaíti, nunká init tuma asa entsa, nayants áinia nuka máshiniuiti. Umitiainian Umpuarma tana nunisrik jú imiatkin áiniaka jusámu atiniaiti warinksha emesmatsuk.

li nunkén imiatkin áinia, chikich aents tuakaru eneachma juiniakuisha ii nunkenka íisha waitmaktiniaitji, akikri puúsar jurúmkitniuiti, íi nunkeya imiatkin achiamu asamtai nuka Umiktin Umpuarma najánamu jimiartamu atiniaiti.

Máshi imiatkin ii nunké írunu íisha iniúmamunam achiajnia nuka pénker iistiniáiti nunka emesmatsuk máshiniunu waitmamu ati tamajai.

TÉSAK EWÉJ

Nunka

Akánu 409.- Máshiniuiti Ecuadornum aents tuakma takatrinti ii nunké pénker íistin, nekaska émka pakaíri. Umiktin Umpuarma pénker íisma atiniaiti emésmankaink tusa nuyá entsa, mayai áinia ausha emésmakma achatniuíti, nuyá núnka yumpuntrain tusasha iistiniáiti.

Nuí ii nunkén emésmamu ákuinkia nekaska Ecuador nii Úuntri akiknaka akantuktiniáiti ii nunké pénker wainkiatintsa tuí emésmamu áa núi iwiárkarat tamajai.

Akánu 410.- li nunké arakmau íirunun yaínktatuí nuyá warinkish nunká takatan najánainia núna aentsun nuyá irutkamu ii nunkénka yaínktiniaíti pénker íisar arakmawarattsa nuyá árak pénker máshiniunu yaínkma ati tamajai.

TÉSAK UJÚK

Éntsa

Akánu 411.- li nunké atuktiniáiti warí íruna entsa máshi ii nunkén írunna nuka pénker íisma atiniaíti, uchich entsa, antumiánk, úunt entsa nuyá nayants áinia nuka pénker wainkiatniuiti, aentsu nuyá iwiáku áinian ayamrin asarmatai.

Entsa imiantrinkia aents nuyá kampuntin iwiakma susatniuiti.

Akánu 412.- Úunt anaíkiamu Entsa shiir íistá timiá máshi nunkanam tímiatrus iistin apujsamu tuakma najánamujai pénker chichamrukartatui íi nunkén entsa aents arakmakma nuyá chikich takatnum táamsa aínk tusa.

TÉSAK TSENKEN

Pujámu, Kampunniunmanía nuyá tsuramtikin

Akánu 413.- li Nunké máshiniu aents matsataínia nú jeáwarat tusa ejéturma ártiniaiti tura yamaíya umuchtai áiniana nújai métek takat junakit tamajai ipiantratniusha pénker ati tusa máshiniunu najátamu atiniaiti.

Akánu 414.- li nunké chicham umiktinian titiatui eneachma nunka yapajniátaincha nekatniuiti, nuní asamtai íi nunkenka ayámpruktiniáti shir iwiarnarat tusar aents sukurmákaraink máyai warinksha taamma aínk tusa, nuyá aintsank ken áiniana nuna imiatik ipiampamunam nú tsuatmamu tana nujaisa keen najánatniun chichamruktiniaiti.

Akánu 415.- li Nunké nuyá máshi íi matsamtairi tuakma kanakar najánawaru áinia úuntri ní enentaimmijaink takata iwiarnatrartiniaiti, níi nunkén pénker íistinian nuyá, aintsank kampunniunam, yajasma nanamtin áiniana nú pénker iisma átitsa, núnisank kampuntin takaschatin tamancha umiktiniati.

Entsá, warinksha ajapatniun, miniarmin nuyá miniarchamnia áiniana nuna pénker íistin. Nú tsuatmak ajapatniun imiatkinian susatniuiti nú juúkar ajapatniun.

TESÁMU VIII

Yajániajai Achiniairma

AKANKÁMU CHIKÍCHIK

Yajániajai achiniairma juarma

Akánu 416.- Yajániajai iruntramujai Ecuador tsanink aujmatmaka aents íi nunké pujúinia nekámu tura utsumamujai atiniaiti, tuma asamtai takat nájánmasha nuyá etserkamu nekamtikiamu atiniaiti:

1. Yajánia tuakma áinia nújai nfi najántafri tura takakmamuri aintsank ákik wainmarincha arantunaikiar pujusartiniaiti, warinkish takakmajaisha yainiaikiartiniaiti, nuyá ajamnaisartin ainiawai.
2. Ayámtrunaiktiniati máaniatsuk chicham akuisha iwiartunairtiniaiti, tura chikich tuakaru máaniniakuish tsurinktinian enentaimsartiniaiti.
3. Chikich imiancha takainiakuinkia emkatin enentaichuitkiuinkia kákaram chichaman awánkatniuti, yainkchaniuiti jintia arenchatniuiti tura ákik akuisha tsurinkiashtiniaiti, suntari awajrashtiniaiti.
4. Arantunaiyamu ati, tura aintsank manitai ipiattai sunaisashtiniaiti, nuyá suntaran chikich tuakma nunke enkeashtiniaiti.
5. Níniuri nekáramu atí chikichkimas aents tuakma áiniash, Tarimiat aents iruntramurin arantuktiniaíti, tuma asa aents imiancha iniaisaink, tura nunkach aents najánachtinian chichamrúktiniaíti.

6. Máshi nunkanmaya aents ankant surítkiachma wekasarat tusa ankantan susatniúfti tura warinksha imiatkin amajkamu aínk tusa íistiniaiti, tuma asa juarki nunkaninkia yamaram nunkanam pachischamu wekasatin ainiawai.
7. Utsuwai arantia aents arantuktinian nuyá chíkich nunkanmaya wekainiaksha arantukma ni iniashi emestukchamu wekasarat tawai.
8. Máshiniuaentsní nunkén matsatainiaka itit makchamu, tura warijaínksha kajerkachma asutiamuchu, ankant pujustin irsatniuiti.
9. Máshi nunká tuakaru áinia nuna takat najánmanum ankant pachinkiar yaimkiarat timiaíti, nusha máshiniúnu yaimkiatin timiaitkiuínkia.
10. Máshi nunká takat juamuka, pachinkiar jimiartukar, atunaikiar, jukitin timiaiti, tuma asamtai máshi tuakaru áinia nujainkia tsaninkiar emkatniun, pénker matsamsatniun, atunaikiartin ákik akuisha chichamrunaiktiniaiti.
11. Utsuktin émkaka shiir matsamsatniun nunkaní yámaram nunka, tura máshi yámaram nunkanam ákik akuisha, nuyá takat júamu aínia nuka paant najánamu atiniaiti.
12. Emtikiawai máshi nunkanam ákik chichamna nuyá tuakar yainiaiktin enentai juamuka pénker aents yainktn atiniaiti, tura ákik ikianaiyamusha máshiniunu, antsu tuakma niniunak enetaimiainiaka atsá timiaiti.

13. Emtikiatniuti áshi nunkanam émka imiantri pénker íirsatin tama Umiktin Umpuarma jintiamu yaimkiatniuiti.

AKANKÁMU JÍMIAR

Umírnaikiatin timia ejéramu

Akánu 417.- Yajánia nunka tuakmajai achiniar Ecuador nunkanam pujámu umitiaí áarma tana nújai métek junáktiutui, tura aénts ayámramu umirkatin tama ana nuka tímiatrusrik aentsnaka íintsattawai núnisank umitiaijiai métek najánnattawai.

Akánu 418.- Ecuadora Úuntrinkia arántia umitiai áarma tímiatrusank níisha awená uminkiatniun najánnattawai.

Ecuadora Úuntri warinkish umíktinian yajániajai kuesmakma úunt tuakma nekamtikiatniuíti warínia nájana nuna, áyatik awenamu atiniaíti patatkar nákak arúrmarinkia nawe tsawant atiniaíti tuakma ujakmaka.

Akánu 419.- Yajánia umiktin najánamuka Úunt tuakma áyu titiniaíti jú enentaijiai:

1. Nunká tesamurijiai enentai akui.
2. Enentai tsanintiamu nuyanchuka suntar jimiartamujai.
3. Umiktin Umpuarma áarmari yapajiatin, iwiarkatin akui.
4. Umiktin Umpuarma Ecuador num najánamu enentai jáakui.
5. Yajánia ákik wainkiatin iwiarnarar takat júamujai métek.

6. Ii nunké chikich nunkajai tsanink ákik chichamnash juamu ákui.
7. Chikich nunka takat juámu íis íi nunkéncha enentai enkeátin akui.
8. Kampuntin máshiniu, émka entsa, nuyá íi pujámuri íirunu wainkiatin enentai akui.

Akánu 420.- Umiktin Umpurma najánamu pénker umintikiatin tusa máshí inítramum atiniafti, nuka aénts seameakuisha, turutskesha Ecuadora Úuntrisha seameakui.

Ecuadora Úuntri umintikiatniuiti imiáncha enentai ákuinkia, tura antsu aénts imiancha íismaitkiinkia nú enentaikia junaki najánatniuiti.

Akánu 421.- Surutai enentai Yajánia akuinkia nakak umintikiatniuiti aénts tsuamatainiam warínmaksha emésmachkui nuyá yamáram enentai jiniainia aintsank.

Akánu 422.- Yajánia tuakma íi nunkén warínkish akíntia takata jukitiaj takuínkia umitai arantunaiyamu Ecuadora Úuntri najána kuesmarchattui.

Antsu tuakma Yajánia íi nunké itiurchat pujákui ayámruktin enentaiijai taunka tsankatkatniuiti, nusha itiurchatnum pachitkia achatniuiti.

Aéntsu tumash enentaijiainkia wárik Ecuadora Úuntri enentai jusa iwiáratniuiti máshi aénts itiurchat enentai juiniachmanumak.

AKANKÁMU MENAINT

Yamaram nunkanam pujuiniajai pachínma

Akánu 423.- Tuakma áinia yámaram nunkanmaya pachíniara nuyá Nunka Nayants jíitra pujuiniajai pachiniamuka timianaiti, tumak Ecuador num juní amiktinnium sumamui:

1. Útsuktin akíknum, páchinmanum, métek atinnium; árak jimiartamunam nuyá surutai sunaisatniunam.
2. Ii nunkén yawi irunna nusha pénker aujmtsar sunaiyamunam, tura keen áinia ajámnaiyamu nuyá entsanam, nekamusha nekamtikma yurumkanmasha yaíniaktinnium.
3. Ikiákartin shir Takat arantia enentai íinink eakar émtikiatniun arant wearu aún tesakak, kampunniun, tuakmanum, unuimiatnum, najántainiam, másh tsuamatainiam émkatin enentaijai waketkishtinjai.
4. Ayámrukar íiniu paant amajsatin máshiniunu wainkiatniunu nuyá máshí pujuinia najántai jimiartuktinnia, yámaram nunka nuyá Nunka jíitra Nayants tamanum, aintsank chicham ujanaiktin achiniairmanum nuyá najántai sunaiyamunam.
5. Aents yámaram nunkanmayainji Latinoamericano nuyá Caribeño Nayants nunka jíitraru aéntsuitji titin aran tuinksha irar wekakrishsha.
6. Máshiniu nuumtak yámaram nunkánmaya asa tsaninkiar ayamrunaiktin.

7. Aents yámaram nunkanmaya (Latinoamericano) nuyá (Caribeno) Nayants Nunka jíítra aénts tuaku asar amirnaikitai tama enentai jusar takastin áiniawai.

TESÁMU IX

Umíktin Umpuarma imiantrí

AKANKÁMU CHIKÍCHIK

Juarma

Akánu 424.- Umíktin Umpuarma nankamakuiti tuma asa iniakratniuiti. Máshiniu Umitiai asa tura najánachkunka imiánchaiti umitiai.

Umitiai tura arantamu yajánia aéntsu ayamrin áinia auka ñi nunkencha timian enentaimtusma atiniaiti, máshiniu kakaram susamuiti.

Akánu 425.- Umitiai juní úuntnumia juarki tesamuiti: Umíktin Umpuarma Ecuador nuyá arantia umitiai najánamu; takat juamunu, patatkari, tesamu umitaiiri, nuyá uchich tesamu umitaiiri, iniakratin, útsua, nuyá takata suá máshiniu takakmamunam.

Nuyá itiurchat akuinkia umimtikiatniuka Úunt Tuakarú Chichaman Tsúpin Umíktin Umpuarma tama núf iwiarnartiniaiti, Úunt Anaíkiamu Chicham Iwiartai Íyá Úunt takamtikin áinia nuka Umíktin Umpuarma umimtikiantiniaiti.

Ni naakmarinkia takatrí nájanmajai métek iirsamu atiniaiti ninki takakmainiaka.

Akánu 426.- Máshi aents úunt náamka, tuakma umitiain umikiartin ainiawai.

Úunt Anaíkiamu Chicham Iwiartai liyá nuyá Úunt Anaíkiarma Chicham Iwiartai linia, máshiniu takauri ainiaka nakak umitiai umikiar umimtikiatin ainiawai.

Umitiainiam nuyá arántia umíktin áiniaka aéntsnaikuiinkia

wárik umimtikiatniuiti, nekayatar nekachu ajaschatniuiti.

Akánu 427.- Umikiartin najánamuka akánujai métek aujsar amímtikiatniuiti, nekáchrikia aujsar itiúr tá nuní najánatniuiti, tuma asamtai arantukar aentsú níniuri áinia najánatniuiti.

Akánu 428.- Nú Urutaínk warinksha takat juamunam Úunt Anaíkiamu chicham iwiartai Iyá nuyá Úunnt Aníkiarma Chicham Iwiartai Inia áinia auka takat juki weamunam imiancha akuinkia kákaram chicham áarar tsurintiniaiti tura Úunt Tuakáru Chichaman Tsúpin Umiktin Umpuarma nui akupkatniuiti aintiuk ewej tsawant tesamujai umimtiktai iis ejerát tusa.

Tura nú tsawant tesámu nankasmatainkia itiurchat amákma ataksha kákaram chicham áarar patátkatniuiti ayámrumaktajsar.

AKANKÁMU JÍMIAR

Úunt Tuakáru Chicham Tsupin Umiktin Umpuarma

Akánu 429.- Máshiniu íistinia émtakuka Úunt Tuakáru Chicháman Tsupin Umiktin Umpurma áinia nuna máshí jintias íisartinkia, níirinkia Tunkínmaiti.

Nú takat júkitniun émtikiuka Úunt Tuakáru Chicham Tsupin Umiktin Umpurma máshiniu jintias íistiniaiti warinksha áan kishmaktin asa.

Akánu 430.- Úunt Tuakáru Chichaman Tsupin Umiktin Umpurma núna takatrinkia kanak ninki takákmak akiknash umúchkatniuiti. Umitiai áarma níi takamastinniaka ejéturtatui níi umíktintrincha aínsank.

Akánu 431.- Nú Úunt Tuakáru Chichaman Tsupin Umiktin Umpuarman anamtainia pachítkia áchatniuiti, aínsank takatriyá umúchkachma atiniaiti, níi takátriniak enéntaimtusartiniaiti.

Takata umianchkuinkia Fiscal General de la Nación nuyá Corte Nacional de Justicia nui takakmainiajai jimiar menaint takakmainia iruntramujai asutiatniuiti.

Aéntsú umitiaí umiachkuinkia asuttiáijjai asutiamu atiniaiti, nusha tuákaru ajápruamu, tura takatriyá ajapatniuítkiuinkia aents takákmainia núkap ajápruamu atiniaáti umitiai tana nújai métek.

Akánu 432.- Úunt Tuakáru Chicháman Tsúpin Umiktin Umpurman júna takakmasartin áiniawai nuyá níi takattri jukiartiniaiti umitiai tana nújai métek.

Usumtai uwi takakmasartiniaíti, awena iniaikiachma menaintiú uwi takákmasarmatai ataksha takakmamuri awena susámu áartiniaiti nuka menaintiu susamu.

Umitiai tana aínsank takakmaú tasmatainkia chikich yainktiniaiti.

Akánu 433.- Nú Úunt tuakaru Chicham Tsúpin Umiktin Umpuarman juna amiktniaiti:

1. Ecuador numía tura anaitiai tuakmanum pachitkia atiniaíti.
2. Unuimiarma menaint nekapak tesamu ejeka atiniaiti Chichaman iwiartai unuimiatra nekamu Ecuadornum.

3. Esetar chicham iwiartai unuúmiatmanum takakmasu nawe uwi atiniaiti.
4. Esetar nii paant enentaimin iniákma atiniaiti.
5. Náamtai tuákmanum chichámramunam anaikiamu áchatniuiti nawe uwi nankamasainiá nui.

Umíktin Umpurma juna umiktinian ejékatniuiti.

Akánu 434.- Úunt Tuakarma Chichaman Tsupin Umiktin Umpuarma takakmasartinkia anaín ainiá níi unuimiarmán íirsar anaikiamu áartiniaiti nuka anainiuka jú áiniawai, umitiai najántainmaya, Úuntriya, nuyá paant najántai tuákmanumia, nuinkia anamkartinkia núa nuyá aishmank métek pachinkiertiniaiti.

Nú anaikiatin pénker jukitniuka umitiai tana nújai métek jukitniuiti.

Akánu 435.- Úunt Tuakarma Chichaman Tsupin Umiktin Umpuarma juakaruka ninki tuakar Úuntrinkia anaikiartiniaiti, nuka menaintiu uwi takakmasartiniaiti, tura awena anaikiamu achatniuiti. Úuntrinkia Úunt Tuakarma Chichaman Tsupin Umiktin Umpuarma tuakma émtikiatniuiti.

Akánu 436.- Úunt Tuakarma Chichaman Tsúpin Umiktin Umpuarma umitiai tana nuyasha juna najánawartiniaiti:

1. Umitiai aarman aujin, yajáya umitiaín Ecuador nunka najánamun, nii takat juamuka umimtikin atinaíiti.
2. Nékachkunka nuna neká umimtikin Úuntri najanamun íiras.

3. Takat juamun penkerchaiti tiar, juni ati tu eseturartiniaiti Umíktin Umpurma tana núnik.
4. Takaúri máshi yaímmianum umiámu atsakuinkia takattri nuyá émesmamu íirsar umímtikiartin.
5. Núkap émesmakma akui nekáwarka asutiátniuncha chichaman áarar ejeturar takakmaú umíkchamurijiai métek asutiáwartiniaiti.
6. Asutiámu chichaman áarar ejerartiniaiti aents takakmaú juna umitmakuiti tura juní asutiámu atiniaíti tiar.
7. Maí tuakuk chichama itiúrchat juíniakui chichaman iwiárin asa émtuk máshiniu ejerátniuiti.
8. Lí nunkén itiúrchat emésmamu akui, takákmmamu íiniasar ayámrumaktin tumátskesh ewémratin tama chicham áarma jíikiartiniaiti nusha emésmamu máshiniuitkiui.
9. Umítiain umiáchkui nekawar umíkchanka asutiáwartiniaiti.
10. Umítiai juní umínkiatin taman takákmau máshiniu tuakma áinia nuí umíkcharunka asutiáwartatui tura nuna núran ajakí weakuinkia. Umíktin Umpuarma tana nújai métek asutiáwartiniaiti.

Akánu 437.- Aents umítmakai tinia asutiátnin enentaí jurusma ausha nísha ayámrumaktiniaiti nunaka junis:

1. Umíktin áshi umirkamu nunaiti.

2. Umikmakai timiaka nekaschafti tama pénker ejer awástiniaiti umitiai tana nuna umiak.

Akánu 438.- Únt Tuakarma Chichaman Tsupin junash umitiai tana auncha patak juni najanáttui:

1. Yajániá umitiai úunt tuátai ayu timian.
2. Untsumna nuámtak tuakar takata juinia nunanun.
3. Umikchamun Ecuadora Úuntri awáásman Umiktin Umpuarma.

Akánu 439.- Umitiai imiánchaitkiuinkia aénts yáaksha awásminiaiti, tuákkesha nuyá nínkisha pénker nekapeákka

Akánu 440.- Aésnt asutiátin, nuyá Únt Tuakaru Chichaman Tsupin Umiktin Umpurma nájanmanka yaksha tsurinchamniaiti.

AKANKÁMU MENAINT

Umiktin najánamu iwiáramu

Akánu 441.- Warinksha áarmanum enéntai apujsamunam Umiktin áarma Umpuarma jú itiurchat akuínkia juní ejéramu atiniaíti:

1. Ecuadora Úuntri aníntrusmajai, turutskéshe aénts tuakar tuíniakui ejéar yapajámu átiniaiti.
2. Únt tuatai juiníá nuka nukapek ayu tuiniakui, jimiara jíánaitkiamujai atiniaiti, menántiu tsawant ankant susamujai, tura máshi tuakar menaint jeajai ayu timia atiniaiti.

Akánu 442.- Núkap yapájniashitiniaitkiuinkia Ecuadora Úuntri, aéntskesh yapajtainiam pachitkiainiá seámeamu atiniaiti tura úunt tuakma ayu timia.

Nú umitiai iwiaratniuka úunt tuakma ejératniuiti jimiará jiánaitkiamujai tura uku jianaitmiaka menaintiu nantu atiniaiti, usumtai nawe tsawant, nuyá ayu timia núkap tuákmajai.

Nuyá máshi ayu titiniáitkiuinkia ajápruamu nánkasmatai tsenken tsawant jeámtai anaitiaí tuákma juínia itiur juaka nuna etsérkar máshiniu páant najánamu atiniaiti.

Akánu 443.- Úunt Tuakarma Chichaman Tsupin Umíktin Umpurma nú chikichimsa tesakma áiniana nú juí pachítkiainia nunaka.

Akánu 444.- Úunt Tuakma kara atitiai auka anintrustin untsúmkamujai najántniuiti. Nuka Ecuadora Úuntri seammia atíniaiti turutskesh aénts matsatainia menaintiu kanákmajai seamaíniakui nuka ajáprutai áarma pachitkia áiniana nú. Nú anaimikaru tuakar ayu timia nújai juárnaktiniaiti. Jú umitiai áarma ayu tama ati takurkia aénts Ecuadora nunké pujúinia nú ajaperink nuyá chikíchik pátasank ajápruamu átiniaiti.

AMINKIATIN NAJÁNAMU

CHIKICHIK: Chicham umpuarma najánamu washim jimiará nawe tsawant tesaramujai, jui umitiai umpuarma juarnakui, yurumkanum najánartatui, amimtikniun najántairin, judicatura tuakman tura aents pachinma tuakma itiur takatri jukittia nuna najátatniuiti.

Nuyá umitiai ainianka menaintiu washim ujúk nawe tsawant tesaramujai najánkartatui:

1. Umpuarma umitiai Úunt Tuakma Chicham Iwiartai ní takatri juak umiktintrin nájateamu.
2. Umpuarma umitiai imkiatkin entsa ankant irúnu itiur wainkiattaj yamai, atak, iístin nuyá warínkish métek sunaisattin iwiartuktatui.
3. Umitiai, aents matsatkamu pachinkiatin.
4. Umpuarma umitiai chicham etserma.
5. Umitiai unuimitai, úunt unuimiatai, najántain nuyá nakunu amiktin.
6. Umpuarma umitiai máshiniu tama amintikiatin.
7. Umpuarma umitiai máshiniu ayamrin.
8. Umitia anujmamtai, eémka iitiai, suramunu takurmakmanun, nuyá máshiniu pachíkma áinianu.
9. Umpuarma umitiai tuakma áinia nunke tesarka takat jukitniun, nuyá akikri tesaratniun tura apu tuakma. Umitiai tesawar iruntratniun yarush uwi iniankkachatin.

10. Umitiai asuttiai umitiari suntarnum nuyá pushú entsaru áinia ai.

11. Umitiai máshiniu nekasen amimtiktai.

Umitiai umimtikratin umpuartinkia anak chichama ayu timia ejen emkat paant tuamurin najánawartatui.

JIMIAR: Umitiai iwiarin menaint nawe Tsawant nekapek, yamamtaikia kanairartatui, chichamrinian, tura aents pachintiai áinia auncha untsumkar paant najánamujai, amitiairijai métek nájatman umitiainiam tana aintsank.

Tura nuna chichamrin ainiasha nunisank washim jimiará nawe Tsawantjai métek umitiarin najátawar umirkartatui.

MENAIN: Takakmauri aishmank tura núa, kasamkarain tusa itiaianiam, máshi pachimmanam nuyá wainkiatniunam takakmainiaka, tura tuke namrukaru áiniaka, máshi tuakmanum takauri nuyá úuntri takátainiam nankamakiartatui.

Superintendencia achitkia eémki takatrin iniakmaki kakaram umikia yapajnia.

AINTIUK: Takakmauri aishmank tura núa, Úunt Tuakma Chicham jurukir umitiai najántainia nuka, tuke anaitiukma ainiaka úunt tuakar nui nankamakiar takakmasartatui.

Imiatkin uunt tuakma irunu máshi umitiai najántainiam nankamakiartatui.

EWEJ: Umintik Atuin tuakmanum takakmauri, núa nuyá aishmank ainiaka nekapmantiksamujai Úunt Tuakmanum

Chicham nankamakiartatui.

Imiatik takakmatai ainia másh Úunt Tuakmanum Chicham Iwiartai iniankankittiawai.

Ákik umuchman untri tura kara atirmajinkia máshiniu takauri ajastatui, umitiainia tana nújai métek. Tura takakuri akikri áinia nuka máshi yamáram tuakmánun nankamaktiatui.

UJUK: Uchi nuyá natsa chichamrin. Nuakarun, núan, aents tuakman nuyá tarimiat aents áinian, mukusa aentsun Montubios taman métekrak tama najánawartatui umitiai tama nújai métek iruntrartatui.

TSENKENT: Úunt Tuákma, Úunt Tuakma Nankamaku, Úunt Chicham Iwiartai Tuakma, Matsatkamu Chicham Iwiartai, Uúntri, Úunt Enentai Chichamara nuyá Úunt Asuttia áinia nui takakmauri áinia Úunt. Chicham Nekatai tama nui nankamakiartatui, máshiniu anairajnia nui.

YARUSH: Máshiniu umitmakma taman chichaman jurusar asutiatniun pujurainia auka máshi Úunt Chicham Tuakma Iwiartai nankamakiartatui.

USUMTAI: Úunt Chicham Nekatai, juarma tama maintiu washim ujúk nawe tsawant, métek umitiai tura ákik umuchma najátawar umitiainiam tana nújai métek umimtikiartin.

Tura ákik umuchma iin áinia au yamaik takainiak amukma juawai.

Yámaram anairatniuka paant najánar untsumar takaurinkia anaiturma atatui, tura takakmainia, yamaram

anaintanam takakmaki weartatui.

Chicham najánamu ejeturar ikiusarma áinia ausha yámaram iwiartutainiam enkeamu juakartatui.

NAWE: Warinksha aents emesmakma Úunt Chicham akuí iwiartai máshiniu nuka Úunt Ayámkartin máshiniu, juú iruntramu nújai Ayámkartin máshiniú irúnainiawai, jimiara uwi tesaramujai najánnattui Uchin nuyá natsa áinia, takainia chichámruktiniaiti.

NAWE CHIKICHIK: Emka Úunt Tuakma Anaitiai nuyá emkak Úunt Tuakma Aujmatai menaint uwi jeamunam nui takakmastin aentsun junaktatui pénker esetrar untsumkamujai.

Úunt Iruntramu Anaitiai nuyá nui takauri áinia nuka nuink umitiai tana nújai métek takasartatui.

Úunt Iruntramu Anaitiai ni takakmauri pénker iwiarnaruka nuink juakartatui, tura nunka tesaramu áinia nuinkia Uchich Iruntai Anaitiai najáankartatui umitiai tana nújai métek, nuyá nuna nunkach tuaknaka atsttawai.

NAWE JIMIAR: Tsawant aintiuk nawe ewej tesaramujai anamtainiam pachinkiatin tuaku áinia nuka yámaram anaitiai juamunam aámarartin áiniawai tumak níí írkari iniakmasartiniaiti.

NAWE MENAINT: Unuimiarcha áinia máshi unuiniaktin máshiniu takauri takatrinti tuma asamtai ajapramun máshi ankant susa ífstiniaiti.

NAWE AINTIUK: Juarku ákik umuchma uwi jimiara nupanti usumtai amanumka, nuyá ákik ninki tuakmanum

akanmaka, jimiara nupanti yarush amainia nújai nunká achatniuiti.

NAWE EWEJ: Takat jutairi, takakmauri Úunt Matsatkamu tuakma tsuraku nuyá kawenma ainiaka máshiniu Úunt Anaikiamu Nunka Tesakma nayants eséntra tamanum nankamakiataui.

NAWE UJÚK: Nunka tesakri itiurchat iwiaratin, Ecuadora úuntrin etserkamu atiniaiti, jimiara uwi jeasank umitiai enkemamtai itiuur ii nunke iistiniait úunt umiktiniam nuyá itiurchat iwiaramu atiniaiti.

NAWE TSENKENT.- li nunkée jimiara uwi jeasank jú amitiai enkemamtai, ákikia enkeawartatui ninki tesakmanum tuakaru áinia nuna, aintsank warinkish ákik jutai áinia nunasha tura apujsar iniu ayamruktinia máshiniu ejerattawai umitiai papinium tana aintsank.

NAWE YARUSH.- li nunke máshiniu akikia enkeatniuiti unuimiat pénker jukitniun uchi nuyá natsa unuimiatain, nunka yawiri juramunam akantukma atiniaiti.

Timiatrus chicham yámaram umitiai ayu timia jinkimtainkia, nuinkia unuimiatai úuntna nuyá chikich áinia nunash ákik akantukma atatui, tumak uchi unuimiau unuimiartasa enkemna nui akikmaktin atsuttawai. Nuyá ii nunke akikri akantukmanum unuimiat pachikma atatui.

Tura, iniakma úunt unuimiatai ninki tuakar najánawaru áinia, nuka umitiai papi jinkimtai nekapmamsar iismajai pénker jinkimtainkia yainkma ártatui, tura umitiai tana aintsank akiknaka achiki weartatui, nuyá uchi pénker unuimiau áinia ausha enentaimtusma ártatui.

NAWE USUMTAI.- li nunkenka unuimiatai chikichik nuyá unturi unuikiartin takakmainia aun nekapmamtikias iisartatui, unuimiati pénker iísma, tura unuimiarcharu eémtikiamu aárat tusa.

Tsawant eémki weak menaintiu uwi jea métek unuimiatai áinia nú itiur takakmaki wena nuna takatri nekarattawai tura emtikiattawai unuimiatai emtikiak.

JIMIARA NAWE.- Ecuadora úuntri Úunt unuimiatai máshiniunu uraitiawai, nuka unuimiata emtikiatin enentaijiai, takat jukitin ákik emtikiatin nuyá unuimiat pénker takastinnia junakit tu enentaijiai.

Yámaram umiktin jíínkimtai ewej uwi jeakui máshi úunt unuimiatai áinia, nekapmamtiksa iísma ártatui, máshi wari takatna juinia nújai métek umitiai tana, aintsank. Úunt unuimiatai emki wenatsna nunkach ajaki wena nunaka ankasma ártatui.

JIMIAR NAWE CHIKICHIK.- Másh unuikiartin áinia nuna takatri amikar ankant ajainiakui pénker akikma ártiniaiti nuka uwirijiai nuyá takat tsawant jeamujai métek. Akikrinkia washim nawe ewej akik mantumma ewejnum akantukma atiniaiti. Umitiai papi pénker akik susatniunka nekapmatar akantuktatui.

JIMIAR NAWE JIMIAR.- Máshiniu ákik tesarma tsuamatainiu akantukma atiniaiti, nuka uwijiai métek akantukma nuyá yawi entsari ukuinmia nú akikjiai ewej tesasma akantukmajai, nuka aintiuk akik jeaku akantukma jeatsa.

JIMIARÁ NAWE MENAINT.- Tsawant washim yarush

nawe tesaramujai yámaram aents niniuri ejetumar Kuit iwiasmatai takustinian Úunt Iruntramu aents ayumrumatai najánattawai, níí akikri suamujai kuitia nantuje najáta nuka máshiniu yupichu akikia, takatan waitmakar emkarat.

JIMIARÁ NAWÉ AINTIUK.- Menaint nawe tsawant tesaramujai jú umitiai ayu tunamtai, Ecuadora úuntri chicham ujanaitiai tuntui áinia nuna iistin najána, tua niniunak taká máshiniu takainia nuna, chikichik enentai ati tusa, tura nuna neka, washim yarush nawe tsawant etserkartiniaiti.

JIMIARÁ NAWÉ EWEJ.- Ákik akitiinkia wakar weartiniaiti tumaki pénker métekrak ákik waitmaktin ati tusa umitiai tana nújai métek. Ákik suamuka ní shuar pujakmanum ákik yurumkanmash métek jeat tusa. Tura úunt ajainiak takata inianknainia ausha akiksha wakar wakar wetiniaiti.

JIMIARÁ NAWÉ UJUK.- Tsawant menaintiu washim ujúk nawe tsawant tesaramujai umpuarma jinia nújai métek entsajai takakmainia áinia nuna wekatus iisartatui niniunak takainia nuna chichama iwiarint, nuyá aentsu pujútairi emtikiatin.

Ecuadora úuntri iístiniaiti, máshi entsanu takainia au úuntri ewej juakat tura umitiai tana nunisank nuyá ákik umuchma iín iísma paant tamakmasarat tusar.

Entsanam aents tumashmakar pujuiniaka tura akikia takurmakcha áinia nuka tumash tsankuramu atiniaiti umitiai tana nutiksank.

JIMIARÁ NAWÉ TSENKENT.- Ecuadora úuntri, jimiará uwi tesaramujai umitiai ayu timia juakai nuyá ankant

takakui, entsa chichaman pénker iwiarkatniun, tura máshi írsamu atiniaiti, aintsank arakmau áinia nuka núkap yainkma atiniaiti.

JIMIARÁ NAWE YARUSH.- Umitiai tana, aintsank ninki tuakar takakmainia auka yawi nuyá nunka irunu juamunam nawe akantsamu juinia nújai takata jukiartiniaiti, nuka kampunniunmaya tesaramu, entsa júamu áinia nusha nunisank ákik juamu entsa Paute, Pisayambo nuyá Agoyan (amitiai 047), tuakma Azuay, Cañar, Morona Santiago nuyá Tunguragua áinia nú achiamu nújai métek yainkiartiniati.

JIMIARÁ NAWE USUMTAI.- Arantia tuakma akikjai takakmainia nuka warikmas iwiartumarartiniaiti, jú yámaram umitiai najánatin enkemmajai métek.

Aintsank chicham pachinma etsertai áiniana, nunisank chikich tuakma niniuriniak enentaimtus akikia apujsaru áiniana nusha iniais, iwiartukma atiniaiti, pénker chicham etserma áinia nusha máshiniunu juakat tama, nuka jimiara uwi tesaramu atiniaiti.

MENAINTIU NAWE.- Ákik Yaimia, menaintiu washim ujúk nawe tsawant, tesaramu máshi tuakma niniuriniak takainía nuka máshiniu ii nunké najánarartatui. Tura ákik enkemawaru áinia pénker íisma atinaiiti warinia najánawarta niniuri íis akikia paant najánki wetiniati.

Íi nunkée atuktatui, máshiniu tsankamkamu atiniaiti aents akikia takakainiachu ántrar susatin, ajamtin uchi takaku áinia nusha akikchajai iistin, nuka tsawant tesamu atiniaiti.

Máshi ákik enkemawaru áinia, chikich tuakmanum nuka

másh ii nunke ákik júamu nekajnia aintsank nekamu atiniaiti, nuyá ííniua nuka umiktin najatar amimtikiamu atatui.

Eakar ákik chinchipnum nuyá tsuramat, nuyá keen áinia nui enkemawaruka chicham najátamu ana nújai métek iwiartukma atiniaiti.

Nuyá tsawant tesaramu, menaintiu washim ujuk nawe tsawant jeakui, ákik yaimmia tama amukattui.

AMUKATNIUNU NAJÁTAMU

Umitiai najánamu Ecuador nunkanam umiktin ayumpum nantuti najánamu uwi nupanti usumati washim usumtai nawe yarushtin najánamuka nuyá chikich umitiai jinkiaruka tuke iwiakmarinkia atiniaiti nusha umitiai yamarma nújai métek jeakea nuke.

CHIKÍCHNUM INIANKAKTIN

AKANKAMU CHIKICHIK

Itiura iniankaktiniait

Akánu. 1. Untsumkar ayu tamanum aents tuakaru ayu tamajai ju umitiai yámaram enkemamtainkia máshiniu jui uminkiatin aarma auka amimtikiamu atatui.

AKANKAMU JÍMIAR

Anairatniunu

Akánu. 2. (Anaitiai Najanatniuri) Úuntri anairatniuka jui umitiainiam tana timiatrusan aminkiatniuiti nunaka Úunt anaitiai tuakma júamu emtikiatniuiti.

Akánu. 3. (Máshiniu anaikiatin) Úunt anaitiai tuakma juamu, menaintiu nawe tsawant tesaramujai, pénker iwiarturmajai jú úunt anaikiatniun untsumkattawai:

1. Ecuadora úuntri nuya patatkári.
2. Ewej atuin Yámaram nunkanam naamrukaru.
3. Úunt tuatainiam chicham jutainiam pachinkiatin chikichik tuakmanum jimiara aents anaikiamu atiniaiti, aents tuakarma nújai métek atiniaiti.
4. Matsatkamu úuntri nuyá patatkari anaikiatin.
5. Uchich tuakma Irutkamu úuntri iniaikiatin.
6. Chichamrin ewej turutskesh núkap ainiakuinkia nawe ewej atiniaiti (Consejales).
7. Uchich matsatkamunmash aents ewej anaikiatniuit ti núkap ajapruamu úuntri atiniaiti.

Nu tu ajapruatniuka yamaipiat aentsu naari jurma nújai métek atiniaiti.

Akánu. 4. (Namkartinia naari júamu) Anaiyamunam tuakaru áinia aents anamkaru ataksha awakeki

anaikiamnia ainiawai namkarat tusa.

Tura chikicha pachinkiatsa wakeruiniakka chickichik washimramu aents ayu tiri kuesmarmajai pachinkiertiniaiti, tuma asamtai, Úunt anaitiai tuakma júamu amatai papi susartiniaiti.

Tura namainia nuka ni patatkarincha takusartiniaiti, nui pachinmanuka nua nuyá aishmank métek pachinkiertiniaiti.

Akánu. 5. (Itiur ajapruatniuit) anain áinia nuka yana ajapruatta nuna iisar ajapruawartiniaiti ni wakeramun nuka juni:

1. Emka papinnaka, úuntri nuyá patatkari Yámaram nunkanam namka, Matsatkamu úuntri nuyá patatkari nuyá Irutkamu úuntri shait ankannum anajkatniuiti.
2. Tura awajtin máshiniu nuyá matsatkamunmaya áinia, aran ajapruatin, nuyá chikich ajapruatniuka shait amaktiniaiti enketkamunam.

Akánu. 6. (Ajapruamu nekapmartin), ajapruamu nekapmakur juni jukitniuiti:

1. Ecuadora Úuntri nuyá patatkari anaiyamuka umitiai tana nújai métek najánatniuiti.
2. Tura matsatkamu úuntri nuyá patatkari anaiyanuka yá áinia ajapruamuit nú juwawai.
3. Yamaram nunkanam namruku anaiyamuka junis atatui:

- a) Ajapruamu chikichkimiari nekapmatrattui.
 - b) Nú ajapruamka chikichkimiari weawai, 1, 3, 5, 7, 9, 11 máshiniu anaiyamu ejeman
 - c) Nú nekapmama ejekamuka ishichiknumia juarki núkap nú ejékatniuiti.
 - d) Nekapmamu emki weakuinkia nuyá chikichkiniuitkuinkia núkap ajapruamunam yá imia nunkachit nú emkemui.
 - e) Antsu métek juakmatainkia, jurtimiaiti yá juaktata nú.
 - f) Yá awaknaka nú nekarikia ti ajapruamu juaktiniaiti.
4. Tura awajtin, nuyá arantia anaitiamu, irutkamu úuntri anaiyamunnaka, uchich matsatkamu anaiyamunmak junis nekaparma atiniaiti:
- 4.1. Nunka tesamunam úunt iniaiyamuka jimiari emak wena anaikiamu atatui patatkarish nunisank tumak mai núkap ajapruamu iniaikiamu atiniaiti.
 - 4.2. Tura menaint turushkesh núkap anaiyamu ana nuinkia junis anairamu atiniaiti:
 - a) Ajapruamu áinia nú chikichkimiari nekapturma atatui anamtai tuakua nújai métek.
 - b) Nú ajapruamuka juni nakarma ártiniaiti nekapmamu 1, 3, 5, 7, 9, 11 anaikiartin jeamam.

- c) Nekapmaka ejeramua nuka nukapnumia juarki ishichik takakainiajai métek pekartiainiiti.
- d) Antsu chikichik anaitiaim emak weakuinkia yá uku ejechik takakea nú enkemeawai.
- e) Métekjuakarmatainkiajurarawakmantikiatniuiti.
- f) Tura ajapruamu nuka núkap takakainia nú jurma atiniaiti.

Akánu. 7. (Nunka tesarma ayam nuyá arum pujúinia)

Nuinkia ajapramuka jimiar atiniaitia yantam nuyá arantia nutiksank ajapen ainiasha.

Anaiyamuka aents matsatuinia nújai métek aents takakmasartin anaikiamu ártiniaiti, nú jeachkuinkia chikichik anaikiamu atiniaiti.

Ansu uchich irutkamu uchichiniam chikich tuakma atsakuinkia chickichik átatui.

Akánu. 8. (Anaikiamu ejéramu)

Umitiai tana nújai métek anairamuka aarma ártatui. Umitiainiam tsawant tesamu ana nunisank tui ajapatniuit nui iwiarkatniuiti tura aintsank ajaptainiam amtikratniuiti.

Akánu. 9. (Tsawantri nuyá takakmastin tesaramu)

Anairamuka takakmastintri juní juarkiartatui nuyá ju tsawant tesaramujai:

1. Tuakma máshiniu wárik untsumtsuk tsawant menaint nawe tesaramujai iruntartatui anairamu nankamasmatai. nú tsawantinik, uchich tuakmanum

iniairamu áinia nusha takatri ekemsartiniaiti.

2. Yamaram nunkanam namrukaru aniairamu áinia nuka ewej tsawant juarkimiu amanum Úunt Tuatainiam takatri ekentsamu ártiniaiti.
3. Ecuadora úuntri nuyá patatkarinkia Úunt Túatai juarkimiu ewej tsawant amanum ekentsamu atatu tura ee úmiktatjai tumamtikma atinaiiti.

Ecuadora úuntri nuyá patatkarinkia tsawant 24 /yumi/ 2013 amanum takatri amikiartatui; parlamentarios andinos ainiaka 19 /yumi/ 2013 nui amukartatui; nuyá, Úunt Túatainiam pachinkiertinkia ju tsawantin 14 /yumi/ 2013 juarkiertatui.

Prefectos, viceprefectos, alcaldes, concejales municipales nuyá vocales junta parroquiales araantia anaikiarmaka, ataksha untsumkamu aink tusar, yamaika tura urumaikia nii takatrinkia 14/yumi/2014 nuyá 14/yumi/2014 amukartatui.

Akánu. 10. (Namkaru tsawantri tesareamu) Namkaru máshiniunu áinia nuka emkak umiktinia nújai takatnaka juarkiertiniaiti nuka umiktikin tana nújai métek amikiartin umimtikiatniuiti.

Akánu. 11. (Tsawntri tesaramu amuna) Ecuadora úuntri nuyá patatkari, yamaram nunkanam namruku, matsatkamu úuntri, irutkamu úuntri, atuintri, chichamrin nuyá uchich matsatkamun namkaru áinia, ni takatrinkia amukartatui wari tsawantinia ekemsarma nunisank, jú umitiai tana nújai métek.

Akánu. 12. (Anaiyamu akikri irma) junaka umitaia anaitianiu tana nújai métek najánnattui, akik iniakmammanum ajapma nuyá anaiyamu etsermanum ajapma áinia nussha nutiksank nuka juni tesaramu atatui:

- a. Ecuadora úuntri anaikiatniuka juni ákik tesaramu atiniaiti 0,15 USD;
- b. Yámaram nunkanam namruktin ákik ajapruatin junis 0,05 USD;
- c. Másh awajtin anaiyamunmanka ákik junis 0,15 USD;
- d. Arantia awajtin ainiaka akikri junis 0,30 USD;
- e. Irutkamu úuntri juni akantukmaiti 0,15 USD;
- f. Atuinri anaiyamuka junis (60%) irutkamunu akantukma nuyá achinkiatniuiti;
- g. Uchich matsatkamu áinia nui anaikiatin juni ákik akantukmaiti 0,30 USD;

Umitiai Umpuin tana nuka Awájtin titiniaiti.

Akánu. 13. (Akik anaikiatniunu tesarma) ii nunke ákik máshiniu iniaikiatin tesaramu, akikia ajapruattawai aar, tuntuinmani itiaianani chicham iniankaktinium, máshi namkartin áinia nuna, tura uchich matsatkamu áinia nuka atsa timiaiti.

Akánu. 14. (Paant amajsatin tsurinma) Anaikiatin tsawantin tesaramu amanum, umitiai tana nújai métek

takamamu máshiniu jea máshiniu nuyá máshiniun takarainia nui jú takat najánatniuka atsa timiaiti.

Tura úuntri nekachmanum etsertai áiniana nui ajapruatin chicham iniankachatniuiti ayatik tampur nekamu áinia nuink najánatniuiti.

Namkatsa aents anujmamka áinia juni ajaprutatarum tana nuka antar warinkish ajapruitaku tusa antrank imiatkinia susachtiniaiti aents ajapin áinia nuna.

Akánu. 15. (Umímtiktaijiai takakmamu) Umitiai tana nunisank anaitiainiam takakmainia nuka umimtikiartiniaiti, tumak máshiniu anaikiatin júamu amimtikiatniuiti. Nuna amiachuka asutniatniuiti umitiai tana nújai métek. Tura aintsank umitiai junis achaintiash tusa enentai apujsarminiaiti nui anaitiainiam takakmainia nuka.

AKÁNKAMU III

Takamastin tuakma yapajmia

Akánu. 16. (Itiur iniankaktiniait) Umitiai ayu tunamtai takat juarnakuinkia chikichkimas takat júamu áinia nuinkia ni itiur jukiartiniat nújai métek takat jukiartiniaiti nuka nuyá winiawai nui nekanattawai.

Akánu. 17. (Umitiai najanniu amitiairi) Umpuin aishmank nuyá núa namkaru áinia nuka 15 nunkui 2006 takatri amikiartatui.

Anairamu áiniaka awájtin máshiniu ewej tsawant nankasmatai tuakartatui, tuaka umpuartin tuakma nui anaiyamu atatui.

Umitiai nuyá takakmamu iin najánainia úunt tuakma iruntruamu taman amikiartatui umiktin umpuarma tana nunsank, chicham chikichnum iniankaktin tamajai métek.

Akánu. 18. (Anaitiai júinia takatri) Úunt tuakma takatri juareak emkaka anaimiatui áinia nuna jukiartinian iwiarkattawai, tuma asa irunar pénker juarkiartiniaiti.

Anamtainiam takakmainiaka chikich akinkiartiniaiti, nú namkaru takakmaki weartiniaiti umitiai tana aintsank. Nú uminkiamtai umitiainkia juarnaktiatui.

Akánu. 19. Anaitiainiam takat juamunam takakmauri áinia máshiniu tura nunka tesaramunam tuke takatri waitmakaruka takakmaki weartatui, turasha takatri iirsar nekapsamu ártatui nui yá timia enentai jea nú juakartiniaiti.

Imiatkin takakmamunam Anaitiai tuakar júamu irunmia nuka yamaikia Anaitiain takatri juakartatui.

Akánu. 20. (Métekrakna tuarkamu) Tsawant tesaramu washim yarush nawe akantukmajai tuakartatui métekrakna tuarkamu, nui takakmasartinkia umitiai tana nújai métek juarkiartatui.

Akánu. 21. (Máshiniu chicham iwiartai) Chicham iwiartainiam takakmainia nuka anintrusma nawe tsawant nankasmatai menaint nawe chikichik umpumaru áinia nuka takatri amukartatui.

Anaitiai tuakar júamu iwiarnar meniant nawe chikichik áinia nunaka júk jimiara nawe chikichik umpumaru ujukartatui nunaka máshiniu chicham iwiartai taman ame takat jukitia tinia suattawai chikich nekas takakmasartin anairuamu

áratui umitai arma tana nújai métek.

Akánu. 22. Yámaram umitai najánmam uchich tuakma matsatka áinia nuisha aintsank tuakar iruntramu chicham iwiartai matsatkamu najánki weartatui.

Akánu. 23. Yámaram chicham ayu timia jinma menaint uwitinkia aents takakmainiaka émamkesar iisar anaitiurma atatui tura yá ishichik nekapkan achikia nuka takatri jikiarma atinaiti, turuki uwi tesaramujai métek amikiartatui. Tsenken juaniaka usumtai uwi takakmasartatui.

Akánu. 24. (Umpumararu takakmatri pujusartin) Umpumaru takakmainia nuka ni takatri pénker amajsamu ainiawai takatri susamuka ankant jusachmin ainiawai, tuma asamtai ayatik yámaram tuakma akinia nui nankamakiartiniaiti nusha pénker takatri nekapsa iirsamujai.

Akánu. 25. (Chicham iwiartai nantuje) Yámaram anaikiatin tuakma júamu junakui yá émamkes iisartiniait nuna junaitkiartiniaiti nui emkak chicham iwiartai nantuje juarkiartatui.

Chikichkimas takata júinia usumtai aents namkatin tama naari susatniuiti.

Itiur anaiyamusha junaktiata tamanka másh pachinma júa nuyá aents iyamu tama najánatniuiti.

Tura menaintiunam juaktinniaka émakes iisar júr anaikiartin áiniawai nui takakmasartinian. Nuyá chikich patatkari anaiyamuka ujúk jurar nui jeajai métek anaiyamu atatui.

Akánu. 26. Tribunal Constitucional tuakmanum takakmainiaka tuke anaikiamu áinia nuka takakmaki weartatui turawar nuyá áyatik yamaik yaimkiat tusa apujsamuka nekapmasar takatri iirsar ujukamu ártatui.

Akánu. 27. (Chikich tuakarma yapajniaiyamu) Métekrakna tuarkamu, tuakar iwiartai nuyá Anaitiai tuakar júamu takakmainianka ni takatrinkia yámaram chicham iwiartai nantuje nú tesarawartatui. Nuni jukitniuka umitiai najánamu tana nújai métek umimtikiartatui.

Akánu. 28. (Yamaik takainia urutma tsawanta pujusartiniait) Yamaik tuakar kara atiamu anairarma: Akikia ii nunken chichamrin, akiknia másh iya, Iwiartai takaurin iin, aents matsatma ayamrin, chicham etsertai júamu úuntri, tuak takata juinianu, akikia nantuje nuyá aentsu imianmamtikin tuke takakmaki weartatui yámaram tama umikur chikich ekennastatui.

Akánu. 29. (Aents pachinma tuarka nuyá aents iyamu tuakma) Umitiai najántai júamu nawe ewej tsawant tesaramujai yamaram takakmasartinnia untsumma atatui nuinkia Aents pachinma tuarka nuyá aents iyamu pachintiukartin ainiawai. Nuna irunar umikiarmatai nii úuntri anaitiuktiniaiti namkaru áinia nuyank umitiai tana nújai métek.

Umitiai jinmamam, Aents pachinma tuarka nuyá aents iyamu, ni iwiarattawai itiur takakmasartin anaitiurtiniait nuna untsumak, tura nii úuntriayaiti máshiniu anairatin. Aents pachinma iyanash anaikiatnuiti aents anáiyamu ísarat tusa.

Aents pachinma tuarka nuyá aents iyamu, washim jimiará nawe tsawant tesaramujai nii itiur takakmasartiniait nuna

umitiairin najatawartiniaiti nuka. Úunt tuakma ayu tiri umpuarma atiniaiti.

Akánu. 30. Kasamma atsuk tusa chichamrin nuyá kasamma iyamun aintri, takakmauri tuke takatri susamu áinia nuka máshiniu Aents pachinma tuarka nuyá Aents lyamu tamanum nankamakiartatui.

Imiatkin Kasamma atsuk tusa chichamrin tamanum irunuka Aents pachinma tuarka nuyá aents iyamu tana nui máshi nankamar niniu juakartatui.

AMUAKUR TAMA

Ju umitai Ecuadornum pachitkiainia anintramunam ayu tiarua juka nekaska umikma umpuarma jinkimtai takat juarnawai tama atatui.


f.) Fernando Cordero Cueva
Awájtín Tuakma Úuntri

f.) Francisco Vergara Ortiz,
Awájtín Tuakma Aakmauri.

Úunt Tuatai.

Awájtín tuakma aakmauri nekasaiti wakan aakmarma nukuinkiamu un tawai.

Montecristi, 25 Shakaim 2008.

A handwritten signature in black ink, appearing to read 'Francisco Vergara Ortiz', with a horizontal line drawn through the middle of the signature.

f.) Francisco Vergara Ortiz,
Awájtín Tuakma Aakmauri

Yamaram chicham
Chicham eaka ejéramu

SHUAR CHICHAM-CASTELLANO

Aents iniashtnum imiancha - Personas con discapacidad

Aents iniashtnumia sunkura tákaku - Personas con enfermedades catastróficas.

Aents najantairi suritkiarma - Personas privadas de libertad

Aents nerentin nuyá Súmau - Personas usuarias y consumidoras.

Aents tuakma nuyá wekatairi - Población y movilidad humana

Aents wainma - Seguridad humana

Aents wekásatin - Movilidad humana

Aentsu niniuri nuyá pénker iisma átin - Derechos de la persona y grupos de atención primaria.

Akankámu aintiúk - Capítulo cuarto

Akankámu chikíchik - Capítulo primero

Akankámu jímiar - Capítulo segundo

Akankámu menaint - Capítulo tercero

Akankámu tsenken - Capítulo séptima

Akankámu ujuk - Capítulo sexto

Akankámu usúmtai - Capítulo noveno

Akankámu uwej - Capítulo quinto

Akankámu yarush - Capítulo octavo

Amiachmanumia - Acción por incumplimiento.

Amín atinnia - Responsabilidades

Ami'ktin Najánamu - Disposiciones Transitorias

Amírnaikiatin tama ejéramu - Tratado e instrumentos internacionales

Amitiai najánin ainiari - Función legislativa.

Amitiai najantairi, tarimiat aentsu amimiktairi -

función Judicial y justicia indígena

Amitiai takatrí juarma - Principios de la administración de justicia.

Amitiainiu umpuarma - Corte Constitucional

Amítmaku ayamrutai - Acción de hábeas corpus

Amuakur Chicham Najátamu - Disposición Final

Amukatniu Najátamu - Disposición Derogatoria

Anairatniunu - De las elecciones

Ankantan niniuri - Derechos de libertad

Arántiajai achiniarma juarma - Principios de la relaciones internacionales

Arántiajai Achiniarma - Relaciones Internacionales

Ayamruktasar nájanma - Acción de protección.

Ayámrumamu - Acción de hábeas data

Chicham eakar ejéramu - Palabras consultadas y consensuadas

Chicháma etserin - Comunicación social

Chichama Júinia Pachinkiar Irunainia - Participación y Organización del Poder

Chikíchnum Iniankaktin - Régime de Transición

Ecuador Nunka Umíktin Umpuarma - Constitución de la República del Ecuador.

Enentai juinia Iruntramu - Organizaciones políticas

Enentai juinia pachintiamu - Representación política

Entsa nuyá yurúmak - Agua y alimentación

Entsa - Agua

Kampunniuna irunin - Recursos naturales

Kamuntin másh irunin - Biodiversidad y recursos naturales.

Ikiam nuya paantin pénker wainma - Patrimonio natural y ecosistemas

Ikiam nuyá pujámuri - Naturaleza ambiente

Ikiamo niniuri - Derechos de la naturaleza

Ímiatai niniuri - Derechos de protección
Iniákma - Índice
Iruntramu nuyá najánmari - Organización y funciones
Írutkamu, iruntramu nuyá tarimiat aentsu iiniuri -
Derechos de las comunidades, pueblos y comunidades.
Itiurá iniankaktiníait - Naturaleza de la transición
Jea nuyá pujámu - Hábitat y vivienda
Juarkur enentáimsamu - Principios fundamentales
Juarma - Principios
Kampunniunam irunu - Biodiversidad
Másh ujákma atín - Acción de acceso a la información
pública
Másh wajarchatin - Estados de excepción
Máshi pénker ítai - Seguridad social
Pachiniainia - Políticas
Máshiniu irunma - Organización colectiva
Máshiniu pachiniainia - Participación en democracia
Máshiniu úuntriniam pachinma - Participación en los
diferentes niveles de gobierno.
Máshiniunu umimtikma - Disposiciones comunes
Méteketji tama chichamrin - Consejos nacionales de
igualdad.
Métekrak pachinma - Inclusión y equidad
Muchitra nakurutai nuyá tsawant ankant - Cultura
física y tiempo libre
Najántai nuyá nekátai - Cultura y ciencia
Najántairi - Cultura
Nakak máshiniu - Organización y funcionamiento
Nánkameamu - Preámbulo
Natsa - Jóvenes
Neáchma yayámu - Acción extraordinaria de protección
Nekatainiu, Takatainiu, yamarmanu nuyá yaunchuya
nekátai - Ciencia, tecnología, innovación y saberes
ancestrales

Niniuri - Derechos

Niniuri júarku nájanma - Principio de aplicación de los derechos

Núa ajamtin - Mujeres embarazadas

Núa nuyá aishmank pachitkiainia - Ciudadanas y ciudadanas.

Núa nuyá aishmank úunt - Adultas y adultos mayores

Nunka emésmakui yaimmia - Gestión de riesgo

Nunka - Suelo

Nuyánunak atuari - Garantías jurisdiccionales

Pachinma iiniuri - Derechos de participación.

Pachinma juarma - Principios de la participación

Pénker pujústinia niniuri - Derechos del buen vivir.

Pénker Pujústinnia Chichamramu - Régimen del Buen Vivir

Pujámu, Ikiamnumia nuyá tsuramtikna - Biosfera, ecología urbana, y energías alternativas

Pujámunam pénker - Ambiente sano

Pujámuri nuyá jee - Hábitat y vivienda

Shuar Chicham - Idioma shuar

Suntar nuyá pushú suntar - Fuerzas armadas y Policía Nacional

Takat nuyá pénker pujústinnia iyá - Trabajo y seguridad social

Tésak aintiuk - Sección cuarta

Tésak chikíchik - Sección primera

Tésak ewej - Sección quinta

Tésak jímiar - Sección segunda

Tésak menaint - Sección tercera

Tésak nawe chikíchik – Sección undécima

Tésak nawe jímiar - Sección duodécima

Tésak nawe - sección décima

Tésak tsenken - Sección séptima

Tésak ujuk - Sección sexta

Tésak usúmtai - Sección novena

Tésak yarush - Sección octava

Tesámu I - Título I

Tesámu II - Título II

Tesámu III - Título III

Tesámu IV - Título IV

Tesámu V - Título V

Tesámu VI - Título VI

Tesámu VII - Título VII

Tesámu VIII - Título VIII

Tesámu IX - Título IX

Tsuamatna - Salud

Tuakma Júarkimiu Átua - Garantías Constitucionales

Tuakma Umpuin Chichíchkimsamu - Elementos

Constitutivos del Estado

Uchi núach, aishmank nuyá natsamainia - Niñas, niños y adolescentes

Ujánaiyamu nuyá étserma - Comunicación e información.

Umíktin Umpuarma - Constitución

Umíktin najánamu iwiaramu - Reforma de la Constitución

Umíktin umpuarma yain - Garantías normativas

Umitiai najánniu najántairi - Procedimiento legislativo

Umpuarma Imiantri - Supremacía de la Constitución

Unuimiatna - Educación

Úunt Túatai - Asamblea Nacional

Úunta najántairi - Función Ejecutiva

Úunta takátrin iirin - Control de la acción de gobierno

Wekatainiu - Transporte

Yámaram chicham - Palabras nuevas

Yámaram nunkanam pujúinia achiniairma - Integración latinoamericana

CHICHAM EAKAR, ANINTRUSAR TAKAKMASMA:

Diccionario Comprensivo Shuar-Castellano, Imprenta SERBISH, Sucúa, julio 2004

Consulta a personas mayores de diferentes comunidades de la asociación de Sucúa, Taisha.

NUEVO OCEANO UNO, Diccionario Enciclopedico, año 2006

VISIÓN FUNCIONAL DE LA LENGUA SHUAR,
Universidad de cuenca, Tesis de grado, año 2000

Consulta a profesionales del derecho de la ciudad de Macas, año 2010

Folleto de SENPLADES, sobre el Buen Vivir, 2010

EKUATUR ANENTRUTMA

¡Tii yuminkiajme Nankámáktá!, ¡li nunkeya!
¡Tii úuntaitme!, ¡Tii úuntaitme!, ¡tii nankamakuíme!
Ame enentáiminia, tii pénker,
Tíi waraamu jííniawai;
/Ame níjiiáiminia tíi wincha,
Etsa anín iisar, waráji/ (Jimiará awenma)

Yaunchu ii úuntri, nunken akiniawaru,
Naint tii nayá, Pichinch^a naártinium,
Tuke tíi kakaar aanaitiamkarmiayi,
Nui numpén ukármarmiayi.
Nuna Arutam iis, “Ayu” Timiayi;
Tura, ashí aents íímiainiai,
Nuu numpa uukármanum,
Aents kakáram, akiniawarmiayi
akíniawarmiayi (jimiará awenma)

Tíi yuminkiajme Nankamáktá, ¡li nunkeya!
Tíi úuntaime, Tíi úuntaime, ¡tíi nankamakuitme!
Ame enentáiminia, tii penker,
Tíi waraamu jííniawai;
/Ame níjiiáiminia tíi wiincha,
Etsa anín iisar, waráji/ (Jimiará awenma)



Untsumtai (593-2) 399-1000
Chicham itiai: www.asamblea.gob.ec
ECUADOR